

**Sabóor**  
**ñeel Daawuda**



**Sabóor**  
**ñeel Daawuda**

|

|

|

|



# **Sabóor**

## **ñeel Daawuda**

Première édition  
2012

Publié par la M.B.S.  
N.I.N.E.A. : 20215410C9



Le livre des Psaumes en wolof

traduit de l'hébreu et publié par  
la Mission Baptiste du Sénégal  
B.P. 8408, 14523 Dakar  
B.P. 1229, 23022 Thiès

Première édition 2012  
Traduction provisoire

©2012 la Mission Baptiste du Sénégal  
Tous droits réservés

I.S.B.N. 978-0-9833457-2-5

Ventes, s'adresser à  
B.P. 1229 -- Thiès, Sénégal  
ou à  
Yalla Wax na / Dieu a Parlé <[dieuaparle@live.fr](mailto:dieuaparle@live.fr)>

Pour mieux lire ce livre...

L'alphabet officiel dont on se sert est facile à lire. Les seuls symboles qui présentent une certaine difficulté sont les suivants :

j	se trouve dans et	la paix dernier	—jàmm (ji) —mujj
c	se trouve dans et	le couscous descendre	—cere (ji) —wàcc
ñ	se trouve dans et	tous refuser	—ñépp —bañ
x	se trouve dans et	savoir la main	—xam —loxo (bi)
ë	se trouve dans et	l'œil demain	—bët (bi) —ëllëg
ŋ	se trouve dans et	la mâchoire seulement	—ŋaam (wi) —doŋŋ

Une différence existe entre **a** et **à**

baigner	—sang	revêtir	—sàng
l'encensoir	—and (bi)	accompagner	—ànd

La voyelle est **doublée** pour indiquer la longueur

valoir	—jar	passer par	—jaar
être propre	—set	chercher	—seet
le cœur	—xol (bi)	regarder	—xool
le nom	—tur (wi)	répandre	—tuur

La voyelle est **accentuée** pour indiquer la fermeture

souper	—reer	être perdu	—réer
jeûner	—woor	être sûr	—wóor

|

|

|

|

Li nuy bëgga lim lu nu tëral la, bëgg cee déggook bokki jàngkat  
yu tedd yi, ngir déggin wi leer, ba deesu ko jaawatle.

Nanu ràññee...

#### **nanu ak nañu**

Dees na wax : « (Nun) war nañoo dem » (**n** bi am maas bii : ~).  
Waaye danu koo taamoo binde nii :  
« (Nun) war **nanoo** dem, »  
ngir ñu bañ koo jaawatleek : « War nañoo dem (ñoom). »

#### **naa ak na**

Bu loolu weesoo, dees na wax : « (Moom) war naa dem. »  
Waaye danu koo taamoo binde nii :  
« (Moom) war **na** dem, »  
ngir ñu bañ koo jaawatleek : « War **naa** dem (man). »

#### **leen ak léen**

Te it dees na wax, « Bëgg nanu leen (ñoom). »  
Waaye danu koo taamoo binde nii :  
« Bëgg nanu **léen** (ñoom), » (**léen** am maas bii : ' )  
ngir ñu bañ koo jaawatleek : « Bëgg nanu **leen** (yéen). »

#### **Noonu :**

Yéen ñi gëm, Yàlla musal na **leen**.  
Ñoom ñi gemul, Yàlla rëbb na **léen**.

Boo gisee mändarga mii — , xamal ne kàddu gee yeggul.  
Dafa dog, mbaa muy wax ju ñu junj rekk.  
Mbind yi ñu ràññale ak yi ñu dijjal, bokkul ci mbindum  
Yàlla mu sell, mi ñu jukkee ci téere yu jëkk ya.  
Boo gisee baat bu ñu tofal araf bu tuuti bu mel nii <sup>a</sup> ,  
seetal lu muy tekki ci suufu xët mi.  
Boo gisee tomb bii ° ci boppu baat, seetal lu muy tekki ci  
*Leeral yi*, fi téere biy waaja jeexe.

|

|

|

|

# Sabóor

## Sabóor 1

### Ñaari yoon a ngii

- 1 Ndokkleee yaw mi toppul tànki ku bon,  
taxawuloo yoonu moykat,  
tooguloo jataayu ñaawlekat.
- 2 Xanaa di bége yoonu Aji Sax ji,  
di ko jängat guddeek bëccëg.
- 3 Loo def mu àntu :  
nga mel ni garab gu saxe walum ndox,  
bu jotee meññ,  
te xob wa du lax.
- 4 Loolu dalul moos ku bon,  
kay mel ni xatax bu ngelaw li wal.
- 5 Moo tax ku bon du siggee àtte ba,  
moykat du taxawe ndajem aji jub ña.
- 6 Aji Sax ji kay ay sàmm yoonu aji jub ;  
yoonu ku bon di sànk boroom.

## Sabóor 2

### Yàlla fal na buur

- 1 Ana lu xeeti àddina di riir,  
lu giir yi yas pexey neen ?
- 2 Buuri àddinaa ngi dér,  
boroom nguur yi daje,  
di fexeel Aji Sax ji,

mook ki mu fal.

<sup>3</sup> Ña nga naan : « Nanu dagg càllala yi,  
sànni jéng yi ! »

<sup>4</sup> Ki ci jalub asamaan a ngay ree,  
Boroom baa nga léen di kókkali,

<sup>5</sup> mer, ba gëdd léen,  
xadaru, tiital léen ne :

<sup>6</sup> « Man maa tabb buur, fal ko ci Siyoŋ<sup>a</sup>,  
sama tund wu sell. »

<sup>7</sup> Buur ne : « Ma biral dogalu Aji Sax ji,  
moom mi ma ne : “Yaa di sama doom,  
bés niki tey maa la jur<sup>b</sup>. »

<sup>8</sup> Ñaan ma xeeti àddina, ma sédd la ko,  
nga moom ba ca cati àddina,

<sup>9</sup> yilife léen yetu weñ,  
rajaxe léen ni njaqal xandeer.” »

<sup>10</sup> Kon yéen buur yi, muusleen,  
kilifay àddina, fàgguleen.

<sup>11</sup> Jaamuleen Aji Sax ji, ragal ko,  
di ko bége, ba yaram daw.

<sup>12</sup> Sujjóotal-leen doom ji, bala moo mer,  
ngeen sànkoo seen u yoon ;  
meram day jekki ne jippét,  
waaye ndokklee képp ku ko làqoo !

**a 2.6 Siyoŋ** : Siyoŋ fii mooy tund wa kér Yàlla ga nekkoon ca Yerusalem. Daan nañu ko tudde it dëkkub Yerusalem mbaa réewum Israyil. **b 2.7 Jur**. Su Yàlla nee moo jur buur bi, waxin la rekk. Bés bi ñuy fal buur bi la Yàlla di biral ne jàppe na buur bi ni doomam. Ni doom di taxawale baayam, ni la buur biy taxawale Yàlla ci kaw suuf. Ni baay di sàmme doomam it, ni la Yàlla di sàmme buur bi, ngir mu am ndam.

## Sabóor 3

Aji jub a ngi woote wall

*1 Muy kàddug Sabóor, ñeel Daawuda, ba  
muy daw Absalom doomam ju góor<sup>c</sup>.*

*2* Éy Aji Sax ji, noon yeeka bare !

Nu baree may jógal,

*3* ñu baree may tooge naa :

« Yàlla du ko wallu ! »

*Selaw<sup>d</sup>.*

*4* Waaye yaw Aji Sax ji, yaa may feg,  
di ma teral, di ma siggal.

*5* Maay woo Aji Sax ji wall,  
mu walloo ma fa tundam wu sell wa.

*Selaw.*

*6* Maay tödd nelaw, yewwu ;  
Aji Sax ji di ma aar.

*7* Nu dul jeex a ma jógal, gaw ma,  
te duma ragal.

*8* Éy Aji Sax ji sama Yàlla,  
jógal, wallu ma !  
Yaa toj kaabaabi noon yu bon yépp,  
foq seeni sell.

*9* Aji Sax ji, yaa moom wall,  
sa mbooloo jagoo sa barke.

*Selaw.*

**c** 3.1 Seetal ci 2. Samiyel 15—16. **d** 3.3 *Selaw* : Jàpp nañu ne ndigal la luy taxawloo jàngkat yi, te jombul xalam yi wéy ba tey. Waaye man na nekk itam ndigal ngir xalam yEEK jàngkat yi gëna xumbal.

## Sabóor 4

### Ma gonloo ñaan

*1 Mu jëm ci njiiital jàngkat yi, ànd ak i xalam,  
di kàddug Sabóor, ñeel Daawuda.*

*2* Éy Yàlla, yaw mi may àtte dëgg,  
maa ngi woote, wuyu ma ;  
maa xatoon, nga yaatal ma.  
Ngalla baaxe ma, nangul ma.

*3* Yéen boroom daraja yi,  
buleen yàqati sama der,  
buleen sopp caaxaan, di sos. *°Selaw.*

*4* Xamleen ne Aji Sax ji day séddoo ku ko ragal,  
te bu ma wooyee Aji Sax ji, mu dégg.

*5* Loxleen te baña bákkaar,  
waxtaanleen ak seen negegenaay te noppi.

*6* Rendileen seen sarax yi war,  
te wóolu Aji Sax ji.

*7* Bare na ñu naan : « Ana ku nuy won lu baax ? »  
Éy Aji Sax ji, baaxe nu saw yiw !

*8* May nga ma bànnexu xol  
bu raw seen pepp mu tuurook biiñ bu wal.

*9* Jàmm laay tèdde, nelaw,  
Aji Sax ji, yaw doñj yaa may dëël fu wóor.

## Sabóor 5

### Ma jëluy ñaan

*1 Mu jëm ci njiiital jàngkat yi, ànd ak i toxoro,  
di kàddug Sabóor, ñeel Daawuda.*

*2* Éy Aji Sax ji, maa ngi àddu, déglu ma,  
maa ngi onk, teewlu ma.

*3* Sama Buur, sama Yàlla, déglul, ma ne wallóoy !

Yaw laay ñaan.

<sup>4</sup> Aji Sax ji, ag suba, ngay dégg sama baat,  
suba su ne ma diis la samay dagaan,  
di séentu.

<sup>5</sup> Doo Yàlla ju safoo coxor,  
yaw lu bon du la daloo.

<sup>6</sup> Ku réy du taxaw fi sa kanam,  
kuy def lu ñaaw, bañ nga ko.

<sup>7</sup> Aji Sax ji, yaay sànk kuy fen,  
sib kuy bóomeek kuy wore.

<sup>8</sup> Man nag, sa ngor lu yaa laa saña dugge sa kér,  
sujjóotal sa bérab bu sell, wormaale la.

<sup>9</sup> Éy Aji Sax ji, wommate ma sa njekk ndax i noon,  
te xàllal ma saw yoon.

<sup>10</sup> Nii, lu ñu wax, wérul,  
seen xol a mébét njekkar,  
seen gémmiñ di yoonu bàmmeel,  
ñuy naxe làmmiñ wu neex.

<sup>11</sup> Éy Yàlla, topp léen,  
ñu fakktaloo seeni pexe ;  
xalabal nii barey moy,  
ñoo la gàntal.

<sup>12</sup> Képp ku la làqoo, yal na bégi,  
di saxoo sarxolle, nga di ko yiir,  
te ku la sopp di la bégi.

<sup>13</sup> Aji Sax ji yaw kat, yaay barkeel ku jub,  
yiire ko saw yiw, fege ko.

## Sabóor 6

### Jarag a ngi woote wall

**1** *Mu jëm ci njital jàngkat yi, ànd ak xalamu juróom  
netti buum, di kàddug Sabóor, ñeel Daawuda.*

**2** Éy Aji Sax ji, bul mer, ba di ma rëbb,  
bul xadaru, ba di ma mbugal.

**3** Aji Sax ji, damaa néew doole, yérëm ma !  
Éy Aji Sax ji, sama yaram a tas, dàmp ma !

**4** Sama xol a jeex tàkk.

Aji Sax ji, loo deeti xaar nag ?

**5** Éy Aji Sax ji, délsil, xettli ma !  
Walloo ma sa ngor.

**6** Deesul dee ba fàttliku la ;  
ku dugg njaniiw, nu mu lay sante ?

**7** Onk naa ba loof, di fanaanee jooy,  
sama lal di féey,  
ba far seeye rongooñ.

**8** Saay gët a ngi xóot ndax u naqar,  
boole ci giim ndax tooñi noonoo noon.

**9** Yéen, defkati ñaawteef yépp, xiddileen ma !  
Aji Sax ji dégg na saay jooy,

**10** Aji Sax ji dégg na saay dagaan,  
Aji Sax jii nangu na samag ñaan.

**11** Noon yépp a am gàcce, ba jàq lool,  
ne wérëñ ak gàcceg mbetteel.

## Sabóor 7

Boroom tuumaa ngi woote wall

<sup>1</sup> *Muy woyu njàmbat, ñeel Daawuda. Mu woyaloon  
ko Aji Sax ji ci mbirum kàddu yu tukkee woon  
ca Kuus, ma bokkoon ci giiru Beñamin.*

<sup>2</sup> Éy Aji Sax ji, sama Yàlla, yaw laay làqoo !  
Musal ma, xetcli maak ñi may dàq ñépp.

<sup>3</sup> Lu ko moy ñu fàdd ma ni gaynde,  
daggate ma te kenn du wallu.

<sup>4</sup> Aji Sax ji sama Yàlla, ndegam maa def lii,  
ndegam maa taq fenn lu ñaaw,

<sup>5</sup> ndegam ku ma jàmmal laa feye aw ay,  
mbaa ma dimbali ku ko noonoo te defu ko dara,

<sup>6</sup> yal na ma noon rëbb,  
dab ma, dëggate ma,  
sàggi saab sag, tèral ci pëndub suuf.

<sup>°Selaw.</sup>

<sup>7</sup> Aji Sax ji, meral, jóg,  
dajeel maak xadaru noon yi !  
Ngalla teewlu ma ; yaw, yoon nga santaane.

<sup>8</sup> Yal na xeet yi daje, wér la,  
nga délsi tiim léen fu kawe.

<sup>9</sup> Yal na Aji Sax ji àtte xeet yi ;  
Aji Sax ji, seetal ci sama njubteek sama maandute te  
dëggal ma.

<sup>10</sup> Yal na mbonug ku bon tees,  
te nga saxal kuy def njekk.  
Yaw Yàlla Boroom njekk, yaay natt xel ak xol.

<sup>11</sup> Sama kaaraange, fa Yàlla,  
miy musal boroom xol bu dëggú.

<sup>12</sup> Yàllaay àtte dëgg.  
Yàllaay rëbbe bés bu ne.

<sup>13</sup> Ku tuubul, Yàlla nàmm saamaram,

- bank xalaam, diir la.
- <sup>14</sup> Moom la waajalal ngànnayaï ndee,  
def ko fitt yuy boy.
- <sup>15</sup> Ku bon a ngoog, di matu doomu ñaawteef.  
Day sos njombe, wasin njublañ.
- <sup>16</sup> Am kan lay gas, ba mu xóot,  
te pax ma mu gas, moo ca tàbbi.
- <sup>17</sup> Fitnaam, këpp ci boppam ;  
coxoram, xàñj cim kaajam.
- <sup>18</sup> Naa sante Aji Sax ji njekkam,  
ma woy Aji Sax jiy Aji Kawe ji.

## Sabóor 8

### Aji Sax ji teral na nit

<sup>1</sup> *Mu jëm ci njíital jàngkat yi, ànd ak xalam gu ñuy  
wax gitit<sup>e</sup>, ñeel Daawuda, di kàddug Sabóor.*

- <sup>2</sup> Aji Sax ji sunu Boroom,  
sa tur aka màgg ci kaw suuf sépp !  
Sag leer tiim asamaan.
- <sup>3</sup> Baatu xale ba ci kuy nàmp,  
feeñal nga ca sa kàttan,  
bañaaleek feyukat ne xerem.
- <sup>4</sup> Damay xool sa asamaan si nga móol,  
ak weer week biddiw yi nga fi teg.
- <sup>5</sup> Moo luy nit, ba nga di ko bàyyi xel ?  
Luy doom aadamaak loo koy yége ?
- <sup>6</sup> Xañoo nit lu tax kureelu malaaka yi sut ko lool,  
te kaalaa nga ko teraangaak daraja,

**e 8.1** *gitit tur la wu réer ci làkku ebrë. Man na doon xeetu xalam gu cosaanoo dëkk ba ñuy wax Gaat ci réewu Filisti. Man na nekk it galan bu ñu daan woye ci jamono bu ñuy witt reseñ, di ko nal.*

7 fal ko ci kaw loo bind,  
 jox ko lépp, mu teg tànk :  
 8 jur gépp, gu gudd ak gu gátt,  
 rabi àll it ca la,  
 9 ak njanaaw ak jén,  
 ak luy jaare yooni géej.

10 Aji Sax ji sunu Boroom,  
 sa tur aka màgg ci kaw suuf sépp !

### Sabóor 9

#### Aji Sax ji dëgg lay àtte

*1 Mu jém ci njiital jàngkat yi, dëppook galan bu ñuy wax  
 Deewug doom ju góor, ñeel Daawuda, di kàddug Sabóor.*

2 Ma sante Aji Sax ji sama xol bépp,  
 di siiwal mboolem i kéemaanam.  
 3 Yaw Yàlla, dama lay bége, bànnexoo la,  
 woy la, yaw Aji Kawe ji.  
 4 Noon yeey dellu gannaaw,  
 téref, sàñku fi sa kanam.  
 5 Yaa ma àtte yoon, dëggal ma,  
 toog ci sab jal, di àtte njub.  
 6 Rëbb nga xeet yi, sàñk ñu bon ñi,  
 far seeni tur ba fàww.  
 7 Noon ya raaf, gental ba fàww.  
 Yaa déjjati seeni dëkk, seen u askan fey.  
 8 Aji Sax jee sax dàkk,  
 samp jalam ngir àtte.  
 9 Moom mooy àtte àddina cig njub,  
 di dogalal xeet yi dëgg.  
 10 Aji Sax jeey làq néew-ji-doole,  
 mooy làqe bésub njàqare.  
 11 Aji Sax ji, yaw, ku la xam, wóolu la.  
 Aji Sax ji, yaw, ku lay sàkku, doo ko wacc.

- 12 Woyleen Aji Sax ji dëkke °Siyon,  
siiwal-leen ay jalooreem ci xeet yi !
- 13 Mooy topp nit bakkanu moroomam, di ko ba xel,  
te du fätte yuuxi néew-ji-doole.
- 14 Éy Aji Sax ji, baaxe ma,  
gisal naqar wi ma bañ yi teg.  
Yaa may yékkatee fa bunti ndee,
- 15 ba ma siiwali sa woy yépp,  
fa buntu Siyon, dëkk bu taaru ba,  
di bànnexoo sa wall gii !
- 16 Xeet yee tàbbi pax ma ñu gasoon,  
fakktaloo fiir ga ñu làqoon.
- 17 Aji Sax jaa ngi feeñoo, di àtte yoon ;  
ku bon teg ug fiir, tàbbi ca.      *Na jib ndànk. °Selaw.*
- 18 Nu bon ñee dëddu, dem njaniiw,  
ànd ak xeet yi fätte Yàlla yépp.
- 19 Yàlla du tanqamlu ab ndóol ba fàww,  
yaakaaru néew-ji-doole du tas mukk.
- 20 Aji Sax ji, jógal, bu la nit yab ;  
na xeet yi dikk fi sa kanam, nga àtte léen.
- 21 Rikk Aji Sax ji, yónnee léen tiitaange,  
xamal léen ne nit doñj lañu.      *Selaw.*

## Sabóor 10

### Néew-ji-doole sàkku na yoon

- 1 Éy Aji Sax ji, lu la taxa sore ?  
Xanaa dangay làqu, bésub njàqare ?
- 2 Ku bon naagu na, ne dann néew-ji-doole,  
lal i pexeem, ba jàpp ko.
- 3 Ku bon déy a ngi tèggoo bànnexu bakkanam,  
ku bëgge di ñàkke wormaak a sofental Aji Sax ji.

- <sup>4</sup> Ku bon daŋjiiral, seetul dara,  
xalaatam yépp mooy Yàlla amul.
- <sup>5</sup> Saa yu fexee, juble,  
te gisul sa ndigali yoon yi ko tiim.  
Ma ngay ciipu bañam yépp.
- <sup>6</sup> Ma nga naan ca xelam : « Duma térëf,  
safaan du ma dab tey ak ëllëg. »
- <sup>7</sup> Ay móolu la gémmiñ ga fees, ak fen ak njublaŋ,  
njekkar ak ñaawteef lal làmmiñ wa.
- <sup>8</sup> Day téroo ciy dékk-dékkaan,  
làqu di bóom ku deful dara,  
nëbbu di wootal néew-ji-doole.
- <sup>9</sup> Day làqu bérab, di yeeroo ni gaynde cim xunteem,  
di yeeru aji ñàkk, ba jäpp ko,  
laaw ko, ñoddi, yóbbu.
- <sup>10</sup> Ma ngay sëgg ak a waaf,  
ba aji ñàkk daanu ci loxoom.
- <sup>11</sup> Mu naa ca xelam : « Yàlla fàtte na,  
dummóoyu na, du xoolati. »
- <sup>12</sup> Aji Sax ji, jógal !  
Éy Yàlla, xàccil sa loxo.  
Bul fàtte néew-ji-doole.
- <sup>13</sup> Bul may ku bon mu sofental la,  
te naan ci xelam : « Yàlla du ma ko topp. »
- <sup>14</sup> Yaw de yaay ki nemmiku,  
di gis njekkar ak naqar,  
ku mu dal, nga sàmm àqam.  
Néew-ji-doole wéeroo la,  
ab jirim, nga dimbali.
- <sup>15</sup> Ngalla dammal loxol ku soxor ak ku bon,  
topp léen seen coxor,  
gi ñu yaakaaroon ne du feeñ.
- <sup>16</sup> Aji Sax jee di Buur ba fàww !  
Xeet yeey sàngku, jeex cim réewam.
- <sup>17</sup> Néew-ji-doole dagaan, Aji Sax ji dégg,  
dalal xelam, teewlu ko,

<sup>18</sup> ngir sàmm àqu jirim ak néew-ji-doole,  
ba nit kiy suufu kese dootu xéble.

### Sabóor 11

#### Ma làqoo Aji Sax ji

<sup>1</sup> *Mu jëm ci njital jàngkat yi, ñeel Daawuda.*

Aji Sax ji laa làqoo.

Ana lu ngeen ma naa : « Neel fëyy ni picc, toñi sa  
kaw tund.

<sup>2</sup> Xanaa du ñu soxor ñaa ngii, bank seen xala,  
nas seen u fitt,  
nara lëndëmtu, jam ku jub ?

<sup>3</sup> Bu ponki njub màbbee,  
nu aji jub di def ? »

<sup>4</sup> Aji Sax jaa nga këram gu sell.  
Aji Sax jaa nga asamaan, kaw jalám,  
ne jàkk doom aadama, di ko seetlu.

<sup>5</sup> Aji Sax ji day seetlu ku jub ;  
ku soxor, bëgg fitna, mu bañ.

<sup>6</sup> Day tawal ku bon ay mbugal ;  
sawaraak tamarax ak ub jaas dib añam.

<sup>7</sup> Aji Sax jee jub, sopp njub ;  
kuy jubal, gis yiwan.

### Sabóor 12

#### Kàddug Yàllaa wóor

<sup>1</sup> *Mu jëm ci njital jàngkat yi, ànd ak xalamu juróom  
ñetti buum, di kàddug Sabóor, ñeel Daawuda.*

<sup>2</sup> Wallóoy, Aji Sax ji, ngor jee na !  
Kóolute réer na doom aadama.

<sup>3</sup> Dañuy fenante,  
làmmiñ dig lem, xol ba njuuy la.

- <sup>4</sup> Yal na Aji Sax ji tēj gémmiñu kuy naxe,  
ak kuy làmmiñuy tēggū.
- <sup>5</sup> Ñu ngi naa : « Sunu làmmiñ lanuy daane,  
nook sunu kàddu ; ku nu manal dara ? »
- <sup>6</sup> Ku ñàkk a ngi, ñu futti,  
mu ngi binni, di néew-ji-doole.  
Aji Sax ji nee : « Maa ngii, di ci jóg,  
teg léen fi rawtu gu ñu ne siiw. »
- <sup>7</sup> Kàddug Aji Sax ji, kàddu gu sell la,  
ni xaalis bu ñu xelli ci taalu ban,  
settli ko juróom ñaari yoon.
- <sup>8</sup> Ngalla Aji Sax ji, sàmmal ku néewle,  
aar ko saa su ne ci nitu tey.
- <sup>9</sup> Ñu bon ñaa ngi taxawaalu fu ne,  
jikko ju sew falu ci biir doom aadama yi.

### Sabóor 13

Aji Sax ji, loo deetixaar ?

- <sup>1</sup> Mu jém ci njíital jàngkat yi, di kàddug Sabóor, ñeel Daawuda.
- <sup>2</sup> Céy Aji Sax ji, loo deetixaar ?  
Xanaa doo ma tanqamlu ba fàww ?  
Loo deetixaar, bañ maa geesu,
- <sup>3</sup> ba ma tàggook bopp bu ubu  
ak njàqarey xol bu sax,  
ba noon dootu ma man ?
- <sup>4</sup> Céy Aji Sax ji sama Yàlla, geesu ma, wuyu ma,  
leqli ma, bala ma ne sérëx ci nelawi ndee,
- <sup>5</sup> noon ba naan : « Daan naa ko, »  
bañ yay bége saab jéll.
- <sup>6</sup> Man de maa ngi dénkoo sa ngor,  
di bànnexoo sag wall.

Naa woy Aji Sax ji,  
ki may baaxe xéewalam.

### Sabóor 14

#### Yàqute maase na

*1 Mu jëm ci njital jàngkat yi, ñeel Daawuda.*

Ab dof a ngi naa ci xelam :

« Yàlla amul ! »

Ñu ni mel ay def njekkar, seeni jëf siblu,  
kenn defu ci lu baax.

*2 Aji Sax jee toll asamaan, jéer doom aadama,  
di seet ku ci xelu, tey sàkku Yàlla.*

*3 Ñépp lajj, bokk yàqu yaxeet.*

Kenn deful lu baax, du kenn sax.

*4 Aji Sax ji nee : « Xanaa ñiy def lu bon ñépp  
xamuñu dara ?*

Ñuy lekk sama mbooloo niw ñam,  
te sàkkuwuñu Aji Sax ji. »

*5 Foofu lañuy tiite tiitaange lu réy !*

Du Yàllaa ngi ànd ak kureeli ñu jub ñi ?

*6 Ku néewlee yaakaar, ngeen tas ko,  
waaye Aji Sax ji la làqoo.*

*7 Ana kuy xettle Israyil fa °Siyon?  
Éy bés bu Aji Sax ji delloo mbooloom ndam,  
ndaw mbégte ci giiru Yanqóoba !  
Ndaw bànnex laa ne, ci Israyil gii !*

### Sabóor 15

#### Kuy aji jub ?

*1 Muy kàddug Sabóor, ñeel Daawuda.*

Aji Sax ji, kuy ganeji sa xayma ?  
Ana kuy dëkki sa tund wu sell ?

- 2 Xanaa ki wéye maandu,  
di def njekk,  
di wax dëggoo xolam.
- 3 Du sos,  
du tooñ dëkkandoo,  
du baatal moroomam.
- 4 Ku siblu, mu sib,  
ku ragal Yàlla, mu teral.  
Mooy sàmm ngiñam,  
su ko dee lor it.
- 5 Du leble, ba teg ca ;  
du nangu ger, ngir fexeel jaambur.

Lii ku koy jëfe doo jang.

### Sabóor 16

**Aji Sax ji laa séddoo, dund ak dee**

***1 Muy taalifu Daawuda, ngir jàngle.***

- 2 Éy Yàlla, sàmm ma, maa ngi làqu fi yaw !  
Maa ne Aji Sax ji : « Yaay sama Boroom,  
awma alal ju la moy. »
- 3 Nu sell ñi ci réew mi ñooy garmi yi,  
sama mbégte mépp ñoom a.
- 4 Kuy sàkkuy tuur barew tiis,  
man de dumá léen tuural deret,  
sama làmmiñ du léen tudd.
- 5 Aji Sax ji, yaay wàll wi ma séddoo,  
di sama ndabal xéewal.  
Yaa yor sama wërsëg.
- 6 Maa muurloo bérab bu neex,  
ndaw cér bu rafet !
- 7 Ma sant Aji Sax ji may xelal,  
ba guddi sax sama xel di ma yedd.
- 8 Damaa saxoo ne jàkk ci Aji Sax ji,

- ndijoor la ma fare, ba duma térëf,  
 9 xanaa di bànnexu, sama xol bégi,  
 sama yaram finaax.  
 10 Doo ma wacc njaniiw moos.  
 Sa wóllére, doo ko won bàmmee.  
 11 Yaa may xamal yoonu dund.  
 Fu bànnex mate, yaa teew,  
 xéewal sa ndijoor la saxe.

### Sabóor 17

Aji Sax ji, jox ma dëgg

<sup>1</sup> Muy ñaanu Daawuda.

- Éy Aji Sax ji, déglul liy dëgg,  
 déglul, ma woote !  
 Teewlul, ma dagaane la  
 làmmiñ wu mucc fen.  
 2 Yal na sama àtte bawoo fi yaw,  
 nga gis sama njubte.  
 3 Natt nga saab xol, niir ma guddi,  
 settantal ma, gisoo dara.  
 Dogu naa ne duma moye wax.  
 4 Su may jéf it, di sàmm sa kàddu.  
 Maay moyu yoonu ku bon.  
 5 Sa tànk, sama tànk,  
 jàdduma fenn.  
 6 Éy Yàlla, maa lay woo, nga di ma wuyu ;  
 teewlu ma te déglu ma !  
 7 Na sa ngor feeñ,  
 yaw miy walloo sa doole  
 ku la làqooy noonam.  
 8 Sàmm ma ni Peru bët ;  
 làqe ma sa ker,  
 9 ma rëcc ñu bon ñi ma song,  
 noon ñii ma gaw, nar maa bóom.

- <sup>10</sup> Seen xol dàq yérmande,  
seeni wax di reewande.
- <sup>11</sup> Tanc nañu nu fépp,  
ne nu jàkk, nar noo tèral.
- <sup>12</sup> Mbete gaynde gu namma fàdde,  
gaynde siibi guy tèroo !
- <sup>13</sup> Éy Aji Sax ji, jógal dajeek moom, detteel ko.  
Kettle ma sa saamar, ma rëcc ku bon.
- <sup>14</sup> Éy Aji Sax ji, walloo ma sa doole,  
ma rëcc ñi séddoo dundu àddina.  
Say soppe, nga reggal,  
seeni doom regg,  
desalal seeni doom.
- <sup>15</sup> Man nag ma am dëgg, ne la jàkk,  
yewwu, regge sa jëmm.

## Sabóor 18

### Buur daan, sant Aji Sax ji

<sup>1</sup> *Mu jëm ci njital jàngkat yi, ñeel Daawuda jaamub Aji Sax ji.*  
*Mu jagleel Aji Sax ji woy wii, bés ba mu ko xettle ci mboolem*  
*noonam, xettli ko it ci Buur Sóol. Kàdduy woy yaa ngii.*

- <sup>2</sup> Mu ne :  
Aji Sax ji, maa la sopp, yaw mi may dooleel.
- <sup>3</sup> Aji Sax ji laay sës,  
mu di ma aar,  
di ma wallu.  
Mooy sama Yàlla, ji may sës, yiiru, fegu ;  
mooy Boroom doole ji may musal, di ma làq.
- <sup>4</sup> Ma woo Aji Sax, ji jara sant,  
rëcc noon, mucc.
- <sup>5</sup> Buumi ndee tanc ma,  
walum kasara naq ma,

- 6 buumi njaniiw laaw ma,  
 dee ne jaas, di ma fiir.  
 7 Ma jàq, woo Aji Sax ji,  
 ne sama Yàlla wallóoy,  
 mu dégge këram.  
 Ma yuuxu, muy dégg.  
  
 8 Mu mer, suuf yëngu, di ker-keri ;  
 kenuy tund ya jaayu, di reg-regi.  
 9 Saxar di sël-sëlee ca wakkan ya,  
 sawara boye ca gémmiñ ga,  
 xal yu yànj tàkke ca.  
 10 Mu firi asamaan, wàcc,  
 niir yu fatt lal tànk ya.  
 11 Ma nga war malaakam °serub, di naaw,  
 daayaarloo laafi ngelaw.  
 12 Ma nga bàddoo lëndëm, làqoo,  
 làmboo ndox mu lëndëm ak i xàmbaar,  
 13 leer a ko jiitu, xàmbaar ya topp ca,  
 ak tawu yuur ak xali sawara.  
 14 Aji Sax jee dënoo asamaan.  
 Aji Kawe jee àddu,  
 muy tawub yuur ak xali sawara,  
 15 mu soqiy fitt ak jumi melax,  
 tasaare léen, félxe.  
 16 Aji Sax ji, dangaa gëdd,  
 nokki, mu riir,  
 xuri géej ne fànjj,  
 kenuy suuf ne duñj.  
  
 17 Aji Sax jee yóotoo fa kaw, jàpp ma,  
 seppee ma ca xóotey ndox ma,  
 18 musal ma ca noon yu mag,  
 ya ma bañ te man ma.  
 19 Nu dajeek man, bés ba ma jàqee,  
 Aji Sax ji taxawu ma,  
 20 yaatal ma, bége ma, ba xettli ma.

- 21 Aji Sax jee ma yool sama njekk,  
     samay loxoo set, mu Fey ma.  
 22 Sàmm naa yooni Aji Sax ji,  
     bonuma, di moy sama Yàlla.  
 23 Dama ne jàkk ndigalam yépp,  
     xalabuma dogali yoonam.  
 24 May ànd ak moom, di set wecc,  
     di moyoo tooñ.  
 25 Aji Sax jee ma yool sama njekk,  
     rafetlu sama mucc ayib.  
  
 26 Yaw Aji Sax ji, ku gore, fekk la gore ;  
     ku matale, fekk la matale ;  
 27 ku sellal, fekk la sell ;  
     ku dëng, fekk laak say feem.  
 28 Yaw yaay musal xeet wu néew doole,  
     kuy daññiiral, nga detteel.  
 29 Yaw kay yaa may niital.  
     Aji Sax ji sama Yàllaay leeral sama lëndëm.  
 30 Maak yaw kay, ma song gàngoor.  
     Maak sama Yàlla, ma tëb um tata.  
  
 31 Yàllaa mat.  
     Kàddug Aji Sax jee wér te wóor.  
     Mooy feg képp ku ko làqoo.  
 32 Ana kuy Yàlla ku moy Aji Sax ji ?  
     Ku jara sës ku dul sunu Yàlla ?  
  
 33 Yàllaa may dooleel,  
     di ma xàllal, yoon mat,  
 34 Moo ma gaawal ni kewél,  
     taxawal ma fu kawe.  
 35 Moo may tàggat ngir xare,  
     may bank xalag xànjar.  
 36 Aji Sax ji yaa may feg, musal ma,  
     dooleel ma sa loxo,  
     nangul ma, darajaal ma.

- 37 Yaa ma xàllal u yoon,  
ba duma tèrèf.
- 38 Ma dàq noon yi, dab léen,  
jekkali, doora dëpp.
- 39 Ma jam léen, jógatuñu,  
xanaa félèñu, ma joggi.
- 40 Sol nga ma dooley xare,  
sukkal ñi ma jógal, ñu féete ma suuf.
- 41 Won nga ma ndoddi noon,  
ma boole bòom bañ yi.
- 42 Ñu ne wallóoy, wall amul ;  
ñu woo Aji Sax ji, faalewu léen.
- 43 Ma wol, ba ñu doon pënd, ngelaw wal,  
ma wetti ni banu mbedd.
- 44 Xettli nga ma ci bokk yiy fippu,  
def ma, ma jiite ay xeet ;  
waaso wu ma xamul sax nangul ma,
- 45 ku ma ci dégg, déggal ma,  
ay doomi doxandéem di ma raamal,
- 46 ne yàcc,  
génne seeni tata, di lox.
- 47 Aji Sax jeey kiy dund.  
Kii ma sès a jara sant.  
Yàlla mi may musal moo màgg !
- 48 Mooy Yàlla ji ma feyul,  
nangulal ma xeet yi.
- 49 Xettli nga maak noon,  
kaweelel ma, ma tiim ku ma jógal,  
xettleeti ma cib soxor.
- 50 Kon Aji Sax ji, ma sant la ci biir xeet yi,  
kañ la !
- 51 Yaay may sa buuru mbooloo ndam lu réy,  
yaay ji ngor ki nga fal,  
muy man Daawuda,  
di sama askan ba fàww.

## Sabóor 19

### Aji Sax ji màgg na

**1** *Mu jëm ci njíital jàngkat yi, di kàddug Sabóor, ñeel Daawuda.*

**2** Asamaan nee Yàlla màgg na,  
kaw ne màww, biral liggéeyu loxoom !

**3** Bésoo bés kàddu seere ko,  
guddee guddi xamle ca mbir.

**4** Du lakk, duy wax,  
du baat bu dégtu,

**5** te seen ndéey law fépp,  
seen kàddu àkki cati àddina.

Kaw la Yàlla sampal jant xayma,  
**6** mu mel ni boroom séet, génne néegam,  
di mbér mu dojali, xéluw yoonam.

**7** Asamaan lay fenke cat lii,  
wëndeelu, sowi cat lee ;  
amul lu rëcc tàngooram.

**8** Yoonu Aji Sax jee mat,  
di leqli bakkan.

Lu Aji Sax ji seede dëgg la,  
day xelal ku xeluwl.

**9** Lu Aji Sax ji tegtale, njub la,  
di bégal xol.

Lu Aji Sax ji santaane, leeraange la,  
di leeral gis-gis.

**10** Santaaneb ragal Aji Sax ji mooy li sell  
te sax ba fàww.

Lu Aji Sax ji dingle, dëgg la,  
ak njekk gu sotti.

**11** Moo dàq wurus,  
raw wurusu ngalam wu ne xas ;  
dàqati lem,  
ëpp tem-tem.

<sup>12</sup> Man, Sang bi, ci laay leerloo,  
ku ko sàmm yokku yool.

<sup>13</sup> Nit juum na, umple ko,  
baal ma tooñ gu ma umple.

<sup>14</sup> Te Sang bi, musal ma ci bàkkaaru teyef,  
mu bañ maa jiital,  
ma mana maandu, mucc moy gu réy.

<sup>15</sup> Éy Aji Sax ji, lu saaw làmmiñ tudd  
mbaa sama xol déey ma ko,  
yal nay loo gérém,  
yaa may aar, yaa ma jot.

## Sabóor 20

### Yal na Buur daan

<sup>1</sup> *Mu jèm ci njíital jàngkat yi, di kàddug Sabóor, ñeel Daawuda.*

<sup>2</sup> Buur, yal na la Aji Sax ji nangul bésu njàqare,  
yal na la turu Yàllay Yanqóoba aj fu kawe,

<sup>3</sup> yal na la yónnee wallam fa kérám,  
jàpplee la fa, ca °Siyonj.

<sup>4</sup> Yal na xool loo ko jébbal,  
di rafetlu sarax soo ko lakkal.

<sup>°Selaw.</sup>

<sup>5</sup> Yal na la may li nga namm,  
di sottal loo mélbét,

<sup>6</sup> ngay daan, nuy ree,  
yéegé sunu raaya, màggal sunu Yàlla.  
Yal na Aji Sax ji nangu loo dagaan.

<sup>7</sup> Aji Sax jeey musal ki mu fal, bir na ma tey.  
Moo koy nangule fa asamaan su sell sa,  
ci dooley ndijooram biy musle.

<sup>8</sup> Niik i watiir,  
ñeek i fas,  
nun sunu turu Yàlla Aji Sax ji lanuy tudd.

9 Ñoom ñooy jeng ak a jóoru,  
nun, nu jóg, taxaw jonn.

10 Éy Aji Sax ji, mayal Buur mu daan,  
te bés bu nu ko ñaane, mu nangul nu.

### Sabóor 21

#### Aji Sax ji baaxe na Buur

1 *Mu jëm ci njital jàngkat yi, di kàddug Sabóor, ñeel Daawuda.*

2 Céy Aji Sax ji, Buur a ngi bége sa doole,  
di bànnexoo sag wall, rekk.

3 Yaa ko may nammeeli xolam,  
gàntuwuloo dagaananam.

<sup>°</sup>*Selaw.*

4 Yaa ko gatandoo barkey ngëneel,  
kaalaa ko wurusu ngalam.

5 Mu ñaan muc,

nga saxal jalam fàww,

6 sag wall a ko sagala sagal !

Teddngaak daraja nga ko sédd,

7 jagleel ko barke bu sax dàkk,  
bégale ko sa kanam, mu bànnexu.

8 Buur wóolu na Aji Sax ji, moos,  
du térëf, Aji Kawe jee gore.

9 Buur, yaa naa sa noon yépp céex,  
ne say bañ taral.

10 Soo nee jalañ, jafal, ñu boy.

Aji Sax ji mer, sànk léen,

sawara xoyom léen.

11 Yaay raafal seeni giir fi kaw suuf,  
fey seen askan ci doom aadama yi.

12 Ñoo la mébal lu bon,  
nasal la pexe, joyul.

13 Nga di léen diir fittu kanam,  
ñu wone gannaaw.

<sup>14</sup> Aji Sax ji, jógal ak sa manoore,  
nu joobe la, woy sa jaloore.

## Sabóor 22

Jékke jàq, mujje sant

<sup>1</sup> *Mu jém ci njíital jàngkat yi, di kàddug Sabóor, ñeel  
Daawuda, dëppook galan bi ñu dippee Kéwélu fajar.*

- <sup>2</sup> Sama Yàlla, sama Yàlla, lu tax nga wacc ma ?  
Ma binni, binneeti, wall sore.
- <sup>3</sup> Éy sama Yàlla, ma woote bëccëg, wuyuwoo ;  
woote guddi, noppaloo ma.
- <sup>4</sup> Yaw de, yaay ku sell, tooge sab jal,  
Israyil di la kañ.
- <sup>5</sup> Yaw la sunuy maam wóolu woon,  
wóolu la, nga xettli léen.
- <sup>6</sup> Yaw lañu daa woo wall, muc ;  
yaw lañu wóolu woon te rusuñu.
- <sup>7</sup> Man nag aw sax rekk laa, matuma nit.  
Doom aadama sewal ma, aw xeet tuatal ma.
- <sup>8</sup> Ku ma gis ñaawal ma,  
biiñ ma, xeelu ma, naa :
- <sup>9</sup> « Na wéeroo Aji Sax ji, mu xettli ko ;  
su ko soppee, na ko wallu. »
- <sup>10</sup> Yaw de yaa ma roccee sama biiru ndey,  
naxe ma sama weenu yaay.
- <sup>11</sup> Yaw laa dénkoo ba may juddu,  
ba ma juddoo sama ndey, ngay sama Yàlla.
- <sup>12</sup> Bul ma sore,  
musiba teew na, wall amul !
- <sup>13</sup> Noon yaa ngi ma gaw ni coggalu yëkk,  
dar ma ni ponkali yëkk ya fa Basan.
- <sup>14</sup> Nu ña ma, ñàpp,  
ni gaynde, guy yëmmook a fàdde.
- <sup>15</sup> Doole ñiis,  
yax yoqi,

- fit ne soyox, seey.
- <sup>16</sup> Làmmiñ taqoo denqleñ,  
doole jeex, ma wow koñj,  
nga téral ma buntu bàmmeel.
- <sup>17</sup> Ay xaj a ma wér,  
di gàngooru saay-saay, dar ma kepp,  
bëtt samay yoxook samay tànk.
- <sup>18</sup> Maa ngii, mana waññ sama yax yépp,  
ñoom ñuy xoole, di ma seetaan,
- <sup>19</sup> di séddoo samay yére,  
di tegoo bant sama mbubb.
- <sup>20</sup> Waaye yaw, Aji Sax ji, bul sore ;  
yaa may dooleel, gaawe ma.
- <sup>21</sup> Xettlil sama bakkan ci saamar,  
ba sama benn bakkan bii mucc selli xaj !
- <sup>22</sup> Musal ma ci pàddum gaynde ak ndañum nagu àll.

Yaa ma wallu woon !

- <sup>23</sup> Ma siiwali saw tur ci bokk yi,  
màggale la digg mbooloo mi.
- <sup>24</sup> Yéen ñi ragal Aji Sax ji, santleen ko.  
Yéen askanu Yanqóoba wépp, màggal-leen ko.  
Yéen °bànni Israyil gépp, wormaal-leen ko.
- <sup>25</sup> Moom de sàgganewul boroom tiis,  
làqu ko kanamam,  
ba mu wootee, wuyu na ko.
- <sup>26</sup> Yaw laay sante ndaje mu mag,  
sottalal la samay dige<sup>f</sup>, ñi la ragal seede.
- <sup>27</sup> Ku woyof a cay lekk ba doyal,  
kuy wut Aji Sax ji, sant ko.  
« Guddleena gudd fan ! »
- <sup>28</sup> Àddina wérngal këpp ay fàttliku,  
walbatiku ci Aji Sax ji.

<sup>f</sup> **22.26 sottalal la samay dige :** dige yooyu ay saraxi cant la yu ñuy bokk lekk. Ki koy joxe mooy ñaanal ñi mu ci woo jàmm ak wér ak barke.

- Làngi xeet yépp sukkalsi ko.  
 29 Aji Sax jeey boroom nguur,  
     moo yilif xeet yi.  
 30 Boroom barke xéewlu, sujjóotal ko,  
     ku jém pax it, te bakkanam di lang,  
     di ko sukkal.  
 31 Askan wu dikkagul dina jaamu Boroom bi,  
     ñiy ñëw te juddooguñu dees na léen wax ay mbiram.  
 32 Nu dikk, biral njekkam,  
     jottli xeet wu sosoogul jalooreem.

### Sabóor 23

#### Aji Sax jee may sàmm

<sup>1</sup> *Muy kàddug Sabóor, ñeel Daawuda.*

- Aji Sax jee may sàmm :  
 du lenn lu ma ñàkk.  
 2 Parlu mu naat la may gooral,  
     wal mu dal, mu tette ma ca,  
 3 leqli ma,  
     teg ma ci yooni njekk  
     ngir teddngay turam.  
 4 Su may jaare xuru ndee wu ne këruus it,  
     duma ragal loraange :  
     yaw laak man,  
     sa bantu sàmm ak sa nguul,  
     yooyoo may dalal.  
 5 Yaa ma berndeel,  
     noon yi gis,  
     nga diwal ma saa bopp, terale ma,  
     saab kaas rembat.  
 6 Mbaax ak ngor kay la ma Aji Sax jiy dare  
     sama giiru dund,  
     ma dëkke këram ba fàww.

## Sabóor 24

Ana kuy màggal Buur Yàlla ?

<sup>1</sup> Ņeel Daawuda, di kàddug Sabóor.

Aji Sax jee moom suuf ak li ko fees,  
ak àddina ak li ci biiram.

<sup>2</sup> Moo samp suuf biir géej,  
dëj ko ci kaw wal mi.

<sup>3</sup> Ana kuy yéegi tundu Aji Sax ji,  
di taxawi bérabam bu sell ba ?

<sup>4</sup> Xanaa ku mucc ayib, sell xol,  
xemmemul caaxaani neen,  
du giñey fen.

<sup>5</sup> Kookooy jagoo barkeb Aji Sax ji,  
ak njekku Yàlla, mi koy musal.

<sup>6</sup> Ñooñooy waa làng gi lay sàkku,  
di maasug Yanqóoba, giy sàkku sa yiw.

<sup>°</sup>Selaw.

<sup>7</sup> Neleen bunt yi kulbét,  
ubbileen bunti cosaan yi,  
Buur bu mag bi duggsi.

<sup>8</sup> Buur bu mag booboo di kan ?  
Xanaa Aji Sax ji,  
Boroom dooleek njàmbaar,


Aji Sax jiy jàmbaari xare.

<sup>9</sup> Neleen bunt yi kulbét,  
ubbileen bunti cosaan yi,  
Buur bu mag bi duggsi.

<sup>10</sup> Buur bu mag booboo di kan ?  
Xanaa Aji Sax ji,  
Boroom gàangoori xare yi.

Kookooy Buur bu mag bi.

Selaw.



## Sabóor 25

Aji Sax jeey gindee, di yiire

<sup>1</sup> *Ñeel Daawuda.*

Aji Sax ji, yaw laay diis sama bakkan.

<sup>2</sup> Sama Yàlla, yaw laa yaakaar.

Yàlla buma rus,  
noon yi ree.

<sup>3</sup> Deesu la séentu, ba rus.  
Kuy wor ci neen mooy rus.

<sup>4</sup> Éy, Aji Sax ji, won ma saw yoon,  
xamal ma fi nga ma jaarloo.

<sup>5</sup> Jiitee ma sag dëgg, jängal ma.  
Yaw yaay Yàlla ji may musal,  
ma di la yendoo yaakaar.

<sup>6</sup> Aji Sax ji, bàyyil xel sa yérmandeek sa ngor.  
Naka jekk sa jikkoo !

<sup>7</sup> Bul xool li ma bàkkaare ndaw ak li ma moy.  
Aji Sax ji, xoole ma sa ngor ngir sag mbaax.

<sup>8</sup> Aji Sax jee baax, rafet i dogal,  
di gindi moykat ci yoon wi,

<sup>9</sup> di jiite ku woyof mbubb ci njubte,  
di ko xamal aw yoonam.

<sup>10</sup> Aji Sax ji ngor ak dëgg rekk lay jiitee  
kuy sàmm °kólléreem ak seedey yoonam.

<sup>11</sup> Éy Aji Sax ji, tooñ naa lool,  
jéggal ma ngir saw tur.

<sup>12</sup> Ana kuy wormaal Aji Sax ji,  
mu won ko yoon wi mata taamu,

<sup>13</sup> muy dunde ngëneel,  
askanam moom réew mi ?

<sup>14</sup> Ndéeyu Aji Sax ji,  
jagley ku ko ragal.

- Kólléreem la koy xamal.  
<sup>15</sup> Samay gët jàkk rekk ci Aji Sax ji,  
 moo may xettli ci fiiru noon.
- <sup>16</sup> Ngalla geesu ma, baaxe ma,  
 maa wéet, néew doole,  
<sup>17</sup> sama xol feesey xalaat.  
 Rikk, teggil ma njàqare !  
<sup>18</sup> Xoolal sama naqar ak sama tiis,  
 te baal ma bépp bàkkaar.  
<sup>19</sup> Xoolal noon yi ne gànññ,  
 bañ ma mbañeelu fitna.
- <sup>20</sup> Éy, aar ma, musal ma !  
 Bu ma rusloo,  
 yaw laa làqoo.  
<sup>21</sup> Yal na ma maanduteek njub taxawu,  
 maa ngii, di la xaar.  
<sup>22</sup> Éy Yalla, teggilal Israyil tiisoo tiis.

## Sabóor 26

### Ma waajal ndajem kér Aji Sax ji

<sup>1</sup> *Ñeel Daawuda.*

- Aji Sax ji, àtte ma,  
 man de maandu laa wéye,  
 Aji Sax ji laa wóolu, jenguma.  
<sup>2</sup> Aji Sax ji, nattu ma, seetlu ma,  
 seggal xel ak xol.  
<sup>3</sup> Maa ngi janook sa ngor,  
 di jéfe sa worma.  
<sup>4</sup> Toogumaak naxekat,  
 lëngooowumaak naaféq,  
<sup>5</sup> sib naa gàngooru saay-saay,  
 toogumaak ku bon.  
<sup>6</sup> Aji Sax ji, maay jàpp ci biir mucc ayib,

- di wér sa °sarxalukaay,  
 7 àddu, sant la,  
 lim sa jépp jaloore.  
 8 Aji Sax ji, maa sopp sa dëkkuwaay,  
 bëgg bérab bi sag leer teew.
- 9 Bu ma buubaaleek bàkkaarkat, sànni,  
 di ma booleek bómkat, bóm.  
 10 Seeni yoxoo nga sóobu ci mbon,  
 ndijoor ya fees ak i ger.
- 11 Man nag maandu laay wéye,  
 tee nga maa jot, baaxe ma ?  
 12 Ndokk bi ma taxawee joor gu wóor.  
 Ma màggal Aji Sax ji  
 fi ndajey way gém ñi.

### Sabóor 27

#### Xare jib, ma ànd ak Yàlla

<sup>1</sup> *Ñeel Daawuda.*

- Aji Sax jee may leeral, di ma wallu.  
 Ana ku may ragal ?  
 Aji Sax jeey aar sama bakkan.  
 Ana ku may tiit ?  
 2 Ab soxor wutsi ma,  
 nar maa yàpp,  
 noonoo ma, bañ ma ;  
 mooy térëf, félénú.  
 3 Bu gàngoor booloo sama kaw,  
 duma raf.  
 Ab xare jib,  
 ma ànd ak Yàlla.
- 4 Lenn laa ñaan Aji Sax ji,  
 lii laay sàkku :

- dëkk kér Aji Sax ji,  
 sama giiru dund,  
 di niir taaru Aji Sax ji,  
 te yéemoo kéräm.
- 5 Bésub ay, mu yiire ma mbaaram,  
 làq ma, ma làqoo xaymaam,  
 aj ma ciw doj, ma raw.
- 6 Ma doxe fa siggi,  
 tiim noon yi ma wér,  
 di sarxali fa xaymaam  
 saraxi sarxolle.  
 Naa woyal Aji Sax ji,  
 joobe ko.
- 7 Éy Aji Sax ji, déglul, ma woote !  
 Ngalla baaxe ma, nangul ma.
- 8 Yaw la sam xel ne ma, ma sàkku la,  
 te it yaw Aji Sax ji laay sàkku.
- 9 Sang bi, bu ma làqu,  
 bul mer, jañax ma.  
 Yaa ma daa wallu.  
 Bu ma wacc, bu ma ba,  
 yaay Yàlla mi may musal.
- 10 Ndey ak baay man nañu maa wacc,  
 Aji Sax ji fat ma.
- 11 Éy Aji Sax ji, joxoñ ma saw yoon,  
 jaarale ma joor gu wóor,  
 ngir ñi may tèru.
- 12 Bu ma baye bânnexu noon.  
 Seedey naaféq a ma jógál,  
 di sos fitna.
- 13 Maay dajeek ngèneelu Aji Sax ji  
 fi kaw suuf sii.  
 Lii wóor na ma.
- 14 Yaakaaral Aji Sax ji,  
 dëgërlul te am u fit,  
 te yaakaarati Ají Sax ji.

**Sabóor 28**

**Aji Sax jeey àtte ñoñam**

*<sup>1</sup>Ñeel Daawuda.*

Éy Aji Sax ji, yaw laay woo,  
di la wéeroo, bu ma tanqamlu.  
Soo nee cell,  
ma xawa tàbbim pax.

<sup>2</sup> Ngalla déglul, ma tinu la,  
woo la wall,  
dékk lay yoxo,  
jublu sa néegu biir bu sell ba.

<sup>3</sup> Bu ma sàンkaaleek ab soxor,  
di ma booleek kuy def lu bon,  
di wax moroom ma jàmm,  
te dencal ko ay ca xolam.

<sup>4</sup> Fey léen seen liggéey,  
seen kemu jëf ju bon.  
Jox léen seen aňu jëf,  
yool léen seen yelleef.

<sup>5</sup> Xooluňu Aji Sax jeek i jëfam,  
ak liggéey bi mu def.  
Da léen di yàqte,  
te dootu léen yékkati.

<sup>6</sup> Jaajëfe Aji Sax ji,  
ki ma nangul samay dagaan !

<sup>7</sup> Aji Sax jee may dooleel, di ma feg.  
Moom laa wóolu,  
mu wallu ma,  
sama xol tooy,  
ma woy, sante ko.

<sup>8</sup> Aji Sax jeey dooleel mbooloom.  
Mooy làq, di musal buur bi mu fal.

<sup>9</sup> Ngalla musalal sa mbooloo,

barkeelal sa ñoñ ñii,  
sàmm léen, boot ba fàww.

### Sabóor 29

#### Aji Sax jeey boroom ndam

<sup>1</sup> *Muy kàddug Sabóor, ñeel Daawuda.*

Yéen bindeeifi asamaan, seedeel-leen Aji Sax ji,  
seedeel-leen ko teddngaak doole,  
<sup>2</sup> seedeel-leen Aji Sax ji teddngay turam.  
Sujjóotal-leen Aji Sax ji, ki gànjaroo sellnga.

<sup>3</sup> Aji Sax jeey àddu ca kaw ndox ma,  
Yàlla mu tedd maa dënu,  
Aji Sax jeey tiim ndox, mi ne màww.

<sup>4</sup> Aji Sax jeey àddoo doole,  
Aji Sax jeey àddoo daraja.

<sup>5</sup> Aji Sax jeey àddu, falaxe garabi seedar,  
Aji Sax jee rajaxe seedari Libaŋ.

<sup>6</sup> Réewum Libaŋ, mu curpiloo ni wëllu,  
tundu Siryoŋ<sup>g</sup> it, mbete yëkk wu ndaw.

<sup>7</sup> Aji Sax jeey àddu,  
fettaxal sawara, mu boy.


<sup>8</sup> Aji Sax ji àddooti, yëngal mändinj,  
Aji Sax jee yëngal mändiju Kades.

<sup>9</sup> Aji Sax jeey àddu, kewél matu,  
garabi àll ruus,  
biir kéräm di mennum riir,  
naan : « Måggal-leen ko ! »

<sup>10</sup> Aji Sax ji la mbënn ma fekk falu,  
Aji Sax jee falu Buur ba fàww.

<sup>11</sup> Aji Sax jeey kàttanal mbooloom,  
di barkeele jàmm mbooloom.

<sup>g</sup> 29.6 tundu Siryoŋ mooy tundu Ermon ba tey.



## Sabóor 30

Mucc, bég

<sup>1</sup> *Muy woyu Sabóor, ñeel Daawuda ca ubbiteg kör Yàlla ga<sup>h</sup>.*

<sup>2</sup> Aji Sax ji, dama lay kañ.

Yaa ma yékkati,  
ba noon reetaanu ma.

<sup>3</sup> Aji Sax ji sama Yàlla, maa la woo wall,  
nga faj ma.

<sup>4</sup> Aji Sax ji, yaa ma jukkee njaniiw,  
may ma bakkan, ma tàggook ñiy tàbbi njaniiw.

<sup>5</sup> Yéen aji gëm ñi, woyleen Aji Sax ji,  
njukkale ko sellngaam.

<sup>6</sup> Meram di lu gàtt,  
aw yiwan sax dàkk.  
Rongooñ gane, fanaan,  
ay ree xëysi.

<sup>7</sup> Man damaa baaxle woon, ba ne :  
« Deesu ma rëññeel mukk. »

<sup>8</sup> Aji Sax ji, booba yaa ma baaxe,  
dëj ma, ma ne kekk niw tund.  
Nga fuuyu, ma jàq.

<sup>9</sup> Aji Sax ji, yaw laa woo wall ;  
Boroom bi, yaw laa ñaan u yiw,  
<sup>10</sup> ne la : « Ma dee, tàbbi bàmmeel,  
ana lu mu lay jariñ ?  
Nu la pëndu pax di sante,  
bay biral sa worma ?

<sup>11</sup> Aji Sax ji, déglul, baaxe ma ;  
éy Aji Sax ji, dimbali ma. »

**h 30.1** Woyu Sabóor wii Daawuda da koy sante Yàlla gannaaw mbas  
ma, ba mu jëndee dàggga ngir rendi fa sarax su dakkal mbas ma.  
Dàggga jooju lañu mujj tabax màggalukaay ba. Seetal ci 2. Samiyel 24,  
ak 1. Jaar-jaar ya 21.

- 12 Yaa ma soppil samay rongooñ ay ree,  
summi sama yérey tiis, solal ma bânnex.  
13 Naa la woye xol, baña selaw.  
Aji Sax ji, sama Yàlla, ma sant la ba fàww !

### Sabóor 31

Naa siggi, noon sägg

*1 Mu jëm ci njíital jàngkat yi, di kàddug Sabóor, ñeel Daawuda.*

- 2 Aji Sax ji, yaw laa làqoo,  
yàlla buma rus mukk.  
Yiwee ma sa njekk.  
3 Teewlu ma,  
gaawe ma,  
may ma, ma sës ci yaw, fegu.  
Aar ma, ma mucc.  
4 Yaa may yiir, di ma aar,  
jiite ma, wommat ma ngir yaw.  
5 Génne ma fir gi ñu may têroo ;  
yaw yaa di sama rawtu.  
6 Yaw laa dénk sama bakkán.  
Aji Sax ji, Yàlla miy dëgg, ngalla jot ma.  
  
7 Maa bañ kuy topp tuuri neen.  
Man, Aji Sax ji laa wóolu.  
8 Damay bég, di bânnexoo sa ngor,  
li nga xoole samaw tiis.  
Ràññee nga sama njàqarey xol.  
9 Wacoo ma ci loxol noon,  
danga maa taxawal fu ma yaatoo.  
  
10 Éy Aji Sax ji, baaxe ma, jàq naa !  
Samay gët a ngi giim ndax u tiis,  
xol jeex, yaram jeex.  
11 Naqar a ngi may rey,  
tiis di wàññi samay fan,

- sama doole ñjis ndax sama njubadi,  
samay yax semm.
- <sup>12</sup> Noonoo noon a ma sewal,  
dëkkandoo waxi noppi,  
xame séexlu ma,  
ku ma gis biti, di ma daw.
- <sup>13</sup> Kenn xalaatu ma, xanaa fàtte ma ni ku dee,  
ma mel ni ndab lu yàqu.
- <sup>14</sup> Damaa dégg jëw yu bare,  
lu raglu dar ma kepp.  
Ñu ngi mèankoo, di ma fexeel,  
di wut sama bakkan.
- <sup>15</sup> Man nag Aji Sax ji, ci yaw laa dénku.  
Ma ne : « Yaay sama Yàlla. »
- <sup>16</sup> Yaa yor sama àpp.  
Xettli maak ku ma noonoo  
ak ku may sonal.
- <sup>17</sup> Leeralal ma sa kanam, Sang bi,  
walloo ma sa ngor.
- <sup>18</sup> Éy Aji Sax ji, woo naa la wall,  
yàlla buma rus.  
Yal na ku bon rus,  
ne xerem biir njaniiw.
- <sup>19</sup> Yal nanga tèj gémmiñu fenkat  
buy wax aji jub waxi reewande,  
di réy-réylook a xeebaate.
- <sup>20</sup> Yàlla yaa yaa ngëneel  
loo dencal ku la ragal,  
defal ko ku la làqoo,  
doom aadama seede.
- <sup>21</sup> Yaa koy làq fa nga làqu,  
fa pexey nit àggul.  
Nga yiir ko, mu yiiru  
ci ayu làmmiñ.

- <sup>22</sup> Teddnga ñeel na Aji Sax ji !  
Ndaw kéemtaan ci ngor li mu ma jiwe  
biir dëkk bu ñu gaw.
- <sup>23</sup> Man nag saalitoon naa ne :  
« Yàlla dagg na ma, sànni ! »  
Ndeke ba ma lay woo,  
dégg nga samay dagaan.
- <sup>24</sup> Képp kuy aji gëm, soppal Aji Sax ji.  
Aji Sax jeey sàmm ku ko gëm,  
di yool, ba wis kuy réy-réylu.
- <sup>25</sup> Képp ku yaakaar Aji Sax ji,  
dégérlul te am u fit.

### Sabóor 32

#### Njéggal barke la

<sup>1</sup> *Dib taalif, ñeel Daawuda.*

- Ndokkleee yaw mi ñu baal bákkaar,  
jéggal la ag moy.
- <sup>2</sup> Ndokkleee yaw mi Aji Sax ji toppul ag tooñ,  
te amoo xelum njublañ it.
- <sup>3</sup> Ba ma nee cell,  
damaa ràgg,  
dékke naqar.
- <sup>4</sup> Guddeek bëccëg  
sa loxo diis gann ci man.  
Sama doole ñiis  
ni ndox mu jaas upp.
- <sup>5</sup> Ma xamal la ne moy naa,  
làqatuma la sama ñaawteef.  
Ma ne :  
« Naa àgge Aji Sax ji sama bákkaar. »  
Yaw nga baal ma peyug tooñ.

<sup>°</sup>*Selaw.*

*Selaw.*

<sup>6</sup> Nii, kuy aji gëm, na la ni ñaane,  
ba ñaan jotee.

Mbënn mu baawaan, di wal sax,  
du ko laal fenn.

<sup>7</sup> Yaw laay làqoo,  
nga di ma aar ciw ay,  
may ma ñu ma yéew, di ko bége.

*Selaw.*

<sup>8</sup> Nga ne ma : « Dama laa xelal,  
xamal la fi ngay jaar,  
digal la, di la xool.

<sup>9</sup> Buleen mel ni fas mbaa berkelle  
mi amul ag dégg,  
laab ak tarka di ko téye,  
mu doora yem fi seen wet. »

<sup>10</sup> Ku bon barew tiis.

Ku wóolu Aji Sax ji,  
mu yiire la ngoram.

<sup>11</sup> Yaw aji jub ji, bégal te bànnexoo Aji Sax ji.  
Képp kuy def njub, sarxolleel !

### Sabóor 33

#### Nan woy Boroom bi nu sàkk

<sup>1</sup> Yéen aji jub ñi, sarxolleen ci Aji Sax ji ;  
kuy jubal, màggal war na la.


<sup>2</sup> Xalamleen, sante Aji Sax ji,  
xalamal-leen ko xalamu fukki buum.

<sup>3</sup> Fental-leen ko woy,  
xalam, mu neex, sarxolle jib.

<sup>4</sup> Aji Sax jee jub kàddu.  
Mooy jéfe lépp kóllére.

<sup>5</sup> Moo sopp dëgg ak yoon.  
Aji Sax ji, ngoram a fees àaddina.

- 6 Kàddug Aji Sax ji la asamaan sosoo,  
     ci baatam la gàngoori asamaan yépp sàkkoo.  
 7 Moo boole ndoxi géej, jal,  
     yeb xóotey géej ciy mbànd.  
 8 Yéen waa àddina sépp, ragal-leen Aji Sax ji ;  
     yéen àddina wérngal këpp, wormaal-leen ko.  
 9 Moo àddu, mu am ;  
     santaane, mu sotti.  
 10 Aji Sax jeey neenal li xeet yiy fexe,  
     di gàntal li mbooloo yiy mébét ;  
 11 Aji Sax ji nas, mu àntu ba fàww,  
     mu mébét, mu sottil maasoo maas.  
 12 Ndokklee yéen xeet wi Aji Sax ji di seen Yàlla,  
     yéen mbooloo mi Aji Sax ji séddoo.  
 13 Asamaan la Aji Sax jiy jéere,  
     di gis doom aadama yépp.  
 14 Jal ba mu tooge  
     lay niire waa àddina sépp.  
 15 Moo tabax seen xol, ñoom ñépp ;  
     lu ñu def, xam na ko.  
 16 Mbooloo mu réy mayul Buur ndam,  
     doole ju bare walluwul jàmbar.  
 17 Yaakaar aw fas nax sa bopp la,  
     kàttanu fas du wall.  
 18 Ma ne, Aji Sax jee naa jàkk ku ko ragal  
     tey wéeroo ngoram.  
 19 Day jot bakkanam,  
     di ko dundal cib xiif.  
  
 20 Nu ngi séentu Aji Sax ji,  
     moo nuy taxawu, di nu feg.  
 21 Ci moom la sunu xol di sedde,  
     turam wu sell lanu wóolu.  
 22 Aji Sax ji, ngalla baaxe nu sa ngor,  
     moom lanu yaakaar fi yaw.



### Sabóor 34

Aji Sax ji du tanqamlu aji jub

<sup>1</sup> *Ñeel Daawuda. Mooy ba muy wayadi-wayadilu ca kanam Abimeleg, ba Abimeleg dàq ko, mu dem<sup>i</sup>.*

<sup>2</sup> Naa màggal Aji Sax ji saa su ne,  
di ko sant fu ma toll.

<sup>3</sup> Aji Sax ji laay sagoo,  
néew-ji-doole dégg, bég.

<sup>4</sup> Kañleen Aji Sax ji, ànd ak man,  
nu bokk wormaal turam.

<sup>5</sup> Maa sàkku Aji Sax ji, mu nangul ma,  
tàggale maak lépp lu ma ragal.

<sup>6</sup> Ku yaakaar Aji Sax ji bég, leer nàññ,  
gàcce du ko sèlém.

<sup>7</sup> Néew-ji-doole woote, Aji Sax ji wuyu,  
musal ko fu mu jàqe.

<sup>8</sup> Ku ragal Aji Sax ji, malaakaam yiir la,  
di la wallu.

<sup>9</sup> Mosleen, xam ne Aji Sax jee baax,  
ndokkleeyaw mi ko làqoo.

<sup>10</sup> Ragal-leen Aji Sax ji, yéen nitam ñu sell ñi ;  
ku ko ragal doo ñàkk dara.

<sup>11</sup> Gaynde man na ndóol, xiif,  
nit sàkku Aji Sax ji, ñàkkkul lenn lu baax.

<sup>12</sup> Dikkal doom, déglu ma,  
ma jàngal la ragal Aji Sax ji.

<sup>13</sup> Ana ku dund neex,  
mu bëgga gudd fan, ba gis ngëneel ?

<sup>14</sup> Na làmmiñam daw lu aay,  
daw i fen.

<sup>i</sup> 34.1 Seetal ci 1. Samiyel 21.10-15. Akis buuru Gaat mooy Abimeleg ba tey.

- <sup>15</sup> Na dëddu mbon, jëfe mbaax,  
sàkku jàmm, saxoo ko.
- <sup>16</sup> Aji Sax jaa ngi ne jàkk aji jub,  
di teewlu wooteem.
- <sup>17</sup> Aji Sax jeey rëbb kuy jëfe mbon,  
ngir dagge ko kaw suuf, far turam.
- <sup>18</sup> Ku jub yuuxu, Aji Sax ji dégg,  
fu mu jàqe, mu musal ko.
- <sup>19</sup> Sa yaakaar tas, Aji Sax ji jege la,  
sa xol jeex, Aji Sax ji wallu la.
- <sup>20</sup> Musiba bare naa dal ku jub,  
Aji Sax ji musal ko ci lépp,
- <sup>21</sup> di ko sàmm,  
ba benn yaxam du damm.
- <sup>22</sup> Musiba nag day rey ku bon,  
te ku bañ aji jub, yoon dab na la.
- <sup>23</sup> Aji Sax jeey jot ab jaamam,  
képp ku ko làqoo, yoon du la dab.

### Sabóor 35

Aji Sax ji, àtte maak noon

<sup>1</sup> *Ñeel Daawuda.*

- Éy Aji Sax ji, digaaleel ak samay digaale,  
xeexal maak ñi may xeex.
- <sup>2</sup> Fëkkal sa pakk ak sa kiiraay,  
taxawusi ma,
- <sup>3</sup> xàcci sa xeej ak sa sémmiñ, dajeek ñi may dàq.  
Déey ma, ne ma : « Sag mucc, man a. »
- <sup>4</sup> Niy wut sama bakkan, yal nañu rus ba torox ;  
ñi may fexee lor, yal nañu léen waññi, sewal léen.
- <sup>5</sup> Yal na léen malaakam Aji Sax ji bëmëx,  
nim ñax mu ngelaw wal.
- <sup>6</sup> Yal na léen malaakam Aji Sax ji dàq,  
ñuy lëndëmtuy tarxiis.

- <sup>7</sup> Defuma dara, ñu di ma fiir,  
defuma dara, ñu gas um yeer, di ma têru.
- <sup>8</sup> Yal nañu sànkoo mbetteel,  
keppoo seen fiir,  
sànkoo seen um yeer.
- <sup>9</sup> Su boobaa ma bége Aji Sax ji,  
bànneexoo wallam,
- <sup>10</sup> di ko sante sama jëmm jépp,  
naan : « Éy Aji Sax ji, ana ku mel ni yaw,  
di xetcli néew-ji-doole ci boroom doole,  
ak ku néewleek ku ñàkk ca ka léen di lekk ? »
- <sup>11</sup> Nit ku bon a ngi may duural,  
di ma jiiñ lu ma yégul.
- <sup>12</sup> Ma ji léen njekk, ñu fey ma njekkar,  
ndaw tiisu xol !
- <sup>13</sup> Man de ba ñu woppee, maa ngi ñaawlu,  
di woor, toroxloo,  
sukk, ñaanal léen,
- <sup>14</sup> tiisoo léen ni saab xarit mbaa doomu ndey,  
di ñaawlook a yoggoorlu ni ku ñàkk yaay.
- <sup>15</sup> Ma daanu tey, ñu daje di ko bége,  
dajaloo fi sama kaw,  
di ma fexeel te yéguma,  
di ma yàpp, tëë ba.
- <sup>16</sup> Tekkiwuñu dara, di ma ñaawal rekk  
te di ma màttu.
- <sup>17</sup> Éy Aji Sax ji, loo deeti seetaan ?  
Musal ma ci seen um pàdd,  
wallu ma ci yii gaynde,  
sàmmal ma sama benn bakkan bii !
- <sup>18</sup> Maa lay sante fa ndaje yaatoo,  
màggal la digg mbooloo mu yaa.
- <sup>19</sup> Noon bu ma deful dara, yàlla bumu gis  
lu mu ma damoo.

- Ku ma bañ ci dara, yàlla bumu ma ree.
- <sup>20</sup> Waxuñu jàmm,  
xanaa di ràbbal niti jàmm ci réew mi  
ay kàdduy tuuma.
- <sup>21</sup> Nu ngi ma ña njàpp, di ma tuumaal,  
naan : « Yaw a, yaw a, noo la gis ! »
- <sup>22</sup> Éy Aji Sax ji, yaa ci gis, bul seleŋlu,  
éy Boroom bi, bul ma sore.
- <sup>23</sup> Jógal, sàmmal ma sama àq.  
Sama Yàlla, Boroom bi, àtte ma yoon.
- <sup>24</sup> Aji Sax ji sama Yàlla, àttee ma sa dëgg,  
ñu bañ maa ree !
- <sup>25</sup> Yàlla buñu ne : « Ñaw ! Lii rekk lanu bëggoon. »  
Yàlla buñu ne : « Sàkkal nanu ko pexe. »
- <sup>26</sup> Ku bége sama njàqare,  
yal nanga rus, ba torox.  
Kuy réy-réylu ci sama kaw,  
yal nanga am gàcce, ne yàcc.
- <sup>27</sup> Ku bége sama der bu set,  
yal nanga bànnexu, di sarxolle,  
foo toll di biral naan :  
« Aji Sax jee màgg !  
moom miy bége jàmmi jaamam. »
- <sup>28</sup> Man it ma tudd sa njekk,  
di la dëkke màggal !

### Sabóor 36

Nit ñaaw, Aji Sax ji gore

<sup>1</sup> Mu jëm ci njiital jàngkat yi, ñeel Daawuda jaamub Aji Sax ji.

<sup>2</sup> Kàddug tooñ ga ku bon wax mu ngi sama xel mi.  
Mu ne : « Ana lu may ragal ci Yàlla ? »

<sup>3</sup> Day gis boppam, naagu,  
ba du gis sikkam, sib ko.

- <sup>4</sup> Ay waxam coxor ak i fen,  
jéfeetul lu rafet ak lu baax.
- <sup>5</sup> Day mébét lu ñaaw cib lalam,  
taxawe yoon wu dëddu mbaax,  
te du bañ lu bon.
- <sup>6</sup> Céy Aji Sax ji, gore nga ba kaw asamaan,  
dëggú ba kawli kaw.
- <sup>7</sup> Sa njekk a tiim tund yu mag yi,  
sa àtte ne xéew ni xóotey géej.  
Céy Aji Sax ji, nit ak mala, nga boole sàmm !
- <sup>8</sup> Céy Yàlla, yaa wéet ngor,  
doom aadama yiiroo sa ker, yiiru ;
- <sup>9</sup> yaflloo sa njél lu duun,  
sa xéewal wal, nga nàndale ko.
- <sup>10</sup> Ci yaw la dund di balle,  
te sag leer lanuy leerloo.
- <sup>11</sup> Jotaleel sa ngor ku la xam,  
jotale sa njekk kuy nas njub.
- <sup>12</sup> Yàlla bu ma ku reew teg tànk ;  
loxo ku bon, yàlla bumu ma taxa daw.
- <sup>13</sup> Defkati mbon yaa ngii, daanu,  
ne lareet, téllee jóg.

### Sabóor 37

#### Bu sa xol jóg

<sup>1</sup> *Ñeel Daawuda.*

- Bu sa xol jóg ci ku bon,  
bul ñee kuy def njombe.
- <sup>2</sup> Léegi mu wow nim ñax,  
lax ni gàncax.
- <sup>3</sup> Dénkul ci Aji Sax ji, di def lu baax,  
ba des ci réew meek jàmm.

- <sup>4</sup> Deel bànnexoo Aji Sax ji,  
mu may la say nammeel.
- <sup>5</sup> Jébbalul ci Aji Sax ji,  
dénku ci moom, mooy sottal.
- <sup>6</sup> Day setal sab der ni jant bu fenk ;  
sab àtte ne ràññ ni njolloor.
- <sup>7</sup> Neel tekk, xaar Aji Sax ji,  
yaakaar ko.  
Bu sa xol jóg ci kuy baaxle,  
tey lal i pexe.
- <sup>8</sup> Baal mer, dëddu xadar.  
Xol bu jóg, loraangey neen.
- <sup>9</sup> Ku bon, ñu dagg, sànni ;  
ku yaakaar Aji Sax ji, jagoo réew mi.
- <sup>10</sup> Nes tuut, ku bon ne mes,  
nga seet, seet, mu réer.
- <sup>11</sup> Waaye néew dooleey jagoo réew mi ;  
jàmm ne ñoy, ñu bége.
- <sup>12</sup> Ku bon fexeel ku jub,  
di ko màttu,
- <sup>13</sup> Buur Yàlla di ko ree,  
xam ne bésam a ngi ñëw.
- <sup>14</sup> Ku bon bocci saamar,  
tàwwig fitt,  
nara rey ku ñàkk, néewle,  
nara bóom kuy jubal ;
- <sup>15</sup> far jam boppam saamaru xol,  
fittam damm.
- <sup>16</sup> Aji jub, as tuutam  
moo gën koomu ku bon.

- <sup>17</sup> Ku bon kat, sa doole dëddu la ;  
ku jub, Aji Sax ji wallu la.
- <sup>18</sup> Ku maandu, Aji Sax ji yég la,  
sab cér sax.
- <sup>19</sup> Bu mettee doo rus,  
te bésub xiif dangay regg.
- <sup>20</sup> Ku bon sàndu ;  
noonu Aji Sax ji, taaru tool bu naat la,  
bu tàkkee, jeex tàkk.
- <sup>21</sup> Ku bon leb, du fey ;  
ku jub yéwén, di joxe.
- <sup>22</sup> Aji Sax ji barkeel la, nga jagoo réew mi moos ;  
mu alag la, nga dog.
- <sup>23</sup> Aji Sax jeey sopp saw yoon,  
jiite say jéego.
- <sup>24</sup> Soo térëfee it, doo daanu.  
Aji Sax jee lay walloo loxoom.
- <sup>25</sup> Ba may ndaw, ba tey may mag,  
gisuma ku jub ñàkk ndimbal,  
mbaa askanam di dunde yalwaan.
- <sup>26</sup> Day saxoo tabe, di leble,  
askanam barkeel.
- <sup>27</sup> Dëddul mbon, di jéfe mbaax,  
ba dëkke réew mi fàww.
- <sup>28</sup> Aji Sax ji kat daa sopp yoon,  
te du wacc jaamam bu gore.
- Day fegu ba fàww,  
askanu ku bon dog.
- <sup>29</sup> Aji jub ay jagoo réew mi,  
dëkke ko ba fàww.

- <sup>30</sup> Kàddug aji jub day xelu,  
wax ja jub ;  
<sup>31</sup> yoonu Yàllaam a nga ca xol ba,  
du dox ba tèrèf.
- <sup>32</sup> Ku bon a ngi yeeru ku jub,  
di ko wuta bòom.  
<sup>33</sup> Waaye Aji Sax ji du ko bàyyeek moom,  
te deesu ko daan cib layoo.
- <sup>34</sup> Yaakaaral Aji Sax ji, sàmm yoonam,  
mu teral la, nga jagoo réew mi,  
ku bon sàñku, ngay gis.
- <sup>35</sup> Damaa gis ku bon di note,  
te sëq ni garab gu naat fa mu fekk baax,  
<sup>36</sup> ma jaareeti fa, ndeke wuute na,  
ma seet ko, gisuma ko.
- <sup>37</sup> Bàyyl xel ku maandu, xool ku jub ;  
muj, fa nitu jàmm.  
<sup>38</sup> Moykat yeey sàñkoondoo,  
ku bon amul muj.
- <sup>39</sup> Aji Sax jeey musal ku jub,  
di ko aar bésub njàqare.  
<sup>40</sup> Aji Sax jee koy taxawu, wallu ko,  
wallu ko ci ku bon, musal ko,  
ndax li mu ko làqoo.

### Sabóor 38

Maa wopp, tuub, di jooy

<sup>1</sup> *Muy kàddug Sabóor guy fàttlee, ñeel Daawuda.*

<sup>2</sup> Éy Aji Sax ji, bul mer, di ma rëbb ;  
bul xadaru, di ma mbugal.

- <sup>3</sup> Aji Sax ji, fitt nga maa fitt,  
dóor nga ma.
- <sup>4</sup> Danga maa mere, ma wéradi ;  
maa bàkkaar, ba jagadi.
- <sup>5</sup> Samay ñaawteef mëdd ma,  
diisa diis, ba àttanuma ko.
- <sup>6</sup> Maa def ug ndof,  
ba am dana yu bédd, ba xasaw.
- <sup>7</sup> Maa ngi sëgg, ne yàcc, ne yasar,  
di wéye tiis,
- <sup>8</sup> yaram tàng, di bax,  
ma wéradi, ne lacc.
- <sup>9</sup> Sama yaram dee goyy, ma ne lasar,  
jàq, di binni.
- <sup>10</sup> Boroom bi, yaa ngi ne jäkk ci samay nammeel,  
samay onk umpu la.
- <sup>11</sup> Sama fit a ngi tëf-tëfi, doole ñiis,  
gët giim.
- <sup>12</sup> Xarit ak dëkkandoo di ma daw,  
mbokk dànd ma.
- <sup>13</sup> Ni may wuta rey a ngi may fiir,  
di ma jéema lor, di ma waxal musiba,  
yendu maa lalal pexe.
- <sup>14</sup> Man, ma mel nib tëx, dégguma,  
mel ni luu, àdduwma,
- <sup>15</sup> di saf ku dul dégg,  
bay layoo.
- <sup>16</sup> Aji Sax ji, yaw laa yaakaar ;  
Boroom bi, sama Yàlla, yaa may nangul.
- <sup>17</sup> Ma ne, ngalla buñu ma ree,  
di damoo samab jéll.
- <sup>18</sup> Maa ngii di waaja daanu,  
dëkke metit.
- <sup>19</sup> Ma ne, aylayéwén def naa lu ñaaw,  
sama bàkkaar tiital na ma.
- <sup>20</sup> Noon yaa ngi ne jonn ak seen doole,

- bare na ñu ma bañ ci neen.  
 21 Ma ji léen njekk, ñu fey ma njekkar ;  
     may sàkku lu baax, ñu di ma sikk.  
 22 Éy Aji Sax ji sama Yàlla, bu ma wacc,  
     bu ma sore.  
 23 Ngalla gaawe ma ;  
     Boroom bi, yaa may musal.

### Sabóor 39

#### Dund yàggul

*1 Mu jëm ci Yedutun, njíital jàngkat yi, di  
     kàddug Sabóor, ñeel Daawuda.*

- 2 Dama noon : « Damay moyu ba duma moye làmmiñ. »  
     Li feek ku bon di teew,  
     may ɻalaab sama gémmiñ.  
 3 Dama noon cell, ne patt,  
     noppi, ba mu èpp ;  
     sama njàqare yokku,  
 4 sama xol diis,  
     xel di xelaat, xol diis gann ;  
     ma mujj àddu,  
 5 ne : « Éy Aji Sax ji, xamal ma sama muj  
     ak sama àppi fan,  
     ma xam ni sama dund gàtte.  
 6 Yaatuwaayu loxo nga ma àppal ciy fan,  
     sama giiru dund du dara fi yaw.  
     Képp ku taxaw di còolóolu neen.
- °Selaw.*
- 7 Nit du lu moy takkndeer buy dem,  
     còolóolu neen lay kér-kéri.  
     Nit a ngi dajale, xamul kuy for.
- 8 « Éy Boroom bi, lu may xaarati ?  
     Sama yaakaar yaw a.
- 9 Musal ma ci sama mbugali tooñoo tooñ,  
     bu ma bàyyi, dof di ma reetaan !

- <sup>10</sup> Noppi naa, dootuma wax,  
yaw yaa dogal lii.  
<sup>11</sup> Waaye ngalla teggil sab yar,  
sa diisaayu loxoo ngi may jekkali.  
<sup>12</sup> Yaay mbugal ku bâkkaar, yar ko,  
ronq ni max la mu gëna fonk.  
Nitoo nit, cöolóolu neen.  
<sup>13</sup> Éy Aji Sax ji, déglul, ma ñaan la,  
teewlul, ma woo la wall ;  
bul tanqamlu sama yuux,  
doxandéem donjy laa fi yaw,  
di gan ni maam yépp.  
<sup>14</sup> Ngalla xiddi ma, ma muuñ,  
bala maa dëddu, réer. »

Selaw.

**Sabóor 40****Déggal Aji Sax jee am solo**

- <sup>1</sup> Mu jëm ci njíital jàngkat yi, ñeel Daawuda, di kàddug Sabóor.  
<sup>2</sup> May xaara xaar Aji Sax ji,  
mu dégg may woote, geesu ma,  
<sup>3</sup> génnee ma ca kàmbug sànkute,  
sippee ma ca xóotey ban ba,  
cëppe ma ciw doj,  
samp ma, ma dëgér.  
<sup>4</sup> Moo ma may, ma fent,  
woy wu ma woye sunu Yàlla.  
Nu baree seede, di wormaal  
ak a dénku ci Aji Sax ji.  
<sup>5</sup> Ndokkle, yaw mi dénku ci Aji Sax ji,  
te sàkkwoo ku bew  
ak kuy topp i fen.  
<sup>6</sup> Yaw Aji Sax ji sama Yàlla, bare nga loo def,  
amuloo moroom !  
Bare nga kéemaan ak i mébét yoo nu sottalal,

- ma bëgga xamle lépp,  
te mu bare ba weesu lim.
- <sup>7</sup> Taamuwluloo saraxi gàtt mbaa pepp,  
sàkkuwluloo °sarax buy lakk ba jeex,  
ak °saraxu pótum bàkkaar.  
Danga maa bënnal i nopp.
- <sup>8</sup> Ma ne : « Maa ngi,  
téereb yoon wi indi na li ñu bind ci man.
- <sup>9</sup> Sama Yàlla, maa soppa def sa coobare,  
sa ndigali yoon a ngi sama biir xol bi. »
- <sup>10</sup> Siiwal naa sag njekk ca ndaje mu mag ma.  
Dama ne, Aji Sax ji duma nopp, xam nga ko.
- <sup>11</sup> Làquma sag njekk, ne cell ak moom.  
Yaa wóor, di walloo, siiwal naa ko.  
Làquma ndaje mu mag ma sa ngor ak sa worma.
- <sup>12</sup> Éy Aji Sax ji, bu ma xañ sa yérmande.  
Sa ngor ak sa worma,  
yal na ma feg ba fàww.
- <sup>13</sup> Ay musibaa ma tanc,  
ne gànñ, ba weesu lim.  
Samay ñaawteef a ma dab, ba gisatuma,  
baree bare, ba èpp sama kawari bopp ;  
sama xol jeex tàkk.
- <sup>14</sup> Éy Aji Sax ji, yal na la neex, nga wallu ma !  
Éy Aji Sax ji, gaawe ma !
- <sup>15</sup> Képp kuy wuta fëkk sama bakkan,  
yal na rus, torox ne tott.  
Kuy bége sama loraange,  
yal nañu ko duma, mu ne yàcc.
- <sup>16</sup> Ku may ñaawal,  
yal nañu ko torxal, mu jommi.
- <sup>17</sup> Képp ku lay sàkku,  
yal na bég, di la bànnexoo.  
Képp ku safoo sag wall,

yal na jàppoo : « Aji Sax ji màgg na ! »

- <sup>18</sup> Man, néew naa doole, ñàkk naa,  
waaye yaw Aji Sax ji, danga maa yég.  
Yaw yaa may wallu, xettli ma ;  
sama Yàlla, bu ma yeexe.

### Sabóor 41

Jarag bu ñu tojal a ngi ñaan

<sup>1</sup> Mu jëm ci njiital jàngkat yi, di kàddug Sabóor,  
ñeel Daawuda.

<sup>2</sup> Ndokklee yaw mi yég néew-ji-doole.

Aji Sax jee lay xettli, bésub njàqare.

<sup>3</sup> Aji Sax jee lay aar, di sàmm sa bakkan,  
nga jagoo barke ci réew mi,  
te du la bàyyi noon def la lu ko neex.

<sup>4</sup> Aji Sax jee lay dooleel soo woppee,  
di soppi bu baax sa téraay.

<sup>5</sup> Dama ne : « Aji Sax ji, tooñ naa la ;  
baaxe ma, faj ma. »

<sup>6</sup> Noon yaa ngi may yéene lu bon,  
naan : « Xanaa kii du dee, ba ñu fàtte ko ? »

<sup>7</sup> Ku dikk, di ma seet, di jinigal  
tey fent i sos ci xolam,  
bu génnee, tasaare ko.

<sup>8</sup> Bañ yépp a ngi may déeyoo,  
di ma fexeel lu bon,

<sup>9</sup> naan : « Musiba dal na ko, du jógati ! »

<sup>10</sup> Sama am-di-jàmm bu ma wóolu sax jógal na ma,  
te daan lekk samaw ñam.

<sup>11</sup> Waaye ngalla Aji Sax ji, baaxe ma,  
yékkati ma, ma fey léen.

<sup>12</sup> Su noon damuwul ci sama kaw,  
ma doora xam ne bége nga ma.

<sup>13</sup> Man, damaa maandu, nga taxawu ma,  
dëj ma fi sa kanam, ba fàww.

<sup>14</sup> Cant ñeel na Aji Sax ji, Yàllay Israyil.  
Moo masa yelloo cant, ba fàww.  
Amiin, Amiin.

## Sabóor 42

### Maa namm Yàlla

<sup>1</sup> *Mu jém ci njíital jàngkat yi, di taalif  
bu ñeel askanu Kore wú góor.*

<sup>2</sup> Yaw Yàlla, maa lay sàkkoo xol,  
ni kewél di sàkkoo walum ndox.

<sup>3</sup> Maa mar Yàlla,  
Yàlla jiy dund !  
Kañ laay teewi fa kanam Yàlla ?

<sup>4</sup> Rongooñ laay dunde  
guddeek bëccëg,  
noon yi di ma dëkke naa :  
« Ana sa Yàlla ji ? »

<sup>5</sup> Lii laay fàttliku, sama xol jeex :  
dama daan jàll, jiite mbooloo ma,  
jém kér Yàlla ga, di sarxolleek a sant,  
ñu booloo di màggal.

<sup>6</sup> Moo man, lu may yoggaaral nii ?  
Lu may jàq ?  
Naa yaakaar Yàlla,  
ba dellu sante sama Yàlla wallam.

<sup>7</sup> Maa ngi ne yogg,  
ba di la fàttlikoo fa réewum Yurdan  
ak tundi Ermon ak Misar.

<sup>8</sup> Sa wal ya sotti, xóote awu moroom ma ;  
sa gannax yépp jalu, mëdd ma.

<sup>9</sup> Bëccëg Aji Sax ji baaxe ma ngoram,

- guddi ma fanaane koo woy,  
di ñaan Yàlla mi may dundal.
- <sup>10</sup> Naa wax Yàlla ji ma sës, ne ko :  
« Lu tax nga fàtte ma,  
noon di ma fitnaal,  
may wéye tiis ? »
- <sup>11</sup> Noon yaa ngi may ñaawal,  
di ma yendoo naa :  
« Ana sa Yàlla ji ? »  
Ma ne yàcc, ne yasar.
- <sup>12</sup> Moo man, lu may yoggaaral nii ?  
Lu may jàq ?  
Naa yaakaar Yàlla,  
ba dellu sante sama Yàlla wallam.

### Sabóor 43

#### Éy Yàlla, àtte ma

- <sup>1</sup> Éy Yàlla, àtte ma,  
layool maak xeet wu gorewul,  
xettli maak ku njublaŋ te dëng.
- <sup>2</sup> Yaw Yàlla kat yaay sama rawtu.  
Lu tax nga wacc ma,  
may wéye tiis,  
ci noteelu noon ?
- <sup>3</sup> Ngalla yónneel sag leer ak sa dëgg,  
yal na ma yooyu jiite,  
yóbbu ma sa tund wu sell,  
sa dëkkuwaay ba.
- <sup>4</sup> Kon Yàlla, naa àgg sa °sarxalukaay ;  
yaw Yàlla, yaay sama mbégte, di sama bànnex.  
Yaw Yàlla, sama Yàlla,  
naa la màggale xalam.
- <sup>5</sup> Moo man, lu may xàddi, ne yogg ?  
Lu may jàq nii ?  
Tee maa yaakaar Yàlla, ba santati ko,  
moom sama Yàlla mi may wallu ?

## Sabóor 44

Xeet waa ngi jooy

*1 Mu jëm ci njiital jàngkat yi, di taalif  
bu ñeel askanu Kore wu góor.*

*2 Éy Yàlla, noo déggal sunu bopp,  
sunuy maam a nu wax  
jéf ja nga jéf, ca seeni jant,  
bu yàgga yàgg.*

*3 Yaw ci sa bopp yaa dàq xeet yi,  
jémbat fa maam ya ;  
yaa mbugal xeet yi,  
ñoom, nga yiwi léen.*

*4 Du seen saamar lañu nangoo réew mi moos,  
seen dooley bopp it mayu léen ndam.  
Yaa ko defe kàttan ak doole,  
geesoo léen sa leeru kanam,  
ngir sa cofeel.*

*5 Yaay kiy sama buur, di sama Yàlla,  
mayal askanu Yanqóoba ay ndam.*

*6 Yaw lanuy dàqe bañ yi,  
sa tur lanuy dëggaatee ñi nu song.*

*7 Du fitt laa wóolu,  
du saamar a may may ndam.*

*8 Yaa nuy musal ci bañ yi,  
yaay gácceel noon ñi.*

*9 Yàlla lanuy damoo bésoo bés,  
di màggal turam ba fàww.*

*°Selaw.*

*10 Waaye danga noo wacc,  
torxal nu,  
ba àndulook sunu mboolooy xare.*

*11 Waññi nga nu, nu won noon yi gannaaw,  
ñu bañ nu, ba futti nu.*

*12 Joxe nga nu, ni gàtt yu ñuy yàpp,*

- tasaare nu ci biir xeet yi.
- <sup>13</sup> Jaay nga sa mbooloo ci dara,  
te jariñu la tus.
- <sup>14</sup> Tax nga sunuy dëkk di nu ree,  
ñi nu séq di nu kókkaleek a ñaawal.
- <sup>15</sup> Tax nga xeet yi di nu léeboo,  
jaambur yaa ngi nuy wëcc bopp !
- <sup>16</sup> Damaa dëkke gàcce,  
sëlmoo kersa
- <sup>17</sup> ndax kókkali yeek xastey nit  
ñi ma bañ, di feyoontæk man.
- <sup>18</sup> Lii lépp dal na nu,  
te fàttewunu la, fecciwunu la °kóllëre.
- <sup>19</sup> Dëdduwunu la,  
wàccunu saw yoon,
- <sup>20</sup> teewul nga not nu, wacce nu xaj ya,  
këpp nu lëndëmu ndee.
- <sup>21</sup> Su nu la fàtte woon yaw, sunu Yàlla,  
ba tàllal tuuri doxandéem yi loxo,
- <sup>22</sup> du la ump, yaw Yàlla,  
mi xam kumpay xol.
- <sup>23</sup> Yaa tax ñu di nu yendoo bóom,  
def nu ni xar yu ñuy tér.
- <sup>24</sup> Éy Aji Sax ji, jógá ! Looy nelaw ?  
Yewwul, bu nu wacc ba fàww.
- <sup>25</sup> Loo nu làqe saw yiw,  
di fàtte sunu njàqareek sunu coono ?
- <sup>26</sup> Nu ngi ne ñàyy ci pënd bi,  
di watat koll fi suuf.
- <sup>27</sup> Wallusi nu, jot nu  
ngir sa ngor.

## Sabóor 45

### Buur a ngi séetal

<sup>1</sup> Mu jëm ci njiital jàngkat yi, dëppook galan bu ñuy wax Tóortóor, ñeel askanu Kore wu góor, dib taalif, te di woyu mbëggeel.

<sup>2</sup> Woy wu neex a fees sama xol,  
may taalifal Buur,  
sama làmmiñ ni xalimag bindkatu ndaanaan.

<sup>3</sup> Yaa gëna góorayiwe ci àddina,  
sa kàddu diw yiw,  
ndax Yàllaa la barkeel ba fàww !

<sup>4</sup> Jàmbaaro, takkal sa saamar,  
te yànj, am daraja ;  
<sup>5</sup> ànd ak daraja, dawal ba am ndam,  
di dawal dëgg ak yérmande ji war,  
ba mana def i jaloore.

<sup>6</sup> Yaw Buur, say fitt a ñaw,  
di jam say noon ci xol,  
ay xeet daanu, nga tiim.

<sup>7</sup> Yaw Yàlla, sab jal a sax dàkk ba fàww.  
Njub nga ñanke sa nguur gi,

<sup>8</sup> di sopp dëgg, bañ lu bon,  
ba Yàlla, sa Boroom diw la diwu mbégte,  
nga tiim say moroom :

<sup>9</sup> sa yére yépp di gilli ndàbb, allowes ak um kanel,  
ñu di la bégale xalam,  
ca sa biir kér yu yànj.

<sup>10</sup> Ay doomi buur a ngi ci jigéen ñi nga teral,  
sab lingeer féete la ndijoor,  
takkoo ngèneelu wurus.

<sup>11</sup> Janq doom, gisal, déglul te teewlu ma,  
fàtteel say bokk, fàtte sa kér baay,

<sup>12</sup> Buur xemmeme la sab taar ;  
mooy sab sang, wormaal ko.

- <sup>13</sup> Waa Tir a lay yótsiy may,  
ay boroom alal di wut lu la neex.
- <sup>14</sup> Séetu Buur duggsi na, ne ràññ,  
sol mbubb mu wurus way tàkk.
- <sup>15</sup> Nu yóbbul ko Buur, mu ne boyy,  
janq ja ànd ak moom, diy toppam,  
ñu indil léen Buur,
- <sup>16</sup> ñu duggsi kér Buur,  
ci biir mbégteek bànnex.
- <sup>17</sup> Yal na la sa doom yu góor wuutu ci seen jalu maam,  
nga def léen i kèngam ci réew mi mépp.
- <sup>18</sup> Maa lay joobe ba sa tur du Fey mukk,  
xeet yi saxoo laa sant ba fàww.

### Sabóor 46

#### Aji Sax jee ànd ak man

<sup>1</sup> *Mu jém ci njiital jàngkat yi, di jàngin wu ñeel askanu  
Kore wu góor, dëppook galan bu ñuy wax Baatu jigéen.*

- <sup>2</sup> Sunu Yàllaa nuy rawale, di nu dooleel,  
di nu wallu fu nu jaaxlee,  
<sup>3</sup> ba dunu tiit suuf su yëngu sax,  
ba tund yiy tàbbi biir géej,  
<sup>4</sup> mbaa gannax yuy riir, di fuur  
ak a fuddu bay gësém tund yi.

<sup>°Selaw.</sup>

- <sup>5</sup> Ag dex a ngi def i wal, di bànnexal dëkku Yàlla,  
sellngay dëkkuwaayi Aji Kawe ji.  
<sup>6</sup> Yàllaa ngi ci biir dëkk bi, du raf ;  
Yàllaa koy dimbali ba jant fenkee.  
<sup>7</sup> Ay giir a riir, ay réew yëngu ;  
mu àddu, suuf seey !  
<sup>8</sup> Aji Sax jiy Boroom gàngoor yee ànd ak nun,  
Yàllay Yanqóoba jee nuy rawale.

*Selaw.*

- 9 Dikkleen gis jaloorey Aji Sax ji,  
     ak yàqute gi mu dogal ci kaw suuf.  
 10 Mu ngi fey xare ci àddina sépp,  
     dog fitt, damm xeej, lakk pakk.  
 11 Mu ne : « Dal-leen te xam ne maay Yàlla,  
     màgg ci biir xeet yi, màgg fi kaw suuf. »  
 12 Aji Sax jiy Boroom gàngoor yee ànd ak nun,  
     Yàllay Yanqóoba jii a nuy rawale.

Selaw.

### Sabóor 47

#### Yàllaay buur

*1 Mu jëm ci njital jàngkat yi, di kàddug  
 Sabóor, ñeel askanu Kore wu góor.*

- 2 Na xeetoo xeet tàccu,  
     xaacu, sarxolleel Yàlla !  
 3 Aji Sax ji, Aji Kawe jee jara ragal,  
     mooy buur bu mag bi tiim àddina sépp.  
 4 Moo nu nangulal xeet yi,  
     nu teg tànk gàngoor yi.  
 5 Moo nu tånnal céru suuf,  
     muy sagu askanu Yanqóoba wii mu sopp.  
 6 Yàllaa yéeg, kàddu riir.  
     Aji Sax jee yéeg, bufta jolli.  
 7 Woyleen Yàlla, woyleen,  
     woyleen Yàlla sunu buur, woyleen.  
 8 Yàllaay buuru àddina sépp ;  
     taalifleen, woy ko.  
 9 Yàllaa di buuru xeet yi,  
     Yàllaa tooge jalám bu sell.  
 10 Kàngami xeet yeey daje,  
     ànd ak mbooloom Yàllay Ibraayma ;  
     Yàllaa moom buur yi yiir àddina,  
     te moo kawee kawee.

**Sabóor 48**

**Aji Sax ji aar na Siyoñ**

***1 Muy woyu Sabóor, ñeel askanu Kore wu góor.***

- 2 Aji Sax jee màgg, jara màggala màggal  
ca sunu biir dëkku Yàlla, kaw tundam wu sell.**
- 3 Jekk taxawaayee tundu °Siyoñ, colli Safon,  
dëkku buur bu mag bi,  
di mbégtem àddina sépp.**
- 4 Yàllaa wone kaaraangeem  
ca biir tatay dëkk ba.**
- 5 Buur yaa ngoog daje,  
àndandoo.**
- 6 Nun noo gis, jommi,  
tiit, fëx,**
- 7 ne fay pat-pati,  
jàq ni kuy matu.**
- 8 Ngelawal penku, moom ngay tase  
gaal gu mag.**
- 9 La nu déggoon de lanu gis  
ca dëkkub Aji Sax ji, Boroom gàngoor yi,  
sunu dëkku Yàlla ba.**
- Yàllaa koy dëgëral ba fàww.**
- 10 Céy Yàlla, nu ngi sa biir kér,  
di xalaat sa ngor.**
- 11 Céy Yàlla, sa tur ay sa woy  
ba ca cati àddina.  
Njekk la sa loxo fees.**
- 12 Yal na waa tundu Siyoñ bég,  
waa Yuda bànnexoo say àtte.**
- 13 Doxleen biir Siyoñ, wër ko,  
waññleen ay soorooram,**
- 14 nemmikuy tataam,**

*°Selaw.*

doxantoo këri buur,  
 ba man koo yegge maasug ëllëg,  
<sup>15</sup> ne léen kii ay Yàlla, sunu Yàlla,  
 tey ak ëllëg.  
 Moo nuy jiite ba saa taxaw.

### Sabóor 49

#### Alal day naxe

<sup>1</sup> *Mu jëm ci njiital jàngkat yi, di kàddug  
 Sabóor, ñeel askanu Kore wu góor.*

- <sup>2</sup> Yéen, xeetoo xeet, dégluleen ;  
 yéen, waa àaddina yépp, teewluleen,  
<sup>3</sup> ngay ku tuut di ku mag,  
 nga bareleek nga néewle.  
<sup>4</sup> Li may wax xel la,  
 di xalaat yu déggu.  
<sup>5</sup> Damay teewlu kàddu yu xelu,  
 xalamal la sama tekkiteb cax.
- <sup>6</sup> Ana lu may tiit bés yu metti,  
 yu ma njublañ yéewe seeni ñaawteef,  
<sup>7</sup> di ñu wóolu seen am-am,  
 di kañoo alal ju bare ?  
<sup>8</sup> Ana ku mana jota jot sa bakkanu moroom,  
 mbaa mu di ko feyal Yàlla njot ga ?  
<sup>9</sup> Njotug bakkan jafe na,  
 bu ci jéem dara.  
<sup>10</sup> Ana kuy dund ba fàww,  
 ba doo gis bàmmeel ?
- <sup>11</sup> Xanaa gis ngeen ne xelu, dee ;  
 dof, dee ; naataxuuna it faatu rekk,  
 wacce keneen alalam.  
<sup>12</sup> Sa bàmmeel di sa kér, ba fàww,  
 di sa dëkkuwaay bu sax dàkk,

- boo tudde woon sa bopp ay suuf sax.
- <sup>13</sup> Nit ak darajaam fanaanul,  
mook aw rab a yem, sàñku rekk.
- <sup>14</sup> Nii la ku wóolu boppam di mujje,  
mook ku ko topp, di safooy waxam. <sup>°Selaw.</sup>
- <sup>15</sup> Nara dee rekk niy xar,  
ndee wommat, yóbbu,  
njub fenk nib jant, ku jub moom léen,  
njaniiw mödd seen jëmm,  
fu sore kérug daraja.
- <sup>16</sup> Waaye Yàllaa may musal ci dooley njaniiw,  
jot sama bakkan, ba jël ma.
- <sup>17</sup> Buleen yéemu ci ku barele,  
teraaŋay kéräm di yokku.
- <sup>18</sup> Du dee ba yóbbäale dara,  
teraaŋgaam du ko topp biir bàmmel.
- <sup>19</sup> Na bége bânnexu bakknam,  
ñu di ko kañe koomam,
- <sup>20</sup> ba tey, day dee, fekkiy maamam,  
ña dootul gis ug leer ba fàww.
- <sup>21</sup> Nit ak darajaam fanaanul ;  
mook aw rab a yem, sàñku rekk.

### Sabóor 50

Aji Sax ji xol lay gérém

<sup>1</sup> *Muy kàddug Sabóor, giiroo ci Asaf.*

- Yàlla, Aji Sax ji Yàlla àddu na,  
di woo àddina, penku ba sowu.
- <sup>2</sup> Ca °Siyon, dëkk ba ca taar ba  
la Yàlla feeñe ni leer gu jolli.
- <sup>3</sup> Sunu Yàllaa ngi ñëw te du ne cell,  
sawaraa ko jiit, di xoyome,  
ngëlén lu mag wér ko.

<sup>4</sup> Ma ngay woo seede asamaan ak suuf,  
ngir àtte mbooloom.

<sup>5</sup> Mu ne : « Dajaleel ma sama wóllére  
ñiy sarxal, di ko fase sama °kólléreek ñoom. »

<sup>6</sup> Asamaan a ngi biral njekkam,  
ngir Yàllaay àtte.

<sup>°Selaw.</sup>

<sup>7</sup> « Sama mbooloo mi, dégluleen, ma wax leen ;  
yéen waa Israyil, ma sikk leen.

Maa di Yàlla, seen Yàlla.

<sup>8</sup> Du seeni sarax laa leen di sikke,  
mbaa °sarax yi ngeen ma saxoo lakkal ba mu jeex.

<sup>9</sup> Soxlawuma yëkkü yar  
ak sikketu gétt.

<sup>10</sup> Maay boroom raboo rabu àll,  
ak junniy nag yuy fore tund ya.

<sup>11</sup> Xam naa njanaawi tund yi,  
luy ndundatub tool maa ko moom.

<sup>12</sup> Su ma xiifoon, duma leen ko wax,  
maa moom àddinaak li ci biiram.

<sup>13</sup> Damay lekk yàppu nag  
ak a naan deretu sikket a ?

<sup>14</sup> Deel jaajéfal Yàlla, sarxale ko,  
di fey Aji Kawe ji loo dige,

<sup>15</sup> di ma woo bésub njàqare,  
ma wallu la, nga màggal ma. »

<sup>16</sup> Nu bon ñi Yàlla ne léen :  
« Lu ngeen di tari sama dogali yoon,  
di waxe sama kóllére ?

<sup>17</sup> Yéena ngii, bañ sama yar,  
xalab samay kàddu.

<sup>18</sup> Fu ngeen gis ub sàcc, neexook moom,  
ab njaalookat, ngeen lengool.

<sup>19</sup> Dangeena afal seen gémmiñ ci mbon,  
seen làmmiñ taqoo fen,

<sup>20</sup> ngeen di tooge seen mbokk,

- di yàq deru doomu ndey.
- <sup>21</sup> Lii yéena ko def ! Damay noppí,  
ngeen defe ne damaa mel ni yéen ?  
Dama leen di sikk, tuumaal leen, ngeen gis !
- <sup>22</sup> « Yéen fàttekati Yàlla yi, déggleen lii,  
bala maa fàdd te kenn du wallu.
- <sup>23</sup> Ki may sarxale jaajéf moo ma teral ;  
ku topp yoon, ma won ko wallu Yàlla. »

### Sabóor 51

Yàlla, yérém ma

<sup>1</sup> *Mu jëm ci njiiitu jàngkat yi, di kàddug Sabóor,*  
*ñeel Daawuda.*

<sup>2</sup> *Mooy ba ko yonent Yàlla Natan seetsee,*  
*gannaaw ba Daawuda dëkkoo*  
*ndaw sa ñuy wax Batseba<sup>j</sup>.*

<sup>3</sup> Éy Yàlla, baaxe ma ni nga goree,  
faral samag tooñ ngir sa yérmande ju yaa.

<sup>4</sup> Fóotal maa fóotal sama ñaawteef,  
raxasal ma sama moy.

<sup>5</sup> Xam naa ne maa tooñ,  
sama moy a ngi janook man saa su ne.

<sup>6</sup> Yaw laa moy, yaw donj.  
Li nga ñaawlu laa def.


Kon boo waxee, yaa yey ;  
boo àttee, wàcc nga.

<sup>7</sup> Ñaawteef daal laa judduwaale,  
te sama ndey émbaale ma bakkhaar.

<sup>8</sup> Dëgg daal nga namm, dëggú reenu xol,  
kon déey ma xel mu rafet.

<sup>j</sup> 51.2 Seetal ci 2. Samiyel 11—12.25.

- 9 Wis ma ndox, ma sell ;  
sang ma, ma set wecc.
- 10 Yal nanga ma dégtal mbég ak bànnex,  
ma bégati, gannaaw ba nga ma dammatee.
- 11 Bul xool samay moy,  
faral sama ñaawteef yépp.
- 12 Éy Yàlla, sàkkal ma xol bu sell,  
yeesalal ma pastéefu xol.
- 13 Bu ma xalab,  
bu ma xañ sa xel mu sell.
- 14 May ma, ma bégeeti sag wall,  
te dundale ma xol bu tàlli,
- 15 ma xamal tooñkat sa war,  
ba moykat dellu ci yaw.
- 16 Céy Yàlla, yaw Yàlla mi may musal,  
baal ma deret ji ma tuur,  
ma siiwal sa njekk.
- 17 Boroom bi, may ma, ma wax,  
ma delloo la njukkal.
- 18 Sàkkuwloo sarax, nde kon ma indi ;  
te soppuloo °sarax suy lakk ba jeex.
- 19 Saraxi Yàlla, xol bu tuub la,  
yaw Yàlla, xol bu tuub ba mokk,  
doo gàntal boroom.
- 20 Ngalla baaxeel °Siyoŋ,  
yal nanga tabax tatay Yerusalem.
- 21 Su boobaa nga nangu sarax yi war,  
di sarax suy lakk ak suy lakk ba jeex.  
Su boobaa ñu rendi ay yëkk ca sa °sarxalukaay.



## Sabóor 52

Yàllaa man boroom doole

*1 Mu jëm ci njiiital jàngkat yi, di taalif bu ñeel  
Daawuda. 2 Mooy ba Doweg, Edomeen ba, demee  
ca Sóol, ne ko Daawuda dem na kér Ayimeleg<sup>k</sup>.*

*3 Moo jàmbaar ji, looy damoo jëfi coxor ?  
Yàlla, ngoram, bés bu nekk la.*

*4 Ak sa làmmiñ wi ngay sose loraange,  
mel ni saatu su ñu xacc,  
rambaaj bi !*

*5 Lu bon a la gënäl lu baax,  
fen a la gënäl wax dëgg.*

*°Selaw.*

*6 Yaa bëgg jépp wax juy yàq,  
waabajiiba bi !*

*7 Yàlla da lay sànk ba fàww,  
fëkke la sab xayma, yóbbu,  
déjjatee la réewum aji dund.*

*Selaw.*

*8 Aji jub gis ko, yéemu,  
di la ree, naa :*

*9 « Xool-leen jàmbaar ji làqoowul Yàlla,  
xanaa di yaakaar alalam ju bare,  
di yokkoo loraange. »*

*10 Man, ma mel ni garabu oliw gu naat  
fa biir kér Yàlla,  
di wóoloo Yàlla ngoram  
tey ak ëllëg.*

*11 Naa la sante sa jëf ba fàww,  
naa biral sa tur wu baax,  
say wóllëre teew.*

<sup>k</sup> 52.2 Seetal ci 1. Samiyel 21—22.

**Sabóor 53****Mbon maase na**

**1** *Mu jëm ci njíital jàngkat yi, dëppook galan bu  
ñuy wax Maalat, di taalif bu ñeel Daawuda.*

**2** Ab dof a nga naa ca xelam : « Yàlla amul, »  
tey def njekkar,  
njubadeem siblu,  
kenn defu ci lu baax.

**3** Yàllaa toll asamaan, jéer doom aadama,  
di seet ku ci xelu,  
tey sàkku Yàlla.

**4** Népp a dëddu,  
bokk yàqu yaxeet.  
Kenn deful lu baax,  
du kenn sax.

**5** Yàlla nee : « Xanaa ñiy def lu bon, xamuñu dara ?  
Ñuy lekk sama mbooloo niw ñam,  
te sàkkuwuñu Yàlla. »

**6** Waaye ñooy tiita tiit  
fu tiitaange amul.  
Yàllaay tasaare néewi nit ñi la gaw.  
Yàllaa léen wacc, nga gàcceel léen.

**7** Ana kuy toll °Siyoŋ, xettli Israyil ?  
Éy, bés bu Yàlla delloo mbooloom ndam,  
ndaw mbégte ci giiru Yanqóoba !  
Ndaw bànnex ci Israyil gii !

## Sabóor 54

Yàlla, dimbali ma

<sup>1</sup> *Mu jëm ci njíital jàngkat yi, ànd ak i xalam, di taalif bu ñeel Daawuda.* <sup>2</sup> *Mooy ba waa Sif demee ca Sóol, ne ko Daawudaa nga làqu ca seen um réew<sup>l</sup>.*

<sup>3</sup> Éy Yàlla, musal ma ngir sa tur,  
jox ma dëgg, ci sa kàttan.

<sup>4</sup> Éy Yàlla, déglul, ma ñaan,  
teewlul, ma wax la.

<sup>5</sup> Ay doxandéem a ma jógal,  
di ñu néeg, bëgga jël sama bakkan,  
te seetuñu ci Yàlla.

<sup>°</sup>*Selaw.*

<sup>6</sup> Yàllaa ngii, moo may dimbali ;  
Boroom bee yor sama bakkan.

<sup>7</sup> Yal na ay wi képpu ci ñi may téri,  
yal na léen sa dëgg sànk.

<sup>8</sup> Xol bu tàlli laa lay sarxale.  
Aji Sax ji, yaa baax,  
ma sant la.

<sup>9</sup> Lépp luy njàqare, yaa ma ci jéle,  
ma tiim samay noon.

## Sabóor 55

Xarit wor na ma

<sup>1</sup> *Mu jëm ci njíital jàngkat yi, ànd ak i xalam, dib taalif, ñeel Daawuda.*

<sup>2</sup> Éy Yàlla, déglul, ma ñaan la,  
bul làqu, dama lay dagaan.

<sup>3</sup> Teewlu ma, nangul ma.

1 54.2 Seetal ci 1. Samiyel 23.14-28 ; 26.1-5.

- Li may tawat a ma xañ jàmm, ub sama bopp ;  
 4 coowal noon yee  
 ak coonob ñu bon ñi.  
 Dañu maa teg fitna,  
 di ma songe xadar.  
 5 Sama fit a ngi rëcc, di tëf-tëfi ;  
 tiitaangey ndee ne ma taral.  
 6 Njàqaree ma dugg, may kat-kati,  
 musiba mödd ma.  
 7 Dama ne : « Éy ku may may laafi xati,  
 ma ne fërr, noppaluji.  
 8 Xanaa ma naaw, ba sore,  
 fanaani màndiq ma.  
 9 Naa gaawtu, seeluji  
 ngelaw lu riddi ak ngélén. »
- °Selaw.
- 10 Éy, Boroom bi, beenal seeni wax, neenal léen.  
 Damaa gis fitnaak xuloo ci dëkk bi,  
 11 guddeek bëccëg ñuy wër,  
 ñaawteef ak ayib wéttali léen.  
 12 Yàq a nga ca biir,  
 te noteel ak njublañ jógul ca pénc ma.  
 13 Su doon noon bu may ñaawal,  
 ma muñ ko,  
 mbaa muy bañ bu may won ab dayo,  
 ma daw ko.  
 14 Waaye yaw la, sama nawle,  
 di sama wóllëre, ma xam la.  
 15 Nu daan bokk bànnexu diisoo,  
 ànd ak mbooloo, di jaamuji kér Yàlla ga.  
 16 Yal na léen deebett,  
 ñu jekki tàbbi njaniiw,  
 ngir mbon ga seen biir ak seen dëkkuwaay.  
 17 Waaye man, Yàlla laay woo wall,  
 te Aji Sax jee may wallu.

- 18 Subaak ngoon ak njolloor,  
may ñaxtook a ñurumtu,  
mu dégg ma.
- 19 Moo may jot ak jàmm,  
ba ma mucc ci xare ya ma ñu bare di songe.
- 20 Yàllaay dégg, duma léen,  
moom mi nguuram yàgga sax.  
Soppikuwuñu fenn  
te ragaluñu Yalla.

Selaw.

- 21 Kii a ngi xàccil ñi mu takktool,  
di fecci kóllére,
- 22 làmmiñ wa daa neex ni lem,  
te xare lal xol ba ;  
kàddu ya gëna nooy ag oliw  
te di saamar bu génn mbaram.

- 23 Sippikul Aji Sax ji lu la diis,  
moom moo lay taxawu.  
Du bàyyi mukk aji jub, muy térëf.

- 24 Waaye yaw Yalla, yaa léen di tàbbal,  
bóomkat ak naaféq ci pax mu xóota xóot,  
te seen u fan xaajul.  
Man nag, ma di la wóolu.


## Sabóor 56

Yalla laa wóolu, ragaluma nit

<sup>1</sup> *Mu jëm ci njiital jàngkat yi, dëppook galan bi ñu dippee Pitax mu luu, dëkk fu sore ; di taalifu jàngle bu Daawuda fentoon, ba ko Filisteen ña jàppée ca Gaat<sup>m</sup>.*

- 2 Éy Yalla, baaxe ma,  
nit a ngi may lakkal,

- ab xeexkat a ma yendoo sonal.  
<sup>3</sup> Noon yee ma yendoo lakkal,  
bare lool di xareek man.  
Ku Màgg ki,  
<sup>4</sup> bés bu ma tiitee,  
yaw laay wóolu.  
<sup>5</sup> Yàlla laay màggal kàddoom,  
Yàlla laa wóolu, ragaluma.  
Lu ma nit manal ?
- <sup>6</sup> Bés oo bés ñu ngi jalgati samay wax,  
seen mépp mélbét di sama loraange.  
<sup>7</sup> Ñu ngi mánkoo, di ma yeeru,  
topp sama tànk,  
di wut sama bakkan.
- <sup>8</sup> Éy gii ñaawteef ! Ñii nu ñu mana mucce ?  
Éy Yàlla, yal na léen sa mer dal !
- <sup>9</sup> Tumurànke naa, nga gis.  
Duyal samay rongooñ ci sa mbuus.  
Du lim nga lépp ?
- <sup>10</sup> Bés bu ma wootee wall,  
dees na waññi noon yi,  
ma xam ne Yàllaa ànd ak man.
- <sup>11</sup> Yàlla laay màggal kàddoom,  
Aji Sax ji laay màggal kàddoom,
- <sup>12</sup> Yàlla laa wóolu, ragaluma.  
Lu ma nit manal ?
- <sup>13</sup> Éy Yàlla, maa tegoo la ma la giñal,  
maa lay defal °saraxi cant.
- <sup>14</sup> Yaa ma rawale, ba deewuma,  
te dumá térëf.  
Damay daagu fi kanam Yàlla,  
ci biir leeru àddina.



## Sabóor 57

Yàlla jógá, wallu ma !

<sup>1</sup> *Mu jém ci njital jàngkat yi, dëppook galan bi ñuy wooye  
Bul yàq, di taalifu jàngle bu Daawuda fentoon, gannaaw  
ba mu dawee Buur Sóol, ba dugg ca xunti ma<sup>n</sup>.*

<sup>2</sup> Éy Yàlla, baaxe ma, ngalla baaxe ma,  
fi yaw laay làqu,  
yiiroo sa kiiraay,  
ba musiba yi jàll.

<sup>3</sup> Ma woo Yàlla, Aji Kawe ji,  
Yàlla, mi may matalal.

<sup>4</sup> Mooy yónnee fa asamaan, musal ma,  
dumaal ma ku may not. °Selaw.  
Yàllaay yónnee jéfi ngoram ak wormaam.

<sup>5</sup> Maa ngi tèdd ci biiri noon  
yu mel niy gaynde, di yàpp doom aadama.  
Seení sell niy xeej ak i fitt,  
seen làmmiñ di saamar yu ñaw.

<sup>6</sup> Éy Yàlla, yaa màgg, ba sut asamaan,  
sag leer tiim suuf sépp.

<sup>7</sup> Noon yi di ma fiir,  
sama xol jeex.  
Ñu gasal mam pax,  
far tàbbi ca. Selaw.

<sup>8</sup> Yàlla, dogu naa,  
dogu naa woy, di la kañ.

<sup>9</sup> Na sama jémm jépp yewwu,  
xalam ak moroom ma yewwu ;  
ma yee leerus njél.

<sup>10</sup> Boroom bi, naa lay gérém ci biir xeet yi,  
kañ la ci biir waaso yi.

<sup>n</sup> 57.1 Seetal ci 1. Samiyel 24.

<sup>11</sup> Sa ngor a màgg, ba àkki asamaan,  
sa worma àkki fa kaw-a-kaw.

<sup>12</sup> Éy Yàlla, yaa màgg, ba sut asamaan,  
sag leer tiim àddina sépp.

### Sabóor 58

#### Yàllaa mana mbugal

<sup>1</sup> *Mu jém ci njittal jàngkat yi,  
dëppook galan bi ñuy wooye Bul yàq,  
di taalifu jàngle, ñeel Daawuda.*

<sup>2</sup> Yéen daal, su ngeen waxee, dëgg selaw.  
Mbaa yéena ngi àtte nit ñi ci yoon ?

<sup>3</sup> Yéena ngi mébét njubadi,  
di lawal fitna ci réew mi.

<sup>4</sup> Ku bon day sosu rekk, dëng ;  
juddu, teggi yoon, dib fenkat.

<sup>5</sup> Day am dañar ni ñàngóor,  
fatt i noppam ni jaan ju têx :

<sup>6</sup> du dégg baatu jatkat,  
mbaa jati ñeengokat bu ñàng.

<sup>7</sup> Yàlla, ngalla tojal seeni gëñ;  
Aji Sax ji, foqal seen selli gaynde yii.

<sup>8</sup> Yal nañu ne mes, ni ndox muy wal,  
yal nañu diir seen fitt, mu damm,

<sup>9</sup> yal nañu mel ni ngumbaan-tooye  
buy dox, di seey,  
mbaa lumb wu jigéen tuur, gisul jant.

<sup>10</sup> Balaa seen cin a yég tàngooru gajj,  
muy gu tooy, muy guy boy,  
yal na léen fekk sàñku°.

**o 58.10** Li ñu wax ci aaya wii am na werante.

- <sup>11</sup> Aji jub day gis ñu feyul ko, mu bég,  
muy jàngoo deretu ku bon.  
<sup>12</sup> Ku ne naan : « Ku jub jot sab yool moos !  
Te Yàllaa ngi fi moos, di àtte àddina ! »

### Sabóor 59

#### Wallu maak ñu bon ñi

<sup>1</sup> *Mu jém ci njittal jàngkat yi, dëppook galan bi ñuy wooye  
Bul yàq, di taalifu jàngle bu Daawuda fentoon. Mooy ba Buur  
Sóol yónnee ay nit ñu ko xoolal kér Daawuda, ngir rey ko<sup>p</sup>.*

- <sup>2</sup> Éy sama Yàlla, xettli maak noon yi,  
làq ma ñi ma jógá.  
<sup>3</sup> Kettlimaak ñiiy def lu bon,  
wallu maak bóomkat yi.
- <sup>4</sup> Aji Sax ji, ñu ngii di ma téri, nar maa rey,  
di ma songe seen doole,  
te tooñuma, moyuma.  
<sup>5</sup> Defuma lu ñaaw, ñuy xélu, di ma waajal ;  
ngalla, jógá taxawusi ma, ba gis.  
<sup>6</sup> Aji Sax ji, Yàllay Israyil, Yàlla Boroom gàngoor yi,  
yewwul, dikkeel xeeti yéefar yépp, mbugal !  
Workat yu bon yi, bu léen yérém ! <sup>°Selaw.</sup>
- <sup>7</sup> Bu ngoonee ñu wàccsi,  
di xiiru niy xaj,  
di wér dëkk bi.  
<sup>8</sup> Dégul li ñuy yebbee ci seen gémmiñ,  
seen làmmiñ niy saamar,  
ñu defe ne kenn déggú léen.  
<sup>9</sup> Te yaw Aji Sax ji, yaa ngi léen di ree,  
yaa ngi kekku yéefar yii yépp.

<sup>10</sup> Yaay sama doole, ma di la séentu,  
yaw Yàlla, yaay sama rawtu.

<sup>11</sup> Sama Yàlla ju goree may gatandu.  
Moo may may ndam ci noon yi, ma gis.

<sup>12</sup> Yàlla, bu léen rey,  
lu ko moy samaw xeet fàtte.  
Tasaaree léen sa doole, daane léen.  
Boroom bi, yaa nuy feg.

<sup>13</sup> Bàkkaar lañuy wax,  
seeni kàddu, bàkkaari neen.  
Yal nañu bew ba daanu,  
yooloo ko seeni saagaak seeni fen.


<sup>14</sup> Meral, jeexal léen,  
jeexal léen, ba ñu jeex tàkk,  
ba ñépp xam ne Yàllaay Buur ci giiru Yanqóoba,  
ba ca cati àddina. *Selaw.*

<sup>15</sup> Bu ngoonee ñu wàccsi,  
di xiiru niy xaj,  
di wér dëkk bi.

<sup>16</sup> Nuy wér di wut lu ñu lekk,  
su ñu suurul, di ñurumtu.

<sup>17</sup> Maa lay woye sa doole,  
xëy, di sarxolle ngir sa ngor.  
Yaay sama rawtu,  
di sama làquwaay bésub njàqare.

<sup>18</sup> Sama doole yaw a, naa la woy,  
Yàlla, sama rawtu, Yàlla, boroom ngor.



## Sabóor 60

Yàllaa yor sunu mucc

<sup>1</sup> *Mu jëm ci njiital jängkat yi, dëppook galan bu ñuy wax  
Seedeb Tóor-tóor, di taalifu jängle, ñeel Daawuda.* <sup>2</sup> *Mooy  
ba Daawuda di xareek waa Siri ña ca Mesopotami ak waa  
Siri ña ca Soba te ba ñu ca bàyyikoo, Yowab duma fukki  
junnyi Edomeen ak ñaar (12.000) ca xuru Xorom wa<sup>q</sup>.*

<sup>3</sup> Éy Yàlla, wacc nga nu, bëtt sunu kiiraay.

Mer nga, waaye ngalla xettli nu.

<sup>4</sup> Yëngal nga suuf, xar ko ;  
ngalla jagalal, mu tëju, mu ngi jaayu !

<sup>5</sup> Won nga sa mbooloo lu metti,  
nàndal nu biiñu mbugal, ba nu miir.

<sup>6</sup> Artu nga ñi lay jaamu,  
ngir mucc fitt.

<sup>°Selaw.</sup>

<sup>7</sup> Walloo nu sa ndijoor, nangul nu,  
ba say soppe xettliku.

<sup>8</sup> Yàllaa àddoo fa këram gu sell,  
ne : « Maay damu, dogat suufas Sisem,  
séddale xuru Sukkoot.

<sup>9</sup> Maa moom diiwaanu Galàdd, moom Manase,  
Efrayim di sama mbaxanam xare,  
Yuda di sama yetu nguur,

<sup>10</sup> réewum Mowab di sama ndabal raxasukaay,  
Edom, ma teg tànk ;  
Filisti, ma xaacoo fa. »

<sup>11</sup> Éy Yàlla, ana ku may yóbbu dëkk ba tata wér ?  
Ku may jiite ba Edom ?

<sup>12</sup> Xanaa kay du yaw, Yàlla mi nu wacc,  
yaw Yàlla, mi baña ànd ak sunu mboolooy xare ?

- <sup>13</sup> Ngalla dimbali nu ci bañaale ;  
doom aadama, wallam neen la.  
<sup>14</sup> Nook Yàlla, nu def njàmbaar ;  
moom mooy not sunuy noon.

### Sabóor 61

#### Naa woote wall

- <sup>1</sup> *Mu jëm ci njiital jàngkat yi, ànd ak i xalam, ñeel Daawuda.*
- <sup>2</sup> Ngalla Yàlla, déglul, maa ne wallóoy,  
teewlul, ma dagaan la.
- <sup>3</sup> Àll laa lay wooye,  
sama xol jeex ;  
yéoge ma doju rawtu wu ma jotul.
- <sup>4</sup> Yaw laa làqoo,  
ngay tata ju dëgér, fegal ma noon.
- <sup>5</sup> Naa dékke sa xayma, ba fàww ;  
làqoo sa kiiraay. °Selaw.
- <sup>6</sup> Yàlla, yaa dégg samay dige,  
sédd ma céru ñi la wormaal.
- <sup>7</sup> Ngalla féqal fani Buur,  
ay atam bare, sét ba sétaat.
- <sup>8</sup> Éy Yàlla, yal na Buur toog ba fàww fi sa kanam,  
nga sédd ko sa ngor ak sa worma, mu fegoo ;
- <sup>9</sup> kon ma woy la ba fàww,  
di jéfe samay dige bésoo bés.

### Sabóor 62

#### Yaakaar, fa Yàlla

- <sup>1</sup> *Mu jëm ci Yedutun, njiital jàngkat yi, di  
kàddug Sabóor, ñeel Daawuda.*

- <sup>2</sup> Yàlla doñj ay dalal sama xel,  
moo may wallu.

3 Moom doŋŋ mooy sama wéeru-mucc,  
 di ma rawale, ba duma sàṅku !  
  
 4 Xanaa dungeen bàyyee songandoo nit,  
 nar koo sàṅk,  
 ni kuy màbb tabax bu joy,  
 mbaa ngay bàddi per mu ràpp ?  
 5 Seeni mébét, wàcce boroom daraja doŋŋ;  
 yéena ngi bége ay fen,  
 seeni kàddu diw yiw,  
 seen xalaat diy saaga.

*°Selaw.*

6 Yal na Yàlla doŋŋ di dalal sama xel,  
 moom mi ma yaakaar.  
 7 Moom doŋŋ a di sama cëslaay, di sama wall,  
 di sama rawtu, duma tèréf.  
 8 Yàllaa may musal, di ma sagal,  
 ma di ko doolewoo.  
 Sama kiiraay, Yàllaa !

*Selaw.*

9 Bokk yi, wóoluleen ko fu ngeen toll,  
 diisleen ko seen xol,  
 Yàllaay sunu kiiraay.  
  
 10 Doom aadama, ngelawal neen ;  
 nit, naxi neen.  
 Booleel teg ci lu ñuy natte diisaay,  
 kaw la jém.  
 Ñooy gëna woyof ngelaw !

11 Bul wóolu ribaa,  
 bul yaakaar alalu càcc, neen la.  
 Bu sa alal yokku, nga taf ci sa xol.

12 Benn yoon la Yàlla wax,  
 yaari yoon laa dégg, ñu ne ;  
 « Doole, fa Yàlla. »  
 13 Boroom bi, ngor, yaay boroom,  
 yaw daal, yaay yool nit jéfam.

## Sabóor 63


**Maa namm Aji Sax ji**

**1 Muy kàddug Sabóor, ñeel Daawuda. Mooy  
ba mu nekkee ca màndigu Yuda'.**

- 2 Yaw Yàlla, yaay sama Yàlla,  
ma di la sàkku,  
sama bakkan mar la,  
sama jëmm namm la,  
fu suuf mare ndox, ne serej.
- 3 Moo tax kér gu sell ga laa la séentoo,  
ngir niir sa leer ak sa teddnga.
- 4 Xéewloo sa ngor moo dàq dundu bakkan ;  
ma àddu boog, kañ la !
- 5 Dama lay sant, sama giiru dund kay,  
yékkatiy loxo, sàbbaale la.
- 6 Sama xol di sedd, ni ku ñam wu duun suural,  
ma bég, sarxolle, màggal la.
- 7 Su ma tèddee, fàttliku la,  
waxtuw guddi dama lay xalaat.
- 8 Yaay sama ndimbal,  
may làqoo sa kiiraay,  
di sarxolle.
- 9 Sama xol taq la,  
nga téyee ma sa ndijoor.
- 10 Waaye ñiy wuta faat sama bakkan  
ñoo jëm xóotey njaniiw.
- 11 Nu jébbal léen ñawkay saamar,  
till séddoo.
- 12 Buur moom, di bége Yàlla ;  
képp ku koy giñe di ko kañoo, fenkat ne xerem.

---

**r 63.1 Seetal ci 1. Samiyel 23.14 ; 24.2 ; 2. Samiyel 15.23.**



## Sabóor 64

Yàllaa man ag fitt

*1 Mu jëm ci njiital jàngkat yi,  
di kàddug Sabóor, ñeel Daawuda.*

*2 Éy Yàlla, déglul sama kàddug tawat ;  
ngalla aaral sama bakkan ci noon bu raglu.*

*3 Làq ma pexey ku bon,  
ma rëcc gàangooru defkati ñaawteef.*

*4 Nu ngi daas seen làmmiñ niy saamar,  
di fitte seeni kàdduy wextan,*

*5 di jam ku ñu téri te deful dara ;  
jekki jam ko, te tiituñu ci dara.*

*6 Dañoo dogu ca lu bon la ñu nar,  
di diisoo na ñuy làqe ay fiir,  
te naan : « Kenn du ko gis ! »*

*7 Dañuy lal pexem njubadi te naan :  
« Lal nanu pexe mu mat sëkk. »  
Nit aka xóot xel te xóot i mbóot !*

*8 Waaye Yàllaa léen di jam u fittam,  
ñu jekki daanu.*

*9 Seen làmmiñ a léen di fakkastal,  
ba ku léen xool wëcc bopp.*

*10 Népp a ciy am tiitaange,  
bay siiwal la Yàlla def,  
tey xalaataat jëfam jooju.*

*11 Ku jub bége Aji Sax ji, làqoo ko.  
Képp ku namm njub, damu.*

**Sabóor 65**

Yàllaay nangul suuf

*<sup>1</sup> Mu jëm ci njiital jàngkat yi,  
di woyu Sabóor, ñeel Daawuda.*

<sup>2</sup> Éy Yàlla, yaa jagoo cant fa °Siyon,  
yaw lees di jéfeel ab dige.

<sup>3</sup> Yaw miy nangug ñaan,  
yaw la képp di wuysi.

<sup>4</sup> Samay ñaawteef man na ma,  
waaye sunuy tooñ, yaa nu koy baal.

<sup>5</sup> Ndokkleee koo tånn, woo ko,  
mu dale say ètt,  
di xéewloo sa ngëneeli kér,  
ak sa sellngay dëkkuwaay.

<sup>6</sup> Defal nga nuy kéemaan,  
nangug ñaan ci njekk,  
yaw Yàlla, mi nuy wallu,  
di yaakaaru àddina wérngal këpp,  
ba ca géej gu sore ga.

<sup>7</sup> Yaa déje tund yu mag yi doole,  
gañoo sa kàttan,

<sup>8</sup> di dalal riirum géej ak i gannaxam,  
ak coowal xeet yi,

<sup>9</sup> ba waa cati àddina yéemoo say firnde,  
waa penkook sowu di sarxolle.

<sup>10</sup> Yaa dikke suuf am wal,  
nangul koo nangul.

Dexu Yàllaa fees ndox,  
ngay may nit peppam,  
ni nga ko waajale suuf si,

<sup>11</sup> di suuxat ngàbb mi,  
maasalee ko jal yi,

- sottiy waame, mu mokk,  
cax ma, nga barkeel.
- <sup>12</sup> Yaay tēje mbeyum at mi say ngëneel,  
foo jaare, xéewal walangaan.
- <sup>13</sup> Parluy mändij yaa ngi walangaan,  
li wér tund yu ndaw yi di xumbéen.
- <sup>14</sup> Joor gaa ngi, jur gi muur,  
xur yi sàngoo pepp,  
lépp di xaacook a woy.

### Sabóor 66

#### Yàllaay aar nitam

<sup>1</sup> *Mu jëm ci njíital jàngkat yi, di woyu Sabóor.*

Yéen waa àddina sépp, sarxolleel-leen Yàlla,  
<sup>2</sup> woyleen teddngay turam,  
darajaal-leen cantam.  
<sup>3</sup> Neleen Yàlla : « Yaaka yéemey jaloore !  
Sa doolee bare, ba say noon rasu,  
<sup>4</sup> àddina yépp di la sujjóotal,  
di la woy, di joobe sa tur. »

<sup>°</sup>*Selaw.*

<sup>5</sup> Dikkleen gis li Yàlla def,  
jëf la ju yéeme, ñeel doom aadama yi.  
<sup>6</sup> Moo soppi géej ag joor,  
maam ya dox jàll.  
Nanu ko bége foofa.  
<sup>7</sup> Mooy nguuroo njàmbaaram ba fàww,  
di topp xeet yeek bët.  
Ku koy diijat, yàlla boo damu !

*Selaw.*

<sup>8</sup> Yéen xeet yi, santleen sunu Yàlla,  
te biral cantam !  
<sup>9</sup> Moo sàmm sunu bakkan,  
te waccu nu, nu tèréf.

- 10 Éy Yàlla, nattu nga nu,  
     xelli nu, ni ñuy xellee xaalis ;  
 11 laaw nga nu,  
     teg nu njàqare.  
 12 May nga noon not nu,  
     nu jaare sawara, jaarem ndox ;  
     nga génne nu, yaatal nu.  
  
 13 Maay duggaale sa kér ay °sarax yu lakk ba jeex,  
     defal la samay dige,  
 14 yi ma waxoon ci sama gémmiñ,  
     sama làmmiñ tudd ko, ba ma jàqee.  
 15 Jurug yafal, ma sarxalal la, mu lakk ba jeex,  
     saxar sa jollee ca kuuyu sarax ya,  
     ma boole ca saraxu nag ak sikket.
- Selaw.
- 16 Képp ku ragal Yàlla dikkal, déglu,  
     ma limal la li mu ma defal.  
 17 Moom laa woo wall,  
     àddu, màggal ko.  
 18 Su ma naroon ñaawteef,  
     Boroom bi du ma déglu.  
 19 Waaye Yàlla dégg na ma,  
     teewlu na samag ñaan.  
 20 Cant ñeel na Yàlla,  
     gàntuwul samay ñaan,  
     xañu ma ngoram.

### Sabóor 67

#### Yal na nu Yàlla barkeel

*1 Mu jëm ci njital jàngkat yi, ànd ak i xalam, di woyu Sabóor.*

- 2 Éy Yàlla, yéwéne nu, barkeel nu,  
     te geesoo nu sa leeru kanam,  
 3 ba ñu ràññee sa loxo fi kaw suuf,  
     gis sag wall fi biir xeet yépp.

°Selaw,

- <sup>4</sup> Yaw Yàlla, na la xeet yi sant,  
na la xeet yépp sant.  
<sup>5</sup> Na xeet yi y bég, di sarxolle ;  
loo dogalal xeet yi njub la,  
te yaay wommat xeet yi ci kaw suuf.  
<sup>6</sup> Yaw Yàlla, na la xeet yi sant,  
na la xeet yépp sant.
- <sup>7</sup> Suuf si nangu na,  
yal na nu Yàlla, sunu Yàllay barkeel.  
<sup>8</sup> Yal na nu Yàllay barkeel,  
ba àddina wérngal këpp ragal ko.

Selaw.

**Sabóor 68****Yàlla daagu, daan**

<sup>1</sup> *Mu jém ci njiital jàngkat yi,  
ñeel Daawuda, di woyu Sabóor.*

- <sup>2</sup> Yàllaay jóg, noonam ya tasaaroo ;  
bañam ña daw, dëddu ko.  
<sup>3</sup> Yalla wal, ñu naaw ni saxar.  
Ñu bon ñi sàndu fi kanam Yàlla,  
mbete dax ak sawara.  
<sup>4</sup> Waaye ñu jub ñiy bég,  
di bànnexu fi kanam Yàlla,  
tey puukarewoo mbégte.  
<sup>5</sup> Woyleen Yàlla, teral turam,  
xàllal-leen kiy war niir yi,  
Ki Sax moo di turam.  
Bànnexuleen fi kanamam.  
<sup>6</sup> Mooy baayoo jirim, di àtte jétun,  
kookoo di Yàlla ja fa dëkkuwaayu sellngaam.  
<sup>7</sup> Yàllaay sàkkal ku wéet wéttal,  
di afal ku ñu têjoon, bégal ko,  
ku déggadi rekk ay dëkke suuf su ne sereñ.

- <sup>8</sup> Céy Yàlla, yaa génn, jiitu sa mbooloo,  
daagu, dugg màndij ma. <sup>°Selaw.</sup>
- <sup>9</sup> Suuf yëngu,  
asamaan sóob  
fi kanam Yàlla, boroom tundu Sinayi,  
Yàllay Israyil ja !
- <sup>10</sup> Yàlla, waame nga tawal,  
leqlee ko réew mi nga séddoo, fa mu sonne,
- <sup>11</sup> sa mbooloo dëkke fa.  
Yàlla yaa leel néew-ji-doole sag mbaax.
- <sup>12</sup> Boroom beey joxe ndigal,  
gàngooru jigéen indi xibaar :
- <sup>13</sup> « Buur yaak seeni gàngoor a ngay dawa daw,  
jongomay kér gi di séddale lël ja.
- <sup>14</sup> Yéen ñiy waaf ci gétt gi, bésub xare,  
gànjar a ngi, di laafi pitax yu ñu xoob xaalis,  
dunq ya teg wurus wuy ray-rayi. »
- <sup>15</sup> Ba fa Aji Man ji tasaaree buur ya,  
tawub yuur a ngay sóobe tundu Salmon.
- <sup>16</sup> Yaw tundu Yàlla wi, yaw tundu Basan,  
tundu Basan, tund wi ci coll yi,
- <sup>17</sup> looy xeelook say coll, di fiire  
tund wi Yàlla namma dëkke ?  
Aji Sax ji kat, fa lay dëkk ba fàww !
- <sup>18</sup> Watiiri xarey Yàlla di ñaar fukki junni (20.000),  
ba ci junniy junni.  
Boroom bi ne ca seen biir,  
di boroom tundu Sinayi fa biir sellngaam.
- <sup>19</sup> Yaa yéeg fa kaw-a-kaw,  
jàapp i jaam, yóbbaale.  
Yaa nangooy galag ci nit ñi,  
ba ci ñiy fippu  
ndax li Yàlla Ki Sax dëkke °Syon.

- <sup>20</sup> Cant ñeel na Yàlla bésoo bés.  
Moo nuy jaboote. Yàllaa nuy musal. *Selaw.*
- <sup>21</sup> Sunu Yàllaa di Yàlla jiy walloo,  
Aji Sax jiy Boroom beey musal bakkan.
- <sup>22</sup> Yàlla daal ay rajaxe boppi noonam  
ak kaanj mu sëq mu boroom wéye tooñ.
- <sup>23</sup> Boroom bi nee : « Basan laay waññee noon yi,  
waññee léen xóotey géej,
- <sup>24</sup> ngeen mana xuus ci seen deret,  
seeni xaj séddu ci seeni néew. »
- <sup>25</sup> Céy Yàlla, gis nañu sa gàngoor di daagu,  
sama Yàlla, sama buur, sa gàngoor ba ca biir kér gu  
sell ga.
- <sup>26</sup> Woykat ya jiitu, xalamkat ya mujje,  
janq ji yéewe léen tègg um njiin.
- <sup>27</sup> Dajeleen, di sant Yàlla,  
yéen askanu Israyil, santleen Aji Sax ji.
- <sup>28</sup> Giiru Beñamin a ngi jiitu, gën cee néew,  
njiiti Yuda topp caak seeni kureel,  
njiiti Sabulon topp caak njiiti Neftali.
- <sup>29</sup> Yéen, seen Yàlla dogalal na leen kàttan ;  
éy Yàlla, jéfeel doole ja nga nu jéfeeloон.
- <sup>30</sup> Sa kér gi tiim Yerusalem,  
fa la la buur yiy indiley galag.
- <sup>31</sup> Nanga fa gëdde rabu àll wi<sup>s</sup> ci barax yi,  
ñooy gétti yékk yi, xeet yi ci des diy sëllu.  
Gëdd léen, ba ñu sujjóotalsi laak dogi xaalis.  
Tasaareel xeet yooyu sopp xare,
- <sup>32</sup> ay kèngam bàyyikoo Misra ak i galag,  
réewum °Kuus baral loxoom, indil Yàlla.
- <sup>33</sup> Yéen waa réewi àddina, woyleen Yàlla,  
teral-leen Boroom bi, *Selaw*

<sup>s</sup> 68.31 *rabu àll wi* : jàpp nañu ne jombul Misra lay doon.

<sup>34</sup> gawar bi ci asamaan,  
asamaani démb.  
Ma ngooguy àddu kàddug doole.

<sup>35</sup> Seedeleen ne doole, fa Yàlla,  
mi tiime Israyil darajaam,  
dooleem feeñoo xàmbar ya.

<sup>36</sup> Céy Yàllaaka mata ragal fa këram gu sell !  
Mooy Yàllay Israyil,  
di may mbooloo mi dooleek kàttan.  
Cant ñeel na Yàlla !

### Sabóor 69

#### Ku ñu fitnaal a ngi ñaan

<sup>1</sup> *Mu jëm ci njital jàngkat yi, dëppook galan  
bu ñuy wax Tóor-tóor, ñeel Daawuda.*

<sup>2</sup> Éy Yàlla, wallu ma !  
Ndox maa ngi ma toll ci put.  
<sup>3</sup> May suux ci ban bu xóot,  
te awma fu ma teg tànk.  
Maa ngi nii ci ndox mu xóot,  
gannax yi médd ma.  
<sup>4</sup> Ma woote wall ba tàyyi,  
sama put gi wow kojj.  
Ma séentu la, yaw sama Yàlla,  
ba samay gét giim.  
<sup>5</sup> Sama kawari bopp sax,  
ñi ma bañ ci daraa ko ëpp.  
Ñu bare doole, bëgg maa sànk,  
noonoo ma ci dara.  
Sàccuma, nara fey !

<sup>6</sup> Yaw Yàlla, xam nga sama jëfi dof,  
te samay tooñ umpu la.  
<sup>7</sup> Yàlla buma rusloo ñi la yaakaar,

yaw Boroom bi, Aji Sax ji, Boroom gàngoor yi,  
 yàlla buma gâcceel ñi la topp,  
 yaw Yàllay Israyil.

<sup>8</sup> Yaa tax ma dékku, ñu di ma sewal,  
 ma rus ba sëlmoo gâcce.

<sup>9</sup> Jaambur laa léegi ci saay bokk,  
 mel ni doxandéem sama biir doomi ndey.

<sup>10</sup> Damaa xér ci sa kér gi, ba jeex tàkk,  
 te jéf ji ñu la sewale man la dal.

<sup>11</sup> May jooy, di woor,  
 ñu di ma sewal.

<sup>12</sup> Ma sol i saaku, di ko ñaawloo,  
 ñu di ma léebu.

<sup>13</sup> Waa pénc ma di ma tooge,  
 mändikat yi di ma woyal.

<sup>14</sup> Waaye man, Aji Sax ji, yaw laay dagaan.  
 Éy Yàlla, na tey di bésub yiw.

Ngalla nangul ma ci sa ngor lu yaa  
 ak sa wall gu wóor.

<sup>15</sup> Xettli ma ci ban bi, ma baña suux,  
 xettliku ci samay noon.

Rikk génne ma yii xóotey ndox,

<sup>16</sup> ba gannax du ma mëdd,  
 xóotey géej du ma warax,  
 pax du ma kepp.

<sup>17</sup> Éy Aji Sax ji, yaa rafet ngor, nangul ma !  
 Geesoo ma sa yérmande ju yaa !

<sup>18</sup> Bu ma làqu, Sang bi.  
 Jàq naa, gaawe ma.

<sup>19</sup> Jege ma, jot ma,  
 musal ma ci noon yi !

<sup>20</sup> Yaa gis ñu di ma sewal, di ma ruslook a torxal,  
 yaa ngi ne jàkk ci noonoo noon.

<sup>21</sup> Dees maa sewal, sama xol jeex, ma wopp ;  
 may sàkku yérmande, awma ko ;

- ku ma dëfal it, gisuma ko.
- 22 Tooke lañu ma leel,  
ma mar, ñu nàndal ma lu forox.
- 23 Yal na seen ndab di seen um yeer,  
seeni am-di-jàmm di léen fiir.
- 24 Yal na seeni gët giim, ba dootu gis ;  
yal na seen ndigg rëcc fàww.
- 25 Yal nanga léen yuri mbugal,  
sa mer tàkk, dab léen.
- 26 Yal na seeni dal gent,  
seeni xayma wéet.
- 27 Yaw, nga duma ba noppi, ñu toppaat ca,  
nga gaañ, ñu siwal mitit wa.
- 28 Dencal léen tooñ ci kaw tooñ,  
te yàlla buñu tàbbi ci sag njekk.
- 29 Yal nañu léen far ca téereb dund ba,  
bañ léena limaale ca aji jub ña.
- 30 Man de, damaa jàq, tiis.  
Éy Yàlla, yal naa làqoo sag wall.
- 31 Damay woy Yàlla, teral ko,  
màggal ko, sant ko.
- 32 Mu gënäl Aji Sax ji saraxu yëkk,  
kuuyu nag ak i béjjénam ak i wewam.
- 33 Néew-ji-doole di gis, bége,  
kuy sàkku Yàlla yokk u fit.
- 34 Aji Sax ji day dégg néew-ji-doole moos,  
te du sàggane ñoñam ñi ñu njoñ.
- 35 Na asamaan ak suuf màggal Yàlla,  
mook géej ak lu cay yëngoo.
- 36 Yàlla kat mooy musal °Siyoñ,  
tabaxaat dëkki Yuda yu mag yi,  
ay nitam moom, dëkke.
- 37 Askanu jaamam ñee koy jagoo,  
ay soppeem a koy dëkke.

## Sabóor 70

Yàlla, gaawe ma

<sup>1</sup> *Mu jëm ci njiital jàngkat yi, ñeel  
Daawuda, di woy wuy fàttlee.*

<sup>2</sup> Yàlla, wallu ma !  
Éy Aji Sax ji, gaawe ma !

<sup>3</sup> Kuy wut sama bakkan,  
yal na rus, torox ne tott.  
Kuy bége sama loraange,  
yal nañu ko duma, waññi ko, mu ne yàcc.

<sup>4</sup> Kuy ñaawle,  
yal na dellu gannaaw, torox.

<sup>5</sup> Képp ku lay sàkku,  
yal na bég, di la bànnexoo.  
Képp ku sopp sag wall,  
yal na jàppoo : « Yàlla màgg na ! »

<sup>6</sup> Man de, néew naa doole, ñàkk naa.  
Éy Yàlla, gaawe ma.  
Yaw yaa may wallu, xettli ma.  
Éy Aji Sax ji, bu ma yeexe.

## Sabóor 71

Mag a ngi séentu njekku Yàlla

<sup>1</sup> Aji Sax ji, yaw laa làqoo,  
yàlla buma rus mukk.

<sup>2</sup> Kettleee ma sa njekk, yiwi ma ;  
ngalla teewlu ma, te wallu ma.

<sup>3</sup> Yal nangay sama cëslaay, sama rawtu  
bu may rawesi saa su ne,  
te nga dogal sama muc.  
Yaw yaa may téye, di ma aar.

- <sup>4</sup> Éy sama Yàlla, musal ma ci dooley ku bon  
ak ab saay-saay ak ab néeg.
- <sup>5</sup> Boroom bi, Aji Sax ji, yaw de laa yaakaar,  
dale laa wóolu ba may ndaw.
- <sup>6</sup> Yaw laa wéeroo ba may juddu ;  
yaw yaa ma roccee sama biiru ndey.  
Yaa yelloo sama cant fàww.
- <sup>7</sup> Firndey alkànde la ma ñu bare xoole woon,  
te yaw ngay sama rawtu bu wóor.
- <sup>8</sup> Samay kàddu sag cant la fees  
ak di la saxoo darajaal.
- <sup>9</sup> Ngalla bu ma wacc, mag laa ;  
bu ma ba fi doole jeexe.
- <sup>10</sup> Noon yaa nga may tooge,  
ñi may téero ngay diisoo,
- <sup>11</sup> naan : « Yàlla wacc na ko,  
nan ko dàq, jäpp ;  
kenn du ko wallu. »
- <sup>12</sup> Éy Yàlla, bu ma sore.  
Sama Yàlla, gaawe ma.
- <sup>13</sup> Samay seytane,  
yal nañu léen rusloo, sànk léen.  
Ñi may wuta lor,  
yal nañu léen gàcceel, sewal léen.
- <sup>14</sup> Man may saxoo yaakaar,  
di la sant, di santati.
- <sup>15</sup> May siwal sa njekk,  
di yendoo waxtaane say wall,  
doonte lim ba wees na ma.
- <sup>16</sup> Boroom bi, Aji Sax ji, ma dikke la sag njàmbaar,  
di tudd sa njekk gu wéet.
- <sup>17</sup> Éy Yàlla, ba may ndaw, nga ma xamal say kéemaan,  
te ba tey jii maa ngi koy biral.
- <sup>18</sup> Éy Yàlla, bu ma bijjaawee ba weex täll it, bu ma wacc,  
ba keroog may xamal maasu tey sa doole,

- xamal ñi ciy topp ñépp sag njàmbaar.  
<sup>19</sup> Céy Yàlla, sa njekk àkki na kawli kaw.  
 Def nga lu réy.  
 Yaw Yàlla, ana ku mel ni yaw ?  
<sup>20</sup> Won nga ma ay yoon coonook i tiis,  
 waaye yaa may dundalaat,  
 ma mucc xóotey suuf.  
<sup>21</sup> Yal nanga ma gëna sagal,  
 geesu, bégal ma.
- <sup>22</sup> Man it sama Yàlla, ma xalam, sant la  
 ngir sa kóllère.  
 Aji Sell ji séddoo Israyil,  
 dama lay woy ak i xalam,  
<sup>23</sup> sarxolle, woy la,  
 bége sag njot.  
<sup>24</sup> May yendoo siwal sa njekk  
 nde ña ma doon wuta lor  
 lañu rusloo, sewal léen.

### Sabóor 72

#### Nu ñaanal Buur

<sup>1</sup> *Neel Suleymaan.*

- Céy Yàlla, mayal Buur sa xelum àtte,  
 mayal doomu Buur bii sa xelum njekk,  
<sup>2</sup> muy àttee sa mbooloo njub,  
 di àttee sa néew-ji-doole ñi yoon,  
<sup>3</sup> tooli tund yu mag yi indil mbooloo mi jàmm,  
 tooli tund yu ndaw yi xéewale léen njekk,  
<sup>4</sup> Buur di àtte néew-ji-dooley xeet wi,  
 di wallu doomi néew-ji-doole  
 tey dëggaate kiy nennoo.  
<sup>5</sup> Yal nañu la wormaal feek jant biy am,  
 feek weer wiy feq, sët ba sëtaat.

- 6 Yal na Buur di xéewalu réewam nib taw cig ruujeef,  
mbaa waame wuy suuxat suuf.
- 7 Janti Buur aji jub day woomle,  
te ba keroog weer wiy fey, jàmm di law,
- 8 mu yilif géej ba géej  
ak dex ba ca cati àddina.
- 9 Waa mändij mi di ko sukkal,  
ay noonam mëq suuf,
- 10 buuri Tarsis ak dun ya  
di ko indil i galag ;  
buuri Saba ak Seba  
di ko yótsi yóbbal,
- 11 buuroo buur di ko sujjóotal,  
xeetoo xeet di ko surgawu.
- 12 Mooy xettliji aji tumurànke bu woote wall  
ak aji néewle ju sësul fenn.
- 13 Mooy yérém ku néewleek ku tumurànke,  
di sàmm bakkanu aji tumurànke,
- 14 boole léen jot ci notaangeek loraange,  
ngir fonk seen bakkan.
- 15 Yal na Buur gudd fan,  
yal nañu ko may wurusu Saba.  
Nañu koy ñaanal saa su ne,  
di ko saxoo, mu barkeel.
- 16 Yal na pepp ne gãññ ci réew mi,  
yal na gub yay jaayu ca tund ya ni gottu Libañ;  
dëkk yu mag yi sëq i nit ba law,
- 17 yal na turam sax,  
ba law fu jant tiim,  
yal na xeet yépp taasoo barkeem,  
te di ko ndokkle.
- 18 Cant ñeel na Yàlla Aji Sax ji,  
Yàllay Israyil, mi wéetooy jalooreem.
- 19 Cant ñeel na teddngaam, ba fàww,

yal na teddngaam dajal suuf sépp !  
 Amiin, Amiin !  
 20 Ñaani Daawuda doomu Yese jeexe fii.

### Sabóor 73

#### Am Yàllaa gën

<sup>1</sup> *Muy kàddug Sabóor, giiroo ci Asaf.*

- Yàlla kay baax na ci Israyil,  
 baax ci ku rafet xol.  
 2 Waaye man de tuuti kon ma lajj,  
 tuuti ma tarxiis,  
 3 ngir maa ñee ku bew,  
 ndax gis mu baaxle te di ku bon.  
 4 Amuñu metit,  
 xanaa ne faaj.  
 5 Doñ-doñu nit dabu léen,  
 coonoy doom aadama dalu léen.  
 6 Moo léen taxa ràngoo reewande,  
 làmboo coxor.  
 7 Dañoo suur ba gët suulu,  
 seen xalaati xel xëtt yoon.  
 8 Dañuy ñaawle, di wax lu bon,  
 di réy-réylu, boole ci kàdduy jaay-doole.  
 9 Seen ñjal-ñjal àkki asamaan,  
 làmmiñ dajal suuf.  
 10 Moo tax mbooloom Yàlla walbatiku ci ñoom,  
 di jolu seen wax nim ndox  
 11 te naan : « Lu ci Yàlla xam ?  
 Ana xam-xam fa Aji Kawe ji ? »  
 12 Ñu bon ñaa ngoog !  
 Ne finaax, di gëna woomle.  
 13 Man kay maa sellal ci neen,  
 di sàmm sama der.

- <sup>14</sup> Bés bu ne yar dal ma,  
saa yu ma xéyee, jot mbugal.
- <sup>15</sup> Su ma noon : « Naa waxe ni ñoom, »  
kon de, ma wor sa askanu mbooloo.
- <sup>16</sup> Naka laay jéema ràññee lii,  
mbir mi élém ma.
- <sup>17</sup> Ba ma àggee sa kér gu sell ga,  
laa doora gis muju ku bon.
- <sup>18</sup> Yoonu tarxiis kay, nga léen teg,  
daane léen, ñu sàndu,
- <sup>19</sup> Yàquleeka léena bett !  
Musibaa léen ne fuuf, ñu ne mes !
- <sup>20</sup> Day mel ni gént goo yewwoo.  
Céy Boroom bi, boo xippee, jémmu gént ga  
soof la.
- <sup>21</sup> Naqar laa amoon,  
sama xol di dagg.
- <sup>22</sup> Booba ngaaka laa, xawma dara ;  
rab laa woon fi sa kanam.
- <sup>23</sup> Teewul ma des ak yaw,  
nga jàpp sama loxol ndijoor.
- <sup>24</sup> Danga maa gindée sam xel,  
teg ca dalale ma sa teddnga.
- <sup>25</sup> Ana ku ma am asamaan ku la moy ?  
Ku ma safoo kaw suuf ku la moy ?
- <sup>26</sup> Kàttan ak pexe jeex,  
Yàlla di ma dooleel,  
ma séddoo ko fàww.
- <sup>27</sup> Ku la sore kat, sàndu ;  
képp ku la wor, nga fàkkas.
- <sup>28</sup> Man de, jege Yàllaa ma gënal.  
Boroom bi, Aji Sax ji, yaw laa def kiiraay,  
ngir siiwal sa jépp jéf.

**Sabóor 74**

**Yàlla, bu la noon ree**

***1 Muy taalifu yeete, giiroo ci Asaf.***

Éy Yàlla, lu tax nga wacc nu fàww,  
di dal ak xol bu tàng  
ci sa xari parlu yii ?

**2** Bàyyil xel sa mbooloo mi nga jënd bu yàgg,  
yaa jot gii giir, séddoo léen.

Bàyyil xel tundu °Siyonj, fa nga dëkke woon.

**3** Dikkal, xool gent bu yaa bii dul jeex,  
noon yàq lépp ci biir kér gu sell gi.

**4** Say bañ xaacu nañ fa sa digg bérabu ndaje ma,  
samp seen raaya.

**5-6** Sémmiñ dal, wàkku awu.

Mbete ñu xàcciy sémmiñ, di gor i geer,  
ba lu fa doon liggéeyu yett, tas.

**7** Dañoo taal sa kér gu sell,  
sa dëkkuwaayu tur lañu daaneel, ba sobeel ko.

**8** Ñu namm noo not ba nu nooy,  
fuy bérabu ndajem Yàlla ci réew mi, ñu lakk.

**9** Sunuy takk réer na nu,  
yonent amatul,  
te kenn xamul fu lii di àkki.

**10** Éy Yàlla, fu reetaani noon di dakke ?  
Xanaa bañ yi duñu la ñàkke kersa ba fàww ?

**11** Looy téye sa loxol ndijoor ?  
Na sa loxo jóge sa dënn, nga buube léen.

**12** Yàlla, yaa masa doon sama buur,  
di ma walloo ci digg réew mi.

**13** Yaa xàjjale géej gi ci sa doole,  
toj boppi ninki-nàンka ya ca ndox ma,

**14** yaa rajaxe kaanji rab wa,

- leele ko rabi mändij ma.
- <sup>15</sup> Yaa fettaxal fii bëti ndox ak um wal,  
    njiisal dex yu masa wal.
- <sup>16</sup> Yaa moom bëccëg, moom guddi,  
    teg fi weer week jant bi.
- <sup>17</sup> Yaa rëdd mboolem digi suuf,  
    sàkk noor ak nawet.
- <sup>18</sup> Kon xoolal, Aji Sax ji, noon a ngi ree,  
    xeet wu amul bopp a lay sewal.
- <sup>19</sup> Bul wacce rabu àll sam xati,  
    bul sàggane sa néew doole yi mukk.
- <sup>20</sup> Ngalla xoolal ci °kóllëre gi,  
    fu làqu ci réew mi, fitna dale fa ba dajal.
- <sup>21</sup> Yàlla bu néew doole ñibbaale gàcce,  
    yal na ku ñàkk ak ku néewle di la santandoo.
- <sup>22</sup> Éy Yàlla, jógäl ñonjal sa dëgg,  
    bàyyil xel dof bi la dëkkee sewal.
- <sup>23</sup> Bul tanqamlu sa coowal noon yi,  
    ñii la jógäl, seen um riir a ngi jolli saa su ne.

## Sabóor 75

### Yàllaay àtte

<sup>1</sup> *Mu jëm ci njiital jàngkat yi, dëppook galan bi ñu  
    dippee Bul yàq, di woyu Sabóor, giiroo ci Asaf.*

<sup>2</sup> Yàlla, nu sant la, santati la ;  
    nu ngi lay woo,  
    di siiwal say jaloore.

<sup>3</sup> Yàlla nee : « Maay takk ab àpp,  
    àtte ca njub.

<sup>4</sup> Bu suuf di yëngu mook ñi ko dëkke ñépp,  
    maay kiy téye ay kenoom.

<sup>5</sup> Dama ne ku réy : “Bul réy-réylu,”  
    ne ku bon : “Bul bew,

°Selaw.

6 bul bewa bew,  
bay waxe reewande.” »

7 Du penku, du sowu,  
te du mändij ma la daraja di jóge.

8 Yàllaay àtte :  
kii mu detteel, kee mu kawee.

9 Merum Aji Sax ji dib kaas ci loxoom,  
biiñu njafaan bu wex di ca fuur,  
mu jol ko képp ku bon ci àddina,  
mu naan ba naanaale ginjrit ga.

10 Man may biral jéfam ba fàww.  
Damay woy Yàllay Yanqóoba.

11 Mu ne : « Jépp dooley ku bon, ma neenal ;  
dooley ku jub yokku. »

## Sabóor 76

### Yàllaa moom xare

*1 Mu jém ci njiital jàngkat yi, ànd ak i  
xalam, di woyu Sabóor, giiroo ci Asaf.*

2 Yàlla siiw na fa Yuda,  
aw turam màgg fa Israyil.

3 Xaymaam a nga Salem,  
di xunteem ma fa °Siyon.

4 Fa la rajaxee fitt yuy boy  
ak pakk ak saamar ak ngànnayaal xare.

*°Selaw.*

5 Yàlla yaa ne ràññ te darajawu,  
ba raw tundi rëbbkat yi.

6 Futtées nay boroom fit,  
ñu ne nérém, nelaw ;  
kuy ñeyi xare, say yoxo nasax.

7 Yaw Yàllay Yanqóoba, yaa gëdd,  
gawar ak fasam nelaw.

- 8 Yaw mii, yaa mata ragal ;  
boo meree, ana kuy taxaw fi sa kanam ?  
9 Fa asamaan nga biraleb àtte ;  
suuf tiit, ne cell.  
10 Ca la Yàllay jóg, ngir àtte,  
ba wallu kuy néew dooley àddina.  
11 Doom aadamaak xadaram rafetal sa woy ;  
desu xadaram, nga gañoo.
- 12 Seen Yàlla Aji Sax ji, digooleen ak moom  
te jéfe ko.  
Kee jara ragal.  
Na ñi ko wér ñépp yótsiy teraanga.  
13 Mooy sàggi sagu kilifa yi,  
di tiitaangey buuri àddina.

Selaw.

**Sabóor 77****Yàllaa ngi seetaan**

- 1 *Mu jëm ci Yedutun, njiital jàngkat yi, di  
kàddug Sabóor, giiroo ci Asaf.*
- 2 Naa xaacu, woo Yàlla,  
sama baat fa Yàlla, ngir mu déglu ma.  
3 Béccëg, ma jàq, sàkku Boroom bi ;  
guiddi, ma tàllal loxo, toqiwuma.  
Sama xol tèwa sedd.  
4 Ma bàyyi Yàlla xel, binni,  
xalaat, xol jeex.  
5 Éy Yàlla, tere nga maa gëmm bët,  
ma jaaxle ba waxatuma,  
6 xanaa xalaat janti démb,  
at ya woon.  
7 Guiddi may fàttliku sama woy,  
di waxtaan ak sama ngegenaay,  
sama xel di jéex te naa :  
8 « Boroom bi da may gàntal ba fàww,

°Selaw.

- ba du ma baaxeeti mukk a ?  
 9 Xanaa daa jeexal ngor tàkk ?  
     Am kàddoom a deñ ba fàww ?  
 10 Moo Yàlla daa fàtte ñeewantee ?  
     Am meram a tëj buntu yérmandeem ? »  
 11 Ma ne, sama naqar daal  
     mooy Aji Kawe ji daa soppi loxoom.
- 12 Waaye naa fàttliku jaloorey Ki Sax rekk,  
     fàttliku kéemaanam ya woon.  
 13 Naa xalaat sa bépp liggeey,  
     di jàngat say jéf.  
 14 Céy Yàlla, yaa sell jikko !  
     Jan yàllaa màgg ni Yàlla ?  
 15 Yaa di Yàlla juy jéf i kéemaan,  
     yaa siwal sa doole ci bir xeet yi.  
 16 Kàttan nga jote sa mbooloo ma,  
     sëti Yanqóobaak Yuusufa.
- 17 Yàlla, ndox maa la gis,  
     ndox maa la gis, di lox ;  
     xóote yaa say,  
 18 niir ya yuri,  
     kàddu riire asamaan,  
     say fitt, fettaxandoo,  
 19 nga dënnoo biir callweer,  
     melax yi taal àddina,  
     suuf di lox, di reg-regi.  
 20 Biir géej di saw yoon ;  
     saw xàll ci digg ndox mu ne xéew,  
     te kenn gisul foo teg tànk !  
 21 Wommat nga sa mbooloo ni ag jur,  
     Musaak Aaróona jiite.

*Selaw.**Selaw.*

**Sabóor 78**

**Nit goreedi, Yàlla gore**

***¹Muy taalif bu giiroo ci Asaf.***

Yéen sama xeet, dégluleen, ma digal leen ;  
teewluleen ma, ma wax leen.

**²** Maa ngi leen di léeb,  
di sulli kumpay démb,

**³** muy lu nu dégg, xam ko,  
sunuy maam xamal nu ko.

**⁴** Dunu ko nëbb sunuy doom,  
xanaa di ko jottli maas giy ñëw,  
xamal léen jaloorey Aji Sax ji  
ak kàttanam ak i kéemaanam.

**⁵** Bindal na sëti Yanqóoba téereb seede,  
muy yoon wi mu tegal Israyil.

Mu sant maam yi, ñu xamal ko seeni doom,

**⁶** ngir ñiy juddu ëllég xam ko,  
am ay doom,

ñu màgg, ba xamal ko seeni doom,

**⁷** ngir ñu wóolu Yàlla,  
baña fàtte jëfi Yàlla,  
di jëfey santaaneem,

**⁸** te baña roy seeni maam ;  
maas gu të woon te déggadi,  
ñu ñàkk pastéef  
te sàmmuñu kóllérey Yàlla.

**⁹** Waa giiru Efrayim a sox i fitt,  
te keroog xare ba ñoo daw.

**¹⁰** Ñoo sàmmul °kóllérey Yàlla,  
gàntal yoonam,

**¹¹** ba fàtte ay jalooreem,  
di kéemaan yi mu léen won.

**¹²** Fa seen kanami maam la def kéemaan,  
fa diiwaanu Sowan, réewum Misra.

- <sup>13</sup> Moo xar géej ga, jal ndox ma nim tata,  
jàlle léen.
- <sup>14</sup> Bëccëg mu jiitee léen aw niir,  
ak leeru sawara guddi gépp.
- <sup>15</sup> Moo xar i doj ca mändij ma,  
mbàmbulaan wal, mu nàndal léen ;
- <sup>16</sup> mu sotti ndox mu balle ciw xeer,  
walal, mu saf i dex.
- <sup>17</sup> Waaye ñu wéy di moy Aji Kawe ji,  
di ko gàntal ca mändij ma.
- <sup>18</sup> Noo diiñate Yàlla xol,  
di xemmem ñam wu bakkane.
- <sup>19</sup> Ñuy waxal Yàlla naan :  
« Xam ngeen ne Yàlla manu noo taajal ndab ci  
mändij mi !
- <sup>20</sup> Dóor naw doj, moos, ndox ma fettax,  
wal ma baawaan,  
waaye aw ñam nag ?  
Daa mana leel mbooloo mii aw yàpp ? »
- <sup>21</sup> Aji Sax ji dégg ci, mer lool ;  
xolam tàng ci sëti Yanqóoba,  
am sànj tàkkal Israyil.
- <sup>22</sup> Dañoo gëmul Yàlla,  
doylooowuñu wallam.
- <sup>23</sup> Mu digal niir ya fa kaw,  
ubbi bunti asamaan,
- <sup>24</sup> tawal léen mènn, ñu lekk :  
muy peppum asamaan, mu may léen ;
- <sup>25</sup> mburum jàmbaar la nit lekk,  
mu wàcceel léen ca lu ne gànñ.
- <sup>26</sup> Yàlla wale ngelawal penku fa asamaan,  
bëmëx ak dooleem ngelawal bëj-saalum.
- <sup>27</sup> Mu tawal léen u yàpp, mu saawe ni pënd,  
di njanaaw yu ne gànñ ni feppi suufas géej,
- <sup>28</sup> wàcce ko fa seen digg dal ba,  
mu dajal seeni dëkkuwaay.

- 29 Mu faj seen aajo,  
ñu lekk ba suur këll.
- 30 Waaye bala seen xel a dal,  
seen lanc jàllagul sax,
- 31 Yàlla mer, dal ci seen kaw,  
bóom ña èpp doole ca ñoom,  
fàdd waxambaaney Israyil.
- 32 Loolu lépp teewul ñuy bàkkaar ba tey  
te gëmuñu ay kéemaanam.
- 33 Mu dagg seeni fan, mu wéy ni còolóol,  
faat seen bakkan ci safaan bu gaaw.
- 34 Ba léen Yàlla fàddee, ña des sàkku ko,  
tuub, waññiku ci moom.
- 35 Nu fàttliku ne Yàllaay seen cëslaay,  
xam ne Yàlla Aji Kawe jeey seen njotlaay.
- 36 Waaye ñu di ko jéema naxey wax,  
di ko fen.
- 37 Joxuñu ko woon xol,  
sàmmuñu kólléreem.
- 38 Teewul mu yérém,  
baal léen seen ñaawteef,  
ba sàngku léen.  
Muñ na meram, muñati,  
te toppul xolam,
- 39 ndax xalaataat ne suuxu neen lañu,  
di noo guy dem te du délsi.
- 40 Gàntal nañu ko ba tàyyi ca màndij ma,  
teg ko naqar ca ndànd-foy-foy ga.
- 41 Nu dellu di diijat Yàlla,  
di naqaral Aji Sell, ji séddoo Israyil.
- 42 Fàtte nañu ndimbalam la,  
bés ba mu léen jotee ca noon ba,
- 43 ba def i firndeem ca Misra,  
muy kiraamaam ya ca Sowan.

- <sup>44</sup> Moo soppli deret seen yooni ndox,  
ba naaneetuñu wal ya.
- <sup>45</sup> Mu wàcce seen biir ndiiraanu weñ  
yu léen di lekk,  
ak mbott yu léen sànk.
- <sup>46</sup> Mu jox soccet yi seen gàncax,  
jébbal njéeréer yi seen meññeef.
- <sup>47</sup> Seen garabi reseñ, mu fóome tawab yuur,  
seen garabi sikomoor, mu fóome waame.
- <sup>48</sup> Seen jur gu gudd, mu bàyyeek tawab yuur,  
seeni gàtt, mu bàyyeek sawaray melax.
- <sup>49</sup> Yàlla sotti léen tàngooru xadaram,  
mu dim sànj ak naqar ak njàqare,  
lépp di gàngooru ndaw yu indiy musiba.
- <sup>50</sup> Mu afal meram,  
ba musalul seen bakkan,  
xanaa jébbal léen mbas ma.
- <sup>51</sup> Daa fàdd képp kuy taaw ca Misra  
te juddoo seen digg doole, fa xaymay sëti Xam<sup>t</sup>.
- <sup>52</sup> Mu génne mbooloom niy gàtt,  
wommat léen ni gétt ca màndij ma,
- <sup>53</sup> ba yóbbu léen fu wóor te tiituñu ;  
seeni noon, géej ga médd léen.
- <sup>54</sup> Mu yóbbu léen fa suufam su sell sa,  
fa tund woowu mu jënde dooleem.
- <sup>55</sup> Da léena dàqal ay xeet,  
dogal léen céru suuf,  
sancal giiri Israyil ca seeni xayma.
- <sup>56</sup> Waaye ñuy diijat ak a gàntal Yàlla, Aji Kawe ji,  
sàmmuñu ay dénkaaneem,
- <sup>57</sup> xanaa dëddu, di ko wor ni seeni maam,  
toogadi ni xala gu yolom.
- <sup>58</sup> Nu di ko merlook seen bérabi màggalukaay,

<sup>t</sup> 78.51 sëti Xam mooy Misra ba tey.

- di ko firlook seen jëmmi tuur.
- <sup>59</sup> Ba ko Yàlla yégee, mer na,  
ba jéppi Israyil lool.
- <sup>60</sup> Mu gental dëkkuwaayam ba ca Silo,  
xaymaam ba mu sampooon ca doom aadama ya.
- <sup>61</sup> Mu jébbal ngàllo mändargam dooleem<sup>u</sup>,  
may gànjaram ca loxol noon ba.
- <sup>62</sup> Daa bàyyee mbooloom saamaru noon,  
ndax mere séddoom yooyu.
- <sup>63</sup> Seeni waxambaane deeye xare,  
seeni janq lamb ;
- <sup>64</sup> seeni 'sarxalkat loroo saamar,  
te jétun jooyul.
- <sup>65</sup> Ca la Boroom bi yewwu ni ku doon nelaw,  
mel ni jàmbaar ju biiñ xabtal.
- <sup>66</sup> Mu dóor noon ba yari gannaaw,  
teg léen gàcce gu dul fey,
- <sup>67</sup> ba noppì xalab waa kér Yuusufa,  
te tånnul giiru Efrayim,
- <sup>68</sup> xanaa tånn giiru Yuda,  
taamu tundu 'Siyon wi mu sopp.
- <sup>69</sup> Mu tabax kéräm gu sell, na mu mel fa kaw-a-kaw,  
dégér ni suuf, si mu samp ba fàww.
- <sup>70</sup> Mu teg ca tabb Daawuda, jaamam ba,  
jèle ko ca gétti xar ya,
- <sup>71</sup> fa mu doon topptoo jur ga ;  
mu sàmmal ko waa kér Yanqóoba,  
mbooloom Israyil gi mu séddoo.
- <sup>72</sup> Daawuda sàmme léen xol bu mucc ayib,  
jiitee léen manooreem.

**u 78.61** mändargam dooleem ji ñu wax fi mooy gaal gi àlluway  
kóllérey Yàlla dence.

## Sabóor 79

Yàlla, feyul nu

<sup>1</sup> *Muy kàddug Sabóor, giiroo ci Asaf.*

Céy Yàlla, yéefar yi song nañu sa moomeel,  
 teddadil nañ sa kér gu sell,  
 gental nañ Yerusalem.

<sup>2</sup> Leel nañ tan yi sa néewi jaam ñi,  
 leel nañ rabi àll yi sa suuxi wóllére yii.

<sup>3</sup> Nu tuur seen deret nim ndox,  
 ba Yerusalem daj,  
 te amul kuy rob néew yi.

<sup>4</sup> Noo ngi nii di mballitu dékkandoo yi ;  
 ñu séqe nu ay kókkaleek i kekku.

<sup>5</sup> Aji Sax ji, xanaa doo nu mere ba fàww,  
 sa fiiraange ni sawara ci sunu kaw ?

<sup>6</sup> Sippil sa mer yéefar yi la xamul,  
 ak réew yi wormaalul sa tur.

<sup>7</sup> Noo sèxétoo giiru Yanqóoba,  
 gental dékkuwaayam.

<sup>8</sup> Bul nu topp ñaawteef ya woon,  
 ngalla gaaw noo gatandoo sa yérmande.  
 Danu ne dàll, ba ne dett.

<sup>9</sup> Éy Yàlla, yaa nuy musal, wallu nu,  
 ba sa seede rafet.  
 Xettli nu te baal nu sunuy bàkkaar,  
 ba sa woy rafet.

<sup>10</sup> Bul tax yéefar yi naa :  
 « Ana seen Yàlla ? »  
 May nu, nu gis ni ngay mbugale yéefar yi,  
 feye léen sa deretu jaam yi tuuru.

<sup>11</sup> Ni ñu jàpp, yal na seeni onk àkki fa yaw.  
 Ni ci tànki ndee, yal nanga léen musale sa doole ju  
 màgg.

- <sup>12</sup> Boroom bi, sewal gi la sunuy dëkk sewal,  
këpp léen ko juróom yaari yoon,  
<sup>13</sup> te nun ñiy sa mbooloo, di sa gétt gi ngay foral,  
nu di la sant ba fàww,  
di biral sa ngérém sét ba sétaat.

### Sabóor 80

Yàlla, suqlil sa njembat

<sup>1</sup> *Mu jëm ci njiital jängkat yi, dëppook galan bu ñuy  
wax Tóor-tóor yi, di seede Sabóor, giirroo ci Asaf.*

- <sup>2</sup> Éy yaw, Sàmmu Israyil, teewlu nu ;  
yaw mi jiite Yuusufa ni ag jur,  
yaw mi toogandook malaakay °serub yi, feqal sag  
leer.  
<sup>3</sup> Dawalal sa njàmbaar, ñeel Efrayim ak Beñamin ak  
Manase,  
te wallusi nu.  
<sup>4</sup> Éy Yàlla, suqli nu ;  
geesoo nu sa leelu kanam, nu raw.  
  
<sup>5</sup> Éy Aji Sax ji, Yàlla Boroom gàngoor yi,  
foo àppal sa mer,  
mi ngay wuyoo sa ñaanu mbooloo mi ?  
<sup>6</sup> Leel nga nuw naqar,  
nàndal nu mbàndum rongooñ,  
<sup>7</sup> def nga dëkkandoo di nu xëccoo,  
noon di nu ree.  
<sup>8</sup> Éy Yàlla Boroom gàngoor yi, suqli nu ;  
geesoo nu sa leelu kanam, nu raw.  
  
<sup>9</sup> Yaa déjjatee reseñ Misra,  
dàq yéefar yi, indi, jëmbataat.  
<sup>10</sup> Nga wéex ko,  
mu sampu, law, dajal réew mi ;  
<sup>11</sup> keppaaram muur tund yi,

- ay caram sàng garabi seedar yu mag yi.  
 12 Mu tallal i bàndaasam ba géej,  
     lawal njebbit la ba dex ga.
- 13 Lu tax nga bëtt i miiram,  
     ba ku fa jaare witt ca,  
 14 mbaam-àll di ko ruur,  
     ndundati àll di ca for ?  
 15 Éy Yàlla Boroom gàngoor yi, geesul ;  
     séentool asamaan, ba gis  
     te taxawusi reseñ jii.  
 16 Taxawusil njëmbat lii nga jëmbate sa ndijoor,  
     ngarab sii nga dooleelal sa bopp.
- 17 Dees koo gor, taal ;  
     yal na ñii sànkoo sa mbugal.  
 18 Yal nanga yiir ki nga tànn,  
     kii nga dooleelal sa bopp,  
 19 ba dootunu la dëddu.  
     May nu nu dund, nu wormaal sa tur.  
 20 Éy Aji Sax ji, Yàlla Boroom gàngoor yi, suqli nu,  
     geesoo nu sa leeru kanam, nu raw.

## Sabóor 81

### Déggal Yàlla, jariñu

- 1 *Mu jëm ci njíital jàngkat yi, giïroo ci Asaf, te  
     ànd ak xalam gu ñuy wax gitit.*
- 2 Sarxolleen ci Yàlla, mi tuy dooleel ;  
     xaaculeen ci Yàllay Yanqóoba.  
 3 Yékkatileen woy te jiin,  
     xalam neex, ànd ak moroom ma.  
 4 Wal-leen liit gi ci terutel weer wi,  
     ak weer wu birale bésu màggal.  
 5 Loolu warteefu Israyil la,  
     di ndigalu Yàllay Yanqóoba,

<sup>6</sup> di ndénkaane lu mu dénk waa kér Yuusufa,  
ba Yällay dali ca kaw réewum Misra.  
Baat bu ma xamul laa dégg, mu naan :

<sup>7</sup> « Sippi naa leen,  
woyofal seeni yoxo.

<sup>8</sup> Ngeen jàq, woo ma, ma xettli leen,  
wuyoo leen fa kiiraayal dënn ya,  
te maa leen nattoo fa wal ma ca Meriba. <sup>°Selaw.</sup>

<sup>9</sup> Sama mbooloo mi, dégluleen, ma dénk leen.  
Éy Israyil, su ngeen ma déglu woon !

<sup>10</sup> Buleen fat tuuru jaambur,  
buleen sujjóotal tuuru doxandéem.

<sup>11</sup> Man, Aji Sax ji, maay seen Yàlla  
ji leen yékkatee réewum Misra.  
Ijaleen ñafeet, ma reggal leen.

<sup>12</sup> « Waaye sama mbooloo mi déggaluñu ma,  
Israyil gii nangulu ma.

<sup>13</sup> Moo tax ma bërgël léen ak seen ug të,  
ñuy wéye seeni pexe.

<sup>14</sup> Éy su ma sama mbooloo mi déggaloon,  
éy su Israyil toppoon samay nammeel !

<sup>15</sup> Ci saa si laay torxal seeni noon,  
duma seeni bañ,

<sup>16</sup> ba ku bañ Aji Sax ji di ko raamal,  
te àppam du jeex ba fàww.

<sup>17</sup> Kon yéen, ma leel leen ngën-gi-pepp,  
reggal leen lem ju doj xelli. »

## Sabóor 82

### Yàlla rekk a man àtte

<sup>1</sup> *Muy kàddug Sabóor, giiroo ci Asaf.*

Yàlla toog na, di jiite ndajem boppam,  
di àtte bindeefi asamaan, naan :

- 2 « Dungeen bàyyi àtteb njublaŋ,  
ak di faral ku bon ?
- 3 Sàmmleen àqu néew-ji-dooleek jirim,  
tey àtte yoon ku ñakk ak ku ndool.
- 4 Walluleen néew-ji-dooleek walaakaana,  
di léen xettli ci ku bon.
- 5 « Bindeefi asamaan yii xamuñu, dégguñu ;  
xanaa di doxe lëndëmu ñaawteef,  
ba kenuy suuf yépp di jaayu.
- 6 « Dama ne ay bindeefi asamaan ngeen,  
yéen ñépp di njabootu Aji Kawe ji.
- 7 Waaye du leen tee dee ni doom aadama,  
du leen tee daanu ni képp kuy njiit. »
- 8 Ngalla Yàlla, taxawal, àtte àddina,  
yaw yaa séddoo xeetoo xeet.

*°Selaw.*

### Sabóor 83

Yàlla, mbugalal noon yi

*1 Di woyu Sabóor, giiroo ci Asaf.*

- Éy Yàlla, bul ne cell,  
2 rikk Yàlla, bul tanqamlu, ne patt.  
3 Xoolal sa noon yi y riir,  
sa bañ yi fippu ba téen !  
4 Sa mbooloo lañuy rabatal,  
di mènkool sa séddoo yii.  
5 Nu ne : « Ayca nu far seen xeet wi,  
ba deesul fàttlikooti turu Israyil. »
- 6 Dañoo mènkoo kat,  
te yaw lañu takktool :  
7 muy néegi Edom ak Ismayla,  
néegi Mowab ak Agar,

8 néegi Gebal, Amon ak Amaleg  
ak waa Filisteek waa Tir,  
9 réewum Asiri it fekki léen,  
di dooleel askanu Lóot wa.

°Selaw.

- 10 Def léen na nga defoon waa Majan,  
def ko Sisera ak Yabin ca dexu Kison<sup>v</sup>.  
11 Ña nga sànkoo Endor,  
ba doon ub tos fi kaw suuf.  
12 Defal seeni njiit na Oreb ak Seeb,  
def seen kilifa yépp ni Seba ak Salmuna,  
13 ña ne woon : « Nan séddoo parluy Yàlla yi. »  
14 Éy Yàlla, wèndeel léen ni callweer,  
ñu mel ni boob mu ngelaw wal.  
15 Éy Yàlla, ni daay di xoyome àll,  
sawara wa jafal tund ya,  
16 yal nanga léen ni toppeek sa dooley ngelaw,  
tiitale léen sa ngélén.  
17 Aji Sax ji, sëlém léen gàcce,  
ba ñu sàkku la.  
18 Yal nañu rus, jàq ba fàww.  
Yal nañu torox, sàndu.  
19 Yal nañu xam ne yaw mi tudd Aji Sax ji doñj  
yaay Aji Kawe ji yilif àddina yépp.

### Sabóor 84

#### Ku dal ak Yàlla bég

1 *Mu jëm ci njiital jàngkat yi, ànd ak xalam gu  
ñuy wax gitiiit, ñeel askanu Kore wu góor.*

- 2 Aji Sax ji Boroom gàngoor yi,  
yaaka sopplub dëkkuwaay !  
3 Damaa namm èttub Aji Sax ji,  
di ko gelu ba jeex tàkk,

- jëmm jeek xol bi,  
di xaacul Yàlla jiy dund.
- <sup>4</sup> Éy Aji Sax ji Boroom gàangoor yi,  
sama buur, sama Yàlla,  
sawoor sax tag, nga fat ko,  
mbelaar it sàkk tàggam,  
denc i cuujam fa sa °sarxalukaay.
- <sup>5</sup> Ndokkleee ku dëkke sa kér,  
di la màggalati.

*°Selaw.*

- <sup>6</sup> Ndokkleee ku lay doolewoo,  
te namma topp njool ma jëm sa kér.
- <sup>7</sup> Buy jàll xuru Jooyoo,  
mu saf ko bëti ndox,  
céébo sànge xur wa barke,
- <sup>8</sup> muy gëna am doole,  
ba teewi fa Yàlla ca °Siyon.

- <sup>9</sup> Éy Yàlla Aji Sax ji Boroom gàangoor yi,  
déglul, ma ñaan la !  
Yàllay Yanqóoba, teewlu ma.
- <sup>10</sup> Éy Yàlla, geesul Buur, sunu kiirlaay,  
ngalla niiral kii nga fal.
- <sup>11</sup> Benn fan ci sab ètt de  
moo dàq junniy fan feneen.  
Sama taxawaayu bunt kér Yàlla  
moo ma gënal téraayu biir xaymab ku bon.
- <sup>12</sup> Aji Sax ji Yàllaa mat jant, mat kiiraay ;  
yiw ak daraja, Aji Sax ji joxe ;  
te du ngëneel lu muy bañal ku mat.
- <sup>13</sup> Éy Aji Sax ji Boroom gàangoor yi,  
ndokkleee ku la wóolu.

*Selaw.*

## Sabóor 85

Aji Sax ji, suqleeti nu

<sup>1</sup> *Mu jëm ci njiital jàngkat yi, di kàddug  
Sabóor, ñeel askanu Kore wu góor.*

<sup>2</sup> Éy Aji Sax ji, yaa baaxe woon sa réew mi,  
ba suqli sëti Yanqóoba yi,

<sup>3</sup> baal sa mbooloo seeni ñaawteef,  
jéggal léen bépp bàkkaar.

<sup>4</sup> Ba nga xadar ja,  
muñ mer ma.

<sup>°Selaw.</sup>

<sup>5</sup> Éy Yàlla mi nuy musal, suqli nu,  
te meddi.

<sup>6</sup> Xanaa doo nu mere fàww,  
ba ca sët yaak sëtaat ya ?

<sup>7</sup> Xanaa dinga leqli sa mbooloo,  
ba ñu man laa bànnexoo ?

<sup>8</sup> Éy Aji Sax ji, won nu sa ngor,  
baaxe nu sag wall.

<sup>9</sup> Woykat ba nee : « Naa déglu  
lu Aji Sax ji Yàlla di wax. »  
Jàmm lay wax wólléreem ñiy mbooloom,  
ba duñu dellu ci jéfi dof.

<sup>10</sup> Wallam aka jege ñi ko ragal,  
te leeram dégmél sunu réew mii !

<sup>11</sup> Ngor ak kólléree daje,  
njekk ak jàmm saafoonte,

<sup>12</sup> kóllére jebbee fa suuf,  
njekk séentoo asamaan,

<sup>13</sup> Aji Sax ji it maye ngéneel,  
sunu suuf meññal,

<sup>14</sup> njekk jiit Aji Sax ji,  
di ko xàllal yoonam.

**Sabóor 86****Ma ñaan, bésub njàqare*****1 Mu di ñaanu Daawuda.***

Éy Aji Sax ji, teewlu ma, nangul ma,  
damaa ñàkk, néew doole.

**2** Maa gore, musal ma ;  
maay sa jaam bi la wóolu,  
yaw, sama Yàlla, wallu ma.

**3** Éy Boroom bi, baaxe ma ;  
yaw laay yendoo woo wall.

**4** Boroom bi, bànnéexalal sab jaam,  
yaw laa dékk sama xol.

**5** Boroom bi, yaa baax, di bale,  
di nàddal sa ngor képp ku lay sàkku.

**6** Éy Aji Sax ji, teewlul, ma ñaan la ;  
déglul, ma tinu la.

**7** Bu ma la wooyee bésub njàqare,  
yaa may nangul.

**8** Boroom bi, doo moroomu tuur yi,  
te jëf melul ni sa jos.

**9** Boroom bi, mboolem xeet yi nga sàkk  
ñoo lay sujjóotsali,  
di màggal sa tur.

**10** Yaa màgg te yéemey jëf,  
yaw doñj yaa di Yàlla.

**11** Éy Aji Sax ji, won ma sa nammeel,  
ma doxe sa worma.  
May ma xol bu la wéetal.

**12** Boroom bi sama Yàlla,  
naa la sante xol bu fees,  
màggal la ba fàww.

**13** Ngor lu réy nga ma won,  
sorele maak tèraayu bàmmeel.

- <sup>14</sup> Éy Yàlla, nit ñu bew a ma jógal,  
def gàngoor gu néeg, di rëbb sama bakkan,  
te seetuñu la ci.
- <sup>15</sup> Waaye yaw Boroom bi Yàlla, yaay ñeewante, di  
yérém,  
yaa muñ mer, bare ngor ak worma.
- <sup>16</sup> Geesu ma, baaxe ma.  
Dooleelal sab jaam,  
wallul ki sa jaam sukk jur !
- <sup>17</sup> Ngalla def ma sa firndey mbaax,  
ba bañ yi gis ci, rus,  
ndax yaw Aji Sax, ji ma dimbali, dëfal ma.

### Sabóor 87

Siyonj, yaay ndeyu xeet yi

<sup>1</sup> *Ñeel askanu Kore wu góor, di woyu Sabóor.*

- Dëkkub Aji Sax ji, kenu yaa nga ca tund yu sell ya.
- <sup>2</sup> Aji Sax jee sopp bunti °Siyonj gii,  
mu gënäl ko fu askanu Yanqóoba dëkke.
- <sup>3</sup> Yaw, dëkkub Yàlla bi,  
tuddees na say jaloore. <sup>°Selaw.</sup>
- <sup>4</sup> Yàlla nee : « Ma limaale Misraak Babilon, ñi ma xam  
di dégg.
- Xoolal Filisti ak Tir, ak réewum °Kuus.  
Nit a ngii, juddoo fa, »
- <sup>5</sup> te teewul ñu cosaanale ko Siyonj,  
ne kii ak kee fa bokk juddoo,  
te Aji Kawe jee saxal Siyonj.
- <sup>6</sup> Aji Sax jeey lim xeet yi, limaale léen  
ne : « Kii fi la juddoo. » <sup>Selaw.</sup>
- <sup>7</sup> Kuy fecc ak kuy woy ànd naan :  
« Sunu cosaanoo cosaan fii la ! »

## Sabóor 88

Ma jàq, jooy

<sup>1</sup> *Muy woyu Sabóor, ñeel askanu Kore wu góor, jëm ci  
njiital jängkat yi, dëppook galan bu ñuy wax Maalat  
Leyanot, di taalifu Eman, mi bokk ci giiru Esra.*

<sup>2</sup> Éy Aji Sax ji, Yàlla ji may musal,  
bëccëg ma yuuxu,  
guiddi ma yuuxu fi sa kanam.

<sup>3</sup> Yal na sama ñaan àgg fa yaw ;  
teewlul, ma woote wall.

<sup>4</sup> Damaa suur këll ay musiba,  
ba soreetuma njaniiw,

<sup>5</sup> ñu sóoraale maak ñi wàcci biir bàmmeel.  
Ma mel ni jàmbaar ju kenn amatul yaakaar,

<sup>6</sup> bokk ci néew, yi dara waratul,  
mbaa ku ñu bóom, mu tèdd cim pax,  
faaleetoo ko, xanaa dagg ko, wacc.

<sup>7</sup> Tàbbal nga ma kàmb gu xóot,  
biir xóotey lëndëm.

<sup>8</sup> Yen nga ma sa xadar,  
tance ma sa gannax yépp.

°Selaw.

<sup>9</sup> Dàqal nga may xame,  
tax nga ñu séexlu ma ;  
ma tëju, génnatuma.

<sup>10</sup> Samay gët a ngi giim ndax naqar.  
Éy Aji Sax ji, maa ngi lay woo bés bu ne,  
dékk lay loxo.

<sup>11</sup> Ku dee, lu muy doyeeti say kéemaan ?  
Ndax néew dina jóg di la màggal ?

Selaw.

<sup>12</sup> Dees na siiwal sa ngor biir bàmmeel,  
mbaa sa worma ci pax um sànkute ?

<sup>13</sup> Ana kuy yég say kéemaan ci googu lëndëm ?  
Ku lay seedeel njekk réew ma fàtte faloo ?

- <sup>14</sup> Aji Sax ji, man, yaw lay woo wall,  
xëy, kare la gii ñaan, ne la :  
<sup>15</sup> Éy Aji Sax ji, loo may gàntale,  
di ma fuuylu ?  
<sup>16</sup> Mitit bay laatikaaf, sama ngone ba tey ;  
sa mbugal yu raglu, ba bopp ubu ràpp !  
<sup>17</sup> Sa mer mëdd ma,  
sa mbugal yu raglu sànk ma,  
<sup>18</sup> mëdd ma nim ndox bés bu ne,  
gëndoo fi sama kaw.  
<sup>19</sup> Dàqal nga ma soppeek xarit,  
ma far xejjoo lëndëm.

### Sabóor 89

Aji Sax ji, loo dige woon ?

<sup>1</sup> Muy taalif bu ñeel Etan mi bokk ci giiru Esra.

- <sup>2</sup> Aji Sax ji laay woye ngoram, ba fàww,  
di biral wormaam sét ba sétaat.  
<sup>3</sup> Dama ne, sa ngor dàkk la sax,  
fa asamaan nga dëël sa worma.  
<sup>4</sup> Aji Sax ji nee : « Damaa fas °kólléreek ki ma tànn,  
muy Daawuda sama jaam bi ma giñal ne ko :  
<sup>5</sup> « Damay saxal sa askan ba fàww,  
samp sab jal sét ba sétaat.” » <sup>°Selaw.</sup>
- <sup>6</sup> Aji Sax ji, waa asamaan a ngi lay sante say jaloore,  
ndajem ñu sell ña di la joobee sa worma.  
<sup>7</sup> Ana kuy dab-dabal Aji Sax ji, fa kaw-a-kaw ?  
Ana ci bindeeifi asamaan ku nirook Aji Sax ji,  
<sup>8</sup> Yàlla, ji ñu terala teral ci jataayu ñu sell ñi,  
te mu gëna raglu lu ko wér ?  
<sup>9</sup> Yàlla, Aji Sax ji Boroom gàngoor yi,  
Ki Sax, ana ku tollook yaw doole ?  
yaw mi worma féete fu ne !

- <sup>10</sup> Yaw yaa man géej gu sàmbaraax ;  
gannax ya fuddu, nga dalal.
- <sup>11</sup> Yaa fàdd Raxab<sup>w</sup>, bóom ko,  
tasaare say noon ci sa doole.
- <sup>12</sup> Yaa moom asamaan, yaa moom suuf.  
Àddinaak li ci biiram, yaa ko taxawal.
- <sup>13</sup> Bëj-gànnar ak bëj-saalum, yaa ko sàkk.  
Tabor ak Ermon, tund ya, di sarxollee sa tur.
- <sup>14</sup> Yaa àttan, jàmbaare ;  
sa loxo di dooley neen,  
sa ndijoor ca kaw !
- <sup>15</sup> Njekk ak njub a lal sab jal,  
ngor ak worma dox jiitu la.
- <sup>16</sup> Aji Sax ji, ndokkle mbooloo mu la xal di sarxollee,  
di niitoo saw yiw,
- <sup>17</sup> ànd di la bége bés bu ne,  
sag njekk siggal léen.
- <sup>18</sup> Seen darajay doole, yaw a.  
Boo nu baaxee, nu yokku kàttan.
- <sup>19</sup> Sunu kiirlaay lii, Aji Sax jeey boroom ;  
sunu buur bii, Aji Sell ji séddoo Israyil ay boroom.
- <sup>20</sup> Wax nga say wóllére ci peeñu,  
ne léen : « Tàinne naa jàmbaar ci xeet wi,  
dénk ko ndimbal.
- <sup>21</sup> Gis naa sama jaam Daawuda,  
fale ko sama diw gu sell,
- <sup>22</sup> ànd ak moom, saxal ko,  
di ko dooleel.
- <sup>23</sup> Noon du ko bett,  
ku bon du ko torxal.
- <sup>24</sup> Ay bañam, ma rajaxe ;  
ay noonam, ma fàdd,
- <sup>25</sup> sama wormaak sama ngor di ko gunge,

- may yokk kàttanam.
- <sup>26</sup> Géej, ma teg ci loxoom,  
dex, ma ne ca tegg ndijooram.
- <sup>27</sup> Moo ma naa : "Yaay sama baay,  
di sama Yàlla, di sama wéeru-mucc."
- <sup>28</sup> Te it maa koy def samab taaw,  
tiimale ko buuri àddina,
- <sup>29</sup> sàmmal ko sama ngor ba fàww,  
feddlil ko sama kóllëre.
- <sup>30</sup> Damay saxal askanam ba fàww,  
yàggal ab jalám ni asamaan.
- <sup>31</sup> Bu ay sétam wàccee sama yoon,  
baña doxe samay ndigal,
- <sup>32</sup> mbaa ñu xëtt sama dogali yoon,  
baña sàmmontEEK samay santaane,
- <sup>33</sup> ma bantale léen seen ug moy,  
dumaa léen seen ñaawteef.
- <sup>34</sup> Waaye duma ko daggal sama ngor,  
te duma ko ñàkke worma.
- <sup>35</sup> Duma fecci sama kóllëre,  
te duma toxal sama kàddu.
- <sup>36</sup> Benn yoon laa ko giñ ci sama sellnga,  
duma fen Daawuda :
- <sup>37</sup> askanam, dàkk ;  
ab jalám fi sama kanam ni jant bi,
- <sup>38</sup> ak weer wi sax ba fàww,  
dib seede bu wér ca niir ya. »
- <sup>39</sup> Ndaxam yaw Yàlla, jéppi nga ki nga fal,  
mere ko, wacc ko.
- <sup>40</sup> Fecci nga sa kóllëreek sab jaam,  
foq nguuram, detteel ko.
- <sup>41</sup> Bëtt nga miiram yépp,  
saam ay tataam,
- <sup>42</sup> ku fa jaare, jël ca alalam,  
mu doon mbalitu dëkkandoo yi.
- <sup>43</sup> Yékkati ngay bañam,

Selaw.

noonam yépp di ree.  
 44 Dayal nga saamaram,  
     te taxawuwloo ko cib xare.  
 45 Xañ nga ko darajaam,  
     rattax ngànguneem fa suuf.  
 46 Dagg nga fani ngoneem,  
     sang ko gàcce.

Selaw.

47 Éy Aji Sax ji, xanaa lii du jeex ?  
     Xanaa doo làqu fàww nii,  
     sa mer di boy ?  
 48 Bàyyi ma xel, samay fan yàggul.  
     Xanaa du neen a tax nga sàkk mboolem doom  
     aadama ?  
 49 Ana kuy dund te du dee ?  
     Ku mana rëcc téraayu bàmmeele ?  
 50 Boroom bi, ana sa ngor la nga daan jëfe  
     te nga giñale woon ko Daawuda ci sa worma ?  
 51 Boroom bi, bàyyil xel ci sa gàcce jaam ñi,  
     ak xeet yu bare yi ma yenu yépp.  
 52 Aji Sax ji, say noon a ngi sewal  
     buur bi nga fal, ne ko dann.  
  
 53 Cant ñeel na Aji Sax ji ba fàww.  
     Amiin, amiin.

Selaw.

## Sabóor 90

### Doom aadama yàggul

<sup>1</sup> *Muy ñaanu Musaa, góorug Yàlla ga.*

Boroom bi, yaa nu masa fat  
     maasoo maas.  
 2 Bala tund yee juddu,  
     bala ngay sos suuf ak àddina,  
     yaa mas di Yàlla, ba fàww.

- <sup>3</sup> Yaay delloo doom aadama ci pënd,  
ne ko : « Yaw, doom aadama, dellul ! »
- <sup>4</sup> Junniy at ci yaw  
daa gaaw ni démb ak tey,  
mbete waxtu yu néew ci wattub guddi.
- <sup>5</sup> Yaay buub nit, nelawal ko.  
Suba mu jebbi nim ñax,
- <sup>6</sup> xëy, jebbi, naat ;  
ngoon mu lax, wowal.
- <sup>7</sup> Soo meree kay, nu sàñku,  
nga xadaru, nu jàq.
- <sup>8</sup> Sunuy ñaawteef a ngi janook yaw,  
te sunu mbóot leer na la.
- <sup>9</sup> Sunu giiru dund nga di nu mere,  
sunuy fan jeex ni noo guy naaw.
- <sup>10</sup> Sunu àppu dund di juróom ñaar fukki at,  
ku dëgér ba dëgér, juróom ñett fukk ;  
li ci èpp di coonook u tiis,  
ne fëyy, nu wéy.
- <sup>11</sup> Ana ku xam sa dooley mer  
ak sa xadar ju raglu ?
- <sup>12</sup> Yal nanga nu xiir ci lim sunuy fan,  
ba nu mana dawal xel mu rafet.
- <sup>13</sup> Aji Sax ji, délsil, loo deeti xaar ?  
Ngalla yérëmal sa jaam ñi.
- <sup>14</sup> Nu xëy, nga reggal nu sa ngor,  
nuy sarxolle, bânnexoo ko sunu giiru dund.
- <sup>15</sup> Bânnexal nu limu fan yi nga nu mbugal,  
diiru ati tiis yi nu dund.
- <sup>16</sup> Yal na sa jaloore leer sa jaam ñi,  
sa daraja leer seeni doom.
- <sup>17</sup> Boroom bi sunu Yàlla, ngalla baaxe nu.  
Sottalal nu sunuy liggeey,  
rikk, sottalal nu sunuy liggeey.

## Sabóor 91

### Aji Sax jee mat kaaraange

- <sup>1</sup> Ku dëkke kiiraayu Aji Kawe ji  
yaa këroo keppaaru Aji Man ji.
- <sup>2</sup> Dama naa Aji Sax ji :  
« Yaw laay làqoo, di la fegoo ;  
ngay sama Yàlla ji ma doyloo. »
- <sup>3</sup> Kii kay moo lay musal cig fiir  
ak loraangey mbas.
- <sup>4</sup> Kiiraayam la lay sànge,  
nga yiiru, làqu ;  
wormaam yéew la, di la aar.
- <sup>5</sup> Doo ragal njàqarey guddi  
mbaa fittu bëccëg
- <sup>6</sup> mbaa mbas mu yooteq lëndëm,  
ak balaa buy fàdde njolloor.
- <sup>7</sup> Junni daanu fi sa wet,  
fukki junni (10.000) daanu fi sa ndijoor,  
du tax mu jege la.
- <sup>8</sup> Say gët nga ciy teg,  
di seetaan ku bon di jot yoolam.
- <sup>9</sup> Yaw mi màkkaanoo Aji Sax ji,  
Aji Kawe jii di sama rawtu,
- <sup>10</sup> genn loraange du la dab,  
balaa du jege sa xayma.
- <sup>11</sup> Ay malaakaam la lay booleel,  
ñu di la sàmm foo jëm.
- <sup>12</sup> Seeni loxo lañu lay meebe,  
ba doo fakkastaloow doj.
- <sup>13</sup> Dangay falaxe jaan ak gaynde,  
di rajaxe ñàngóor ak siibi.
- <sup>14</sup> Yàlla da naa : « Kii de man la safoo,  
ma di ko xetlli.  
Man la xam, te maa koy teg fu wóor.
- <sup>15</sup> Mu woo ma, ma wuyu ko ;

mook man ci biir njàqare,  
 ma xettli ko, darajaal ko,  
<sup>16</sup> reggal koy fan,  
 baaxe ko samag wall. »

### Sabóor 92

#### Nu woy bésub Noflaay

<sup>1</sup> *Muy woyu Sabóor ngir bésub Noflaay.*

- <sup>2</sup> Céy ngëneel li ci sant Aji Sax ji,  
 di la woy, yaw Aji Kawe ji,  
<sup>3</sup> xëye tudd sa ngor,  
 gonloo xamle sa worma,  
<sup>4</sup> xalamu fukki buum ànd ak moroom ma,  
 xeetu kooraa jibandoo.  
<sup>5</sup> Aji Sax ji, yaa ma bégale say jaloore,  
 may sarxolle ci say manoore.  
<sup>6</sup> Aji Sax ji, yaa réy i jëf ;  
 xóot i pexe.  
<sup>7</sup> Ku ñàkk xel réere ko,  
 ku dofe umple ko.  
<sup>8</sup> Bu ku bon sëqlee nim ñax,  
 képp kuy def lu bon di yokkule,  
 dañoo nara sàṅku ba fàww rekk.  
  
<sup>9</sup> Waaye yaw ma fa kaw,  
 yaay Aji Sax ji ba fàww.  
  
<sup>10</sup> Aji Sax ji, sa noon yi kay, ndeke yoo ;  
 ndeke yoo sa noon yi, sàṅku rekk ;  
 defkati mbon ñépp, félxoo rekk.  
<sup>11</sup> May nga ma dooley nagu àll,  
 ma diwoo diw gu bees.  
<sup>12</sup> Maa gis jellu noon yi,  
 dégg yuuxi ñu bon ñi may téri.  
<sup>13</sup> Ku jub day naat nig tändarma,

màgg ni seedaru Libaŋ  
 14 gu ñu jémbat biir kér Aji Sax ji,  
     muy naate sunu biir éttru Yàlla ;  
 15 bu màggatee sax di meññ,  
     tooy xepp, sëq lipp,  
 16 di biral njubtey Aji Sax ji,  
     sama cëslaay ji dencul njubadi.

### Sabóor 93

#### Ma bàkk Aji Sax ji

1 Aji Sax jeey buur, soloo daraja ;  
     Aji Sax jee solu, gañoo doole :  
         àddinaa ngii, déju te raful.  
 2 Sab jal a masa sax,  
     te yaa masa nekk.  
 3 Aji Sax ji, géej a riir,  
     géej a àddu, mu riir,  
     gannax ya rékk, mu riir.  
 4 Waaye riirum wal mu walangaanoo,  
     ak géej gu sàmbaraaxoo,  
     Aji Sax ja fa kaw a rawati !  
 5 Say santaanee wér te wóor ;  
     Aji Sax ji, sellnga la sa kér jagoo  
     bésoo bés.

### Sabóor 94

#### Yàllaay mbugal ku bon

1 Éy Aji Sax ji Yàlla, boroom mbugal !  
     Boroom mbugal, feqal sag leer !  
 2 Yaw miy àtte àddina, jógá  
     yool ku bew.  
 3 Aji Sax ji, fu ku bon kiy àkki ?  
     Fu ku bon kiy kañu àkki ?  
 4 Ñu ngi làmmiñoo reewande,  
     képp kuy def lu bon di damu.

- 5 Aji Sax ji, say ñoñ lañuy dëggaate ;  
     say séddoo lañuy néewal.  
 6 Jëtun ak ub doxandéem, ñu faat ;  
     ab jirim, ñu bóom,  
 7 te naa : « Ki Sax gisu ci,  
     Yàllay Yanqóoba jii yégu ko. »  
  
 8 Yéen bokk yu dofe yi, moytuleen.  
     Gàtt xel yi, kañ ngeen di muus ?  
 9 Ki jëmbat i nopp, da dul dégg a ?  
     Am ki xar i gët, da dul gis ?  
 10 Kiy yar yéefar yi, da dul mbugalee ?  
     Du mooy kiy xamal nit ?  
 11 Aji Sax ji xam na xalaatu nit,  
     xam ne cóolóolu neen la.  
  
 12 Ki Sax, ndokklee ki ngay yar,  
     täggat ko ci saw yoon,  
 13 dëfal ko ci bési safaan,  
     ba keroog ñuy gasal ku bon.  
 14 Boroom bi kat du wacc ñoñam mukk,  
     du bàyyi ay séddoom.  
 15 Àtte dina dellu laloo njekk,  
     képp ku jub topp ca.  
 16 Ana ku may taxawal ci ñu bon ñi ?  
     Ku may jógáli ci biir ñiy def lu bon ?  
 17 Su ma Aji Sax ji walluwloon,  
     tuuti ma fanaani réew ma ne selaw.  
 18 Dama noon : « Tarxiis naa ! »  
     Waaye yaa ma awoo sa ngor.  
 19 Ma bare xalaati xol,  
     nga dëfal ma, ma bég.  
 20 Loo séq ak njiit lu jubadi  
     luy yoonal njubadi ?  
 21 Nii dañoo mànkoo, di tëru ku jub,  
     di teg àtteb dee ku deful dara.  
 22 Waaye Aji Sax jeey sama rawtu,

sama Yàlla laay sës, làqu.  
<sup>23</sup> Moo léen di këpp seen ñaawteef,  
 sàanke léen seen ug mbon.  
 Sunu Yàlla Aji Sax jee léen di sànk.

### Sabóor 95

#### Kaayleen, nu sant

- <sup>1</sup> Kaayleen, nu sarxolleel Aji Sax ji,  
 nu xaacul ki nuy sës, mucc.
- <sup>2</sup> Nanu ko dikke cant,  
 woyal ko, mu riir.
- <sup>3</sup> Aji Sax jeey Yàlla ju màgg ji,  
 buur bu mag bi tiim yàllay xeet yépp.
- <sup>4</sup> Moo moom xóotey suuf,  
 moom colli tund yi,
- <sup>5</sup> moom géej, sàkk ko,  
 moom jéeri ji mu mooñ.
  
- <sup>6</sup> Nan sëgg, sujjóot,  
 sukkal Aji Sax ji nu sàkk.
- <sup>7</sup> Mooy sunu Yàlla,  
 nuy xeet wi tuy foral,  
 diy gàtt ciy loxoom.
  
- Bésub tey yal nangeen dégg kàddoom
- <sup>8</sup> ga mu noon : « Buleen tè, na woon fa Meriba,  
 jantub keroog fa Maasa, ca màndij ma,
- <sup>9</sup> fa ma seeni maam doon nattoo,  
 di ma seetlu te gis la ma def<sup>x</sup>.
- <sup>10</sup> Ñeent fukki at laa jéppi googu maas,  
 ma ne : “Xeet wu ñàkk wormaa ngi,  
 te faaleedi samay santaane.”
- <sup>11</sup> Moo ma taxa mer, ba giñal léen,  
 ne duñu tàbbi fa sama noflaay. »

x 95.9 Seetal ci Goreel ga 1.1-7.

**Sabóor 96**

Buur Yàllaa ngi àttesi àddina

- 1 Woyleen Aji Sax ji woy wu yees,  
te àddina yépp woy Aji Sax ji.
- 2 Woyleen Aji Sax ji, màggal turam,  
di yéene bés ak bés ne mooy musle.
- 3 Siiwal-leen teddngaam fi biir xeet yi,  
xamal waasoo waaso ay jalooreem.
- 4 Aji Sax jee màgg, jara santa sant  
te gëna mata ragal lépp lu ñuy jaamu.
- 5 Mbooleem yàlla yi xeet yi y jaamu, yàllantu la,  
waaye Aji Sax jee sàkk asamaan.
- 6 Màggay ak daraja, fa moom,  
dooleek taar, fa këram gu sell.
- 7 Yéen làngi xeet yi, seedeel-leen Aji Sax ji ;  
seedeel-leen Aji Sax ji teddngaak doole.
- 8 Seedeel-leen Aji Sax ji teddngay turam,  
yékkatil kob sarax, duggaale èttam.
- 9 Sujjóotal-leen Aji Sax ji làmboo sellnga,  
te àddina wérngal këpp di ko loxal.
- 10 Neleen xeet yi Aji Sax jeey buur :  
àddinaa ngii, dëju te raful.  
Mooy àtte xeet yi njub.
- 11 Asamaanoo, bégal ! Suufoo, bànnexul !  
Géejoo, riiral yaak li la fees,
- 12 te mbooy mi di jaayu, mook lu ci biiram,  
garabi àll bi sarxolleendoo,
- 13 gatandoo ko Aji Sax jiy dikk,  
àttesi àddina,  
di àtte dun bi njekk,  
tey àttee xeet yépp dëggam.

## Sabóor 97

### Nguuru Aji Sax ji njekk la

- 1 Aji Sax jeey Buur, na àddina bég ;  
dunoo dun bànnexu.
- 2 Ay xàmbaar a ko yéew,  
njekk ak njub lal ab jalam.
- 3 Sawaraa dox, jiit u ko,  
di xoyom i noonam wetoo wet,
- 4 ay melaxam leeral àddina,  
waa àddina gis, di pat-pati ;
- 5 tund yi ne soyox seey fi kanam Aji Sax ji,  
boroom àddina sépp.
- 6 Asamaan a ngi biral njekkam,  
xeetoo xeet di gis darajaam.
- 7 Gàcce ñeel na kuy jaamu jëmmi tuur,  
di puukarewoo ay yàllantu.  
Yéen yàllay xeet yépp, sujjóotal-leen kii,
- 8 °Siyon dégg ca, bég ;  
waa Yuda it di bànnexoo àttey Aji Sax jii.
- 9 Aji Sax ji, Aji Kawe ji tiim suuf sépp ;  
yaaka màgga màgg, ba sut tuuroo tuur.
- 10 Yéen soppey Aji Sax ji, bañleen lu bon.  
Aji Sax jeey sàmm i wóllëreem,  
di léen musal ci ku bon.
- 11 Jub, leerlu ;  
jugal, bég.
- 12 Yéen aji jub ñi, bànnexooleen Aji Sax ji,  
sante ko sellngam.

## Sabóor 98

### Woyleen Aji Sax jiy àttesi

<sup>1</sup>*Muy kàddug Sabóor.*

Woyleen Aji Sax ji woy wu yees,  
moo def i jaloore,

- kàttanam ak sellngay dooleem  
jox na ko ndam li.
- <sup>2</sup> Aji Sax jee xamleg wallam,  
feeñal njekkam, xeet yi gis.
- <sup>3</sup> Moo dencal °bànni Israyil ngoram,  
dencal ko wormaam,  
àddina ba mu daj di gis  
ni nu sunu Yàlla walloo.
- <sup>4</sup> Yéen àddina sépp, xaacul-leen Aji Sax ji,  
sampleen, sarxolle te woy !
- <sup>5</sup> Xalamal-leen Aji Sax ji, woyal ko,  
xalamal ko, woyati.
- <sup>6</sup> Wal-leen liit yi, wal bufta yi  
te xaacul Buur Aji Sax ji !

- <sup>7</sup> Na géej riirandook li ko fees,  
mook àddinaak li ci biiram,
- <sup>8</sup> dex tàccu,  
tund sarxolleendoo,
- <sup>9</sup> gatandoo ko Aji Sax jiy dikk,  
àttesi àddina,  
di àtte dun bi njekk,  
tey àttee xeet yépp dëgg.

### Sabóor 99

#### Aji Sax ji buur bu sell la

- <sup>1</sup> Aji Sax jeey Buur. Yéen xeet yi, ragal-leen ko !  
Moo toogandook malaakay °serub yi. Suufuu, soo  
yeboo, yëngu !
- <sup>2</sup> Aji Sax ji fi °Siyon a màgg,  
kawe, tiim xeetoo xeet.
- <sup>3</sup> Sa tur weeka màgg te raglu. Sàbbaal-leen ko.  
—Kee sell !
- <sup>4</sup> Buur, jëfe yoon mooy dooleem,  
te yaa saxal njub, yoon ak njekk

- ci askanu Yanqóoba.
- <sup>5</sup> Màggal-leen sunu Yàlla, Aji Sax ji,  
te sujjóot fa ndëggastalam.  
—Kee sell !
- <sup>6</sup> Musaak Aaróona bokk ciy °sarxalkatam,  
Samiyel bokk ca ñay tudd turam.  
Ñuy ñaan Aji Sax ji, mu di léen nangul.
- <sup>7</sup> Fa biir taxaaru niir wa la waxeek ñoom,  
ñu topp kàdduy seedeem ak dogalu yoonam ba mu  
léen joxoon.
- <sup>8</sup> Céy sunu Yàlla Aji Sax ji, yaa léen nanguloon,  
di seen Yàlla ju léen di baal,  
te di léen mbugale seeni jéf ju bon.
- <sup>9</sup> Màggal-leen sunu Yàlla, Aji Sax ji,  
te sujjóot fa tundam wu sell wa.  
—Sunu Yàlla Aji Sax jee sell !

## Sabóor 100

### Aji Sax jee baax

<sup>1</sup> *Muy jängi cant.*

- Yéen waa àddina sépp,  
xaacul-leen Aji Sax ji.
- <sup>2</sup> Nangeen jaamoo Aji Sax ji mbég,  
dikke koy woy !
- <sup>3</sup> Seedeleen ne Aji Sax jeey Yàlla.  
Moo nu sàkk, nuy ñoñam,  
di mbooloom, di gàttam yi muy foral.
- <sup>4</sup> Nangeen dugge kérám ag cant,  
dugg èttam di màggal,  
sant ko, teral turam.
- <sup>5</sup> Aji Sax jee baax, gore ba fàww,  
worma ja sax dàkk !

## Sabóor 101

Buur a ngi jaayanteek Yàlla

*1 Ņeel Daawuda, di kàddug Sabóor.*

- Ngor ak yoon laay woy.  
 Yaw Aji Sax ji laay joobe.  
 2 Naa teewlu yoonu maandute.  
 Ana kañ nga may dikkal ?  
 Naa doxe maandute  
 fi sama biir waa kér.  
 3 Caaxaani neen, xooluma ;  
 jéf ju wàcc yoon, bugguma,  
 taquma fenn.  
 4 Kuy nas njekkar, sore ma ;  
 lu bon, xawma ko.  
 5 Kuy jéw moroomam, ma wedamat ;  
 ku danjìiral ak ku reew, muñaluma la.  
 6 Ku dëggü ci réew mi, ma geesu,  
 ngir fat ko.  
 Te kuy wéye maandute,  
 kookoo may liggéyal.  
 7 Kuy njublañ du tooge sama kér,  
 kuy fen du taxaw sama kanam.  
 8 Maay xëy, sànk képp ku bon ci réew mi,  
 ngir dagge ci dékkub Aji Sax jii képp kuy def lu  
 ñaaw.

## Sabóor 102

Yàlla, bu ma rey

*1 Muy ñaanu néew-ji-doole ju sonn, bay  
 diis Aji Sax ji njàqareem.*

- 2 Éy Aji Sax ji, déglul, ma ñaan la ;  
 yal na sama yuux àgg fa yaw.  
 3 Bu ma dummóoyu bésub njàqare ;

- teewlu ma,  
gaaawe ma sama bésub woote !
- <sup>4</sup> Samay fan a ngi wéy ni saxar,  
sama yax yi mel nib taal.
- <sup>5</sup> Sama xol bi wow ni ñax mu xuur,  
ba lekk safatu ma.
- <sup>6</sup> Damaa jàq, di onka onk,  
ba desey yax.
- <sup>7</sup> Ma mel nim tan ci mändij mi,  
mbete looy cib gent.
- <sup>8</sup> Nelaw të;  
ma mel ni picc mu wéetoo puju néeg.
- <sup>9</sup> Bés bu ne noon yi di ma sewal ;  
ñi may ñaawal di móoloo sama tur.
- <sup>10</sup> Lekkuma xanaa di diwoob dóom, toroxloo ;  
te lu ma naan, tuur ca rongooñ,
- <sup>11</sup> te sa mer ak sa xadar a tax,  
nde yaa ma fab, xalab.
- <sup>12</sup> Ker a ngi law, nara médd samay fan.  
Maa ngi wowat nim ñax.
- <sup>13</sup> Waaye yaw Aji Sax ji, yaay des ba fàww,  
saw tur saxal maasoo maas.
- <sup>14</sup> Yaw yaay taxaw, ñeewante °Siyonj,  
ndax baaxe ko jot na,  
àpp ba kay mat na.
- <sup>15</sup> Sa jaam ñeeka sopp doji dëkk bii ñu màbb,  
ñoo ñeewante tojiti gentam bii.
- <sup>16</sup> Na xeet yi wormaal turu Aji Sax ji,  
buuri àddina sépp wormaal darajaam,
- <sup>17</sup> nde Aji Sax jeey tabaxaat Siyonj,  
nara feeñeg leeram.
- <sup>18</sup> Mooy nangul aji tumurànke,  
xeebul ñaanam.
- <sup>19</sup> Nañu bindal lii maasug èllég,  
ba xeet wu sosoogul màggal Ki Sax,
- <sup>20</sup> nde Aji Sax jeey jéere fu sellam fa ca kaw,

- di niire suuf fa asamaan,  
 21 ngir teewlu onki ñi ñu téj,  
     nara ubbi ñi dee di seen àtte,  
 22 ba ñu siiwal turu Aji Sax ji fi Siyoñ,  
     màggale ko fi Yerusalem,  
 23 kera ba xeet yi y bokk daje,  
     ñook réew yi, ngir jaamu Aji Sax ji.
- 24 Sama digg doole la ma semmale,  
     gàttal samaw fan.  
 25 Ma ne : « Éy sama Yàlla, maasoo maas, say at du jeex.  
     Bu ma yóbboo sama diggi fan.  
 26 Bu yàgg nga samp suuf,  
     sàkke asamaan say yoxo.  
 27 Ñoom ñuy jeex, yaw nga sax,  
     ñoom ñépp ràpp ni mbubb,  
     nga soppi léen niy yére, sànni ;  
 28 te yaw ngay kenn ki,  
     te say at amul kem.  
 29 Sa doomi jaam ñeey dëkk ;  
     seen askan sax fi sa kanam. »

### Sabóor 103

#### Ma sant Aji Sax ji

<sup>1</sup> *Ñeel Daawuda.*

- Naa sant Aji Sax ji ci saa xol bii,  
     saa jëmm jépp di sàbbaal sellngay turam !  
 2 Naa sant Aji Sax ji ci saa xol bii,  
     te baña fàtte mboolem xéewalam !  
 3 Moo lay baal foo ñaawe,  
     di la wéral foo woppe.  
 4 Mooy jot sa bakkan,  
     kaala la ngor ak yérmande,  
 5 di reggal sa bakkan bànnex,  
     yeesalal lag ndaw,

nga màggataale doole nig jaxaay.

<sup>6</sup> Aji Sax jeey def njekk,  
di àtte jépp néew-ji-doole.

<sup>7</sup> Moo xamal Musaa ay nammeelam,  
xamal °bànni Israyil ay jéfam.

<sup>8</sup> Yérmandeek u yiw, fa Aji Sax ji.  
Moo muñ mer te bare ngor.

<sup>9</sup> Saxoowul di toppe,  
dencul mer ba fàww.

<sup>10</sup> Du sunuy bákkaar la nu mbugal,  
du sunuy ñaawteef la nu fey.

<sup>11</sup> Ni asamaan tiime suuf,  
ni la ngoram yiire ku ko ragal.

<sup>12</sup> Ni penku soree sowu,  
ni la nu soreleek sunu mbugali tooñ.

<sup>13</sup> Ni baay yérëme doom,  
ni la Aji Sax ji yérëme ku ko ragal.

<sup>14</sup> Moo xam sunu bind,  
di bàyyi xel ne pënd lanu.

<sup>15</sup> Nit ak i fanam di saxayaay  
suy law ni tóor-tóoru àll ;

<sup>16</sup> ngelaw li wal, mu ne mes,  
mel ni masu faa nekk.

<sup>17</sup> Waaye ngoru Aji Sax ji naka jekk  
ñeel na fàww ku ko ragal ;  
njekkam ñeel sëtaati

<sup>18</sup> kuy sàmm °kólliëreem,  
di saxoo jëfe tegtali yoonam.

<sup>19</sup> Aji Sax jee samp asamaan ab jalám,  
nguuram ñank lépp.

<sup>20</sup> Yéen malaaka yi, santleen Aji Sax ji,  
yéen jàmbaar yu mag yi yéfe ndigalam,  
di sàmm kàddoom.

<sup>21</sup> Santleen Aji Sax ji, yéen mboolooy xareem yépp,

yéen dagam yiy jëfe coobareem.  
 22 Yéen bindeeif yépp, nangeen sante Aji Sax ji  
 fépp fu mu tiim.  
 Naa sant Aji Sax ji ci saa xol bii !

### Sabóor 104

#### Màggal-leen ki sàkk lépp

- 1 Naa sant Aji Sax ji ci saa xol bii !  
 Aji Sax ji sama Yàlla, yaaka màggga màgg.  
 Teddngaak daraja nga soloo,
- 2 làmboo leer ni mbubb,  
 firi asamaan ni ndimo,
- 3 xadd say néegi kaw ci biir ndox mi,  
 def niir yi say waruwaay,  
 di daagoo kaw laafi ngelaw,
- 4 def ngelaw yi say ndaw,  
 ay sawara boy, di say jawriñ.
- 5 Yaa dëj suuf ciy kenoom,  
 deesu ko yëngal ba fàww.
- 6 Yaa ko sànge xóotey géej ni mbubb,  
 ndox ma taxaw, tiim tund ya.
- 7 Nga gëdd, ndox ma fëx ;  
 nga dënu, mu daw,
- 8 wale kaw tund ya, wàccsi xur ya,  
 di bérab ba nga ko beral.
- 9 Aw dig nga teg, du ko weesu,  
 te dootul muur suuf si.
- 10 Yaa ballal bëti ndox ya ca xur ya,  
 ñuy wale digg tund ya,
- 11 ngay nàndal bépp ndundatu àll,  
 di wëgg mbaam-sëfu àll,
- 12 njanaaw dëkke ca wet ga,  
 baatam jibe fa garab ya.
- 13 Yaa suuxate tund ya fa sa néegi kaw,  
 sa liggéey reggal suuf.

- 14 Yaa saxalal jur gi ñax  
ak gàncax gu doom aadama di bey,  
ba génnee ab dund fi suuf,
- 15 dugub di ko dooleel,  
biiñ di bégal xolam,  
ag diw di leeral kanamam.
- 16 Garabi Aji Sax ja, seedari Libaŋ,  
ya mu jémbat, regg nañu,
- 17 picc tágge ca,  
xodd dékke garab gu dul ruus,
- 18 tund wu mag ñeel kewéli àll,  
xunti di rawtub daman<sup>y</sup>.
- 19 Yaa sàkk weer, muy takku jamono,  
sàkk jant, mu xam waxtuw fatoom.
- 20 Yaa def lëndëm, mu guddi ;  
bépp rabu àll di ca dox,
- 21 gaynde gu ndaw ñaral am pàddam,  
di sàkkoo dundam fa Yàlla.
- 22 Bu jant fenkee, ñu dellu,  
goori ca seeni pax,
- 23 doom aadama tàmbali kér-këram,  
di yendoo liggeeey ba ngoon.
- 24 Éy Aji Sax ji, yaa bare loo liggeeey,  
te lépp di xel mu rafet.  
Suuf daa fees ak say càkkeef.
- 25 Géej a ngee réy te yaa,  
la fay yëngu maneesu koo lim,  
muy ndundat lu mag ak lu ndaw.
- 26 Fa la gaal di daw,  
ak ngaaka la nga bind, mu di fa foye.
- 27 Ñoom ñépp yaw lañuy séentu,  
ngir bu jotee, nga leel léen,
- 28 may léen lu ñu for ;  
ñébal léen, ñu suur ngëneel.

- <sup>29</sup> Soo léen làqoo, ñu tiit ;  
nga rocci seen noo, ñu saay,  
dellu di pënd.
- <sup>30</sup> Yaay yónnee sag noo, ñu nekk ;  
te yaay yeosal li ci kaw suuf.
- <sup>31</sup> Yal na darajay Aji Sax ji sax,  
yal na Aji Sax ji bégey jalooreem.
- <sup>32</sup> Kee naan jàkk suuf, muy lox ;  
mu laal tund yi, ñuy saxar !
- <sup>33</sup> Naa woy Aji Sax ji li feek may dund,  
naa kañ sama Yàlla li feek may tooy.
- <sup>34</sup> Sama xalaat bii, yal na ko neex.  
Man de maa ngi bége Aji Sax ji !
- <sup>35</sup> Yal na bàkkaarkat raaf fi kaw suuf,  
te ku bon noppee nekk.  
Naa sant Aji Sax ji ci saa xol bii.  
Màggal-leen Ki Sax !

### Sabóor 105

#### Aji Sax ji sàmm na kóllére

- <sup>1</sup> Santleen Aji Sax ji, tudd turam,  
xamley jalooreem ci biir xeet yi,
- <sup>2</sup> woy ko, tagg ko,  
yégle mboolem i kéemaanam !
- <sup>3</sup> Damooleen turam wu sell.  
Kuy wut Aji Sax ji, yal na am bànnexu xol.
- <sup>4</sup> Gëstuleen Aji Sax jeek dooleem,  
di ko sàkku saa su ne.
- <sup>5</sup> Fàttlikuleen ay jalooreem  
ak i misaalam ak i àtteem.
- <sup>6</sup> Yéen askanu Ibraayma, jaamam ba,  
yéen ñiy sëti Yanqóoba, ñiy tànneefam,
- <sup>7</sup> kee di sunu Yàlla Aji Sax ji,  
di àtte suuf sépp,
- <sup>8</sup> di fàttliku ba fàww °kólléreem,

di bàyyi xel ba ci junniy maas kàddoom  
 9 ga mu digoon Ibraayma,  
 giñal ko Isaaxa,  
 10 dëggalal ko Yanqóoba, sàrtal ko,  
 fase kook Israyil mooma kóllére gu sax.  
 11 Mu ne : « Yaw laay jox réewum Kanaan,  
 muy sa cér, nga séddoo. »  
 12 Ba °bànni Israyil dee ñu néew,  
 diy doxandéem ca réew ma,  
 13 di wëreelu ci biir xeetoo xeet,  
 ak nguuroo nguur,  
 14 mayul nit mu not léen,  
 te yaral na léen ay buur,  
 15 ne léen : « Buleen laal samay tàngneef,  
 buleen lor samay yonent. »  
 16 Moo wàcce ab xiif ca réew ma,  
 dagge fa luy gub,  
 17 yónnee ku léen jiitu,  
 muy Yuusufa ma ñu jaayoon njaam,  
 18 tànk ya, ñu jéng jéng yu tar,  
 baat ba, ñu yeewe caqu weñ.  
 19 Kàddug Aji Sax ji di nattu Yuusufa,  
 ba keroog pirim ma dikk,  
 20 Buur a yónni ku ko yiwi,  
 ku yilif i xeet a ko tijji.  
 21 Mu sas ko mu jiite këram,  
 di saytu mboolem alalam,  
 22 ba saña ténk jawriñi buur ci coobareem,  
 tey xelal mag ña.  
 23 Israyil agsi Misra,  
 muy nganug Yanqóoba ga ca réewum Xam<sup>z</sup>.  
  
 24 Aji Sax ji giiral xeetam wa,  
 ba ñu gëna bare seeni noon,  
 25 mu xiir waa Misra ci dëddu mbooloom,

<sup>z</sup> 105.23 Israyil ak Yanqóoba, kenn ki la ; réewum Xam mooy Misra ba tey.

- ñuy fexeel jaamam ñooña.
- <sup>26</sup> Mu yónni Musaa, jaamam ba,  
tànn Aaróona, boole ca,
- <sup>27</sup> ñu sottal ci seen biir firndeem ya mu waxoon,  
muy kéemaan ya ñu def ca réewum Xam.
- <sup>28</sup> Moo yónnee lëndëm, lëndëmal,  
te Musaa ak Aaróona gàntaluñu kàddoom.
- <sup>29</sup> Moo soppi seen ndoxum réew deret,  
rey seeni jén,
- <sup>30</sup> feesal seen réew ay mbott  
yu àkki seen biir néegi buur ya.
- <sup>31</sup> Moo àddu, weñ ya dikk,  
rayentaan ya dajal seen réew ma.
- <sup>32</sup> Mu def seen ub taw tawub yuur,  
sawaray melax jafal seen réew ma.
- <sup>33</sup> Mu dóor seen figg ak reseñ,  
fóom seen garabi réew ma.
- <sup>34</sup> Mu àddooti, ay socct dikk,  
di njéeréer yu weesu lim,
- <sup>35</sup> ñu lekk luy gàncax ca seen um réew,  
lekk lu suuf sa meññ.
- <sup>36</sup> Moo fàdd luy taaw ca seen um réew,  
muy lu jékka soqekoo seen digg doole.
- <sup>37</sup> Mu génne léen, ñu yóbbale xaalis ak wurus,  
te kenn tèréful ca seeni giir.
- <sup>38</sup> Misra daa bég ba ñu demee  
ndax tiitaange lu ñu léen tiital.
- <sup>39</sup> Mu firiw niir, yiire léen,  
ak sawara, ñu niitoo guddi.
- <sup>40</sup> Ñu sàkku, mu wàccey picci pérëntaan,  
teg ca reggal léen mburum asamaan.
- <sup>41</sup> Mu bënn u doj, ndox ma ball,  
di dex, wale joor gu wow.
- <sup>42</sup> Daa bàyyi xel kàddoom gu sell,  
ga mu waxoon Ibraayma, jaamam ba.
- <sup>43</sup> Moo génne mbooloom, ñu bég,

moo génne tànneefam ñia, ñuy sarxolle.  
 44 Mu jox léen suufi yéefar ya,  
 ñu jagoo ñaqi xeet ya,  
 45 ngir ñu sàmm ay dogali yoonam,  
 topp ndigali yoonam.  
 Måggal-leen Ki Sax !

### Sabóor 106

#### Israyil di wor, Yàlla di wóor

- 1 Måggal-leen Ki Sax !  
 Santleen Aji Sax ji, kee baax,  
 kee saxoo ngoram !
- 2 Ana ku mana tudd jaloorey Aji Sax ji ?  
 Ana ku mana teesal woyam ?
- 3 Ndokklee kuy sàmm yoon,  
 di def njekk fu mu toll.
- 4 Éy Aji Sax ji, séddaale ma ci sa yiwu ñoñ,  
 ngalla, dikke ma sag wall,
- 5 ma gis ngëneelu ñi nga tànn,  
 di bànnexoo sa bànnexu xeet wi,  
 tey damoondook ñoom ñi nga séddoo.
- 6 Noo bákkaar, nook sunuy maam ;  
 noo def lu ñaaw, def lu bon.
- 7 Sunuy maam seetuñu ca say kéemaan ca Misra,  
 bàyyiwuñu xel ca sa ngor lu réy,  
 xanaa di fippu ca géej ga, géeju Barax ya.
- 8 Teewul Yàlla wallu léen ngir turam,  
 ba xamle njàmbaram.
- 9 Dafa gëdd géeju Barax ya, mu ne sereñ;  
 xóotey géej mel ni mändin, mu jàlle léen,
- 10 musal léen ci loxol bañaale,  
 jote léen ca loxol noon ba,
- 11 ndox ma mëdd bañ ya,  
 kenn desu ca.
- 12 Ca lañu gëm ay waxam,

woy ko.

- 13 Nes tuut ñu fàtte jèfam ja,  
xaaratuñu ndigalam,
- 14 di ñaf-ñafi ca màndij ma,  
di diijat Yàlla ca àll ba.
- 15 Yàlla jox léen la ñuy sàkku,  
wàccaaaleel léen woppi ràgg.
- 16 Ba ñu demee ba iñaane Musaa ca dal ba,  
boole ca Aaróona mu sell ma, nitu Aji Sax ja,
- 17 suuf a ne ñafeet, wonn Datan<sup>a</sup>,  
mëddaale gàngooru Abiram ;
- 18 sawara ne jippét fa seen biir,  
tàkk ba lakk ñu bon ñooña.
  
- 19 Tègg nañu aw nag ca tundu Oreb,  
di sujjóotal jémm ju ñu móol,
- 20 di jénde seen teddngay Yàlla ja  
jémmu nag wuy for um ñax.
- 21 Dañoo fàtte Yàlla ma léen di musal  
te def jaloore ca Misra.
- 22 Mooy kéemaan ya fa réewum Xam<sup>b</sup>,  
kiraama ya ca géeju Barax ya.
- 23 Yàlla da léen doon sànk,  
bu dul woon ak Musaa, xejjam  
ba ko kar, àtte léen,  
mu giif, ba fàkkasu léen.
  
- 24 Dañoo gàntal réew mu neex,  
gëmuñu kàddug Yàlla,
- 25 xanaa di xultoo seen biiri xayma,  
baña déggal Aji Sax ji.
- 26 Moo tax mu giñal léen  
ne dina léen téral fa màndij ma,
- 27 téral seen askan ci biir xeet yi,

**a** 106.17 *Datan* : seetal ci Màndij ma 16.27, 31-33.   **b** 106.22 *réewum Xam* mooy Misra ba tey.

wasaare léen ci réew yi.

- <sup>28</sup> Ñuy darook tuurum Baal Pewor,  
di lekk lu ñu sarxal ay yàlla yu amul bakkán,  
<sup>29</sup> di merloo Yàlla ci seeni jëf,  
ba mbas ne dàll fa seen biir.  
<sup>30</sup> Fineyas taxaw, àtte ;  
mbas ma dal,  
<sup>31</sup> muy njekk lu ñu ko waññal  
tey ak èllèg.
- <sup>32</sup> Nu merlooti Yàlla ca ndoxum Meriba ma,  
muy loraangey Musaa te ñoo ko waral.  
<sup>33</sup> Ñoo naqaral Musaa,  
ba mu wax wax ju ko rëcc.
- <sup>34</sup> Te it faagaagaluñu yéefar,  
ya léen Aji Sax ji waxoon,  
<sup>35</sup> xanaa di jaxasook yéefar yooya,  
di roy seeni jëf,  
<sup>36</sup> di jaamu seeni tuur,  
mu mujj dig fir ca ñoom.  
<sup>37</sup> Ñuy sarxalal rab ya  
seen doom yu góor ak yu jigéen,  
<sup>38</sup> di tuur deretu ñu deful dara,  
te muy seen deretu doom yu góor ak yu jigéen  
ya ñu sarxalal tuuri Kanaaneen ña,  
deret ja sobeel réew ma,  
<sup>39</sup> seeni jëf sobeel léen,  
ndax seen bokkaale.
- <sup>40</sup> Aji Sax ji mere mbooloom,  
sib xeet woowu mu séddoo,  
<sup>41</sup> ba tax mu teg léen ca loxol yéefar ya,  
seeni bañ yilif léen,  
<sup>42</sup> seen noon ya not léen,  
ñu torox ca seeni loxo.

- <sup>43</sup> Ay yooni yoon la léen xettli,  
waaye ñuy nas pexey fippu,  
ba suux ci seeni ñaawteef.
- <sup>44</sup> Waaye mu gis seen njàqare,  
dégg seeni tinu,
- <sup>45</sup> bàyyi xel ci °kólléreem ak ñoom,  
topp ngoram gu réy, ba giif,
- <sup>46</sup> xiir ña léen jàpp ñépp,  
ñu yérém léen.
- <sup>47</sup> Éy Aji Sax ji, sunu Yàlla, wallu nu,  
génnee nu ci xeet yi, dajale nu,  
nu sante la sa sellnga,  
di sagoo sa teddnga.
- <sup>48</sup> Santleen Aji Sax ji, Yàllay Israyil  
cant gu sax dàkk, ba fàww.  
Na ñépp ne : « Amiin ! »  
Màggal-leen Ki Sax !

### Sabóor 107

#### Aji Sax jeey xettleee

- <sup>1</sup> Santleen Aji Sax ji, kee baax,  
kee saxoo ngoram !
- <sup>2</sup> Waxleen lii, yéen ñi Aji Sax ji jot,  
jote leen ci loxol bañ,
- <sup>3</sup> dajalee leen fa réew ya,  
jèle leen penkook sowu,  
ak bëj-gànnar ak wetu géej.
- <sup>4</sup> Nee ngi taxawaaloo màndij mu wéet,  
gisuñu dëkkuwaay,
- <sup>5</sup> boole xiif ak mar,  
ba bakkan di tàggoo.
- <sup>6</sup> Nu jàq, woo Aji Sax ji wall,  
mu xettleee léen seen njàqare,
- <sup>7</sup> jaarale léen yoon wu jub,

- ngir ñu àgg cib dëkk.  
 8 Nañu sante Aji Sax ji ngoram  
   ak kéemaanam yi ñeel doom aadama yi.  
 9 Mooy mändal put gu wow,  
   di feesal ngëneel biir bu wéet.
- 10 ~Nee ngi dëkke lëndëm gu tar,  
   ñu yeewe léen jéngi weñ yu tar.  
 11 Noo gàntal waxi Yalla,  
   néewal ndigalal Aji Kawe ji.  
 12 Mu teg léen naqar, ba torxal léen,  
   ñu ne nérëm te kenn walluw léen.  
 13 ~Nu jàq, woo Aji Sax ji wall,  
   mu walloo léen seen njàqare,  
 14 xar seeni jéng yaar,  
   génnee léen lëndëm gu tar.  
 15 Nañu sante Aji Sax ji ngoram  
   ak kéemaanam yi ñeel doom aadama yi.  
 16 Moo rajaxe bunti xànjär,  
   damm galani weñ.
- 17 ~Nu dofe ñalee ngi topp yoonu moy,  
   loroo seeni ñaawteef,  
 18 ba luy ñam di daw seen yaram,  
   ñu jege bunti ndee.  
 19 ~Nu jàq, woo Aji Sax ji wall,  
   mu walloo léen seen njàqare.  
 20 Daa yónnee kàddoom, wéral léen,  
   këfe léen cim yeer.  
 21 Nañu sante Aji Sax ji ngoram  
   ak kéemaanam yi ñeel doom aadama yi.  
 22 Nañ ko sarxal °saraxi cant  
   tey sarxolle, siiwale koy jalooreem.
- 23 ~Na ca des a ngi war gaal, dugg géej,  
   di liggéeye mbeex mu ne xéew.  
 24 ~Nooñoo seede jaloorey Aji Sax ji,

- ak kéemaanam ya fa xóote ya.  
 25 Day àddu, sant ngélén,  
     mu yékkati gannax yi.  
 26 Gannax ya fettax ba ca kawli kaw,  
     xàwwikoo fa, tàbbi xóote ya.  
     Ñu jàq ba fit ne soyox,  
 27 di jang, di kayaŋ-kayaŋi niy màndikat,  
     pexe jeex.  
 28 Ñu jàq, woo Aji Sax ji wall,  
     mu génnee léen seen njàqare,  
 29 dalal ngélén la,  
     gannax ya selaw,  
 30 ne tekk, ñu bég,  
     mu gindi léen ba fa ñu bëgga teer.  
 31 Nañu sante Aji Sax ji ngoram  
     ak kéemaanam yi ñeel doom aadama yi.  
 32 Nañu ko kañe ndajem mbooloo mi,  
     di ko màggale péncu mag ñi.  
  
 33 Mooy soppi wali ndox màndij,  
     soppi bëti ndox suuf su ne sereŋ,  
 34 suuf su nangu doon jooru xorom  
     ndax mbonug ña ko dëkke.  
 35 Mooy soppi màndij it, ndox ya taa,  
     soppi suuf su ne sereŋ bëti ndox ;  
 36 dëël fa ñu xiif,  
     ñu sanc fab dëkk, dëkke,  
 37 ji ay tool, jëmbat i reseñ,  
     mu meññ, ñoral,  
 38 Aji Sax ji barkeel, ñu giira giir,  
     te wàññiwul seen ug jur.  
 39 Bu ñu wàññikoo, ba néew doole  
     ndax noteel ak coonook u tiis,  
 40 Aji Sax ji sib seen njiit yi léen not,  
     wérloo léen àll bu amul yoon.  
 41 Waaye mooy teggil néew-ji-doole coonoom,  
     ful njabootam nig jur,

- <sup>42</sup> aji jub ñi gis ko, bég ;  
mboolem ku bon wedam.  
<sup>43</sup> Ku xelu ku ne, na ràññee lii  
te seede li Aji Sax ji jéfe ngoram.

### Sabóor 108

Yàlla, may nu ndam

<sup>1</sup> *Muy woyu Sabóor, ñeel Daawuda.*

- <sup>2</sup> Yàlla, dogu naa,  
damay woy, di la kañ;  
sama jémm jépp di la woy.  
<sup>3</sup> Na mboolem xalam yewwu,  
ma yee leeru njél.  
<sup>4</sup> Aji Sax ji, dama lay gérém ci biir xeet yi,  
kañ la ci biir waaso yi.  
<sup>5</sup> Sa ngor a màgg ba sut asamaan,  
sa worma àkki fa kaw-a-kaw.  
<sup>6</sup> Éy Yàlla, yaa màgg ba sut asamaan,  
sag leer tiim suuf sépp.  
  
<sup>7</sup> Walloo nu sa ndijoor,  
nangul ma,  
ba say soppe xettliku.  
<sup>8</sup> Yàllaa àddoo fa këram gu sell,  
ne : « Maay damu, dogat suufas Sisem,  
séddale xuru Sukkoot.  
<sup>9</sup> Maa moom diiwaanu Galàdd, moom Manase,  
Efrayim di sama mbaxanam xare,  
Yuda di sama yetu nguur,  
<sup>10</sup> réewum Mowab di sama ndabal raxasukaay,  
Edom, ma teg tànk ;  
Filisti, ma xaacoo fa. »  
  
<sup>11</sup> Éy Yàlla, ana ku may yóbbu dëkk ba tata wër ?  
Ku may jiite ba Edom ?

- <sup>12</sup> Yàlla, xanaa du yaa nu wacc ?  
 Éy Yàlla, yaa baña ànd ak sunu mboolooy xare ?  
<sup>13</sup> Ngalla dimbali nu ci bañaale ;  
 doom aadama, wallam neen la.  
<sup>14</sup> Nook Yàlla, nu def njàmbaar ;  
 moom mooy not sunuy noon.

### Sabóor 109

#### Yal na Yàlla mbugal noon bi

<sup>1</sup> *Mu jëm ci njiital jàngkat yi, ñeel Daawuda, di kàddug Sabóor.*

- Éy Yàlla mi may sant, bul tanqamlu !  
<sup>2</sup> Ku bon ak kuy fen a ma waxal,  
 sosal ma,  
<sup>3</sup> tance ma kàdduy mbañeel,  
 song ma ci dara.  
<sup>4</sup> Ma ji nit cofeel, mu sosal ma ;  
 te man ma di ko ñaanal.  
<sup>5</sup> Sama jëf ju baax, loraange lañu ma ko feye,  
 sama cofeel, ñu feye ma ko mbañeel.  
  
<sup>6</sup> Yal nanga fal ku bon ci kaw kii,  
 ab soskat féete ko ndijoor.  
<sup>7</sup> Bu ñu koy àtte, yal nañu ko yey,  
 te yal na ñaanam walbatiku di bákkaar.  
<sup>8</sup> Yal naw fanam gàtt,  
 keneen jagoo sasam.  
<sup>9</sup> Yal nay doomam diy jirim,  
 jabaram dib jëtun,  
<sup>10</sup> ay doomam di tambaambaluy yalwaan,  
 dëddu seeni gent, dem tållal i loxo.  
<sup>11</sup> Yal na ko kuy feyeku futti,  
 ay doxandéem foqati ñaqam.  
<sup>12</sup> Yàlla bu ko kenn ji ngor,  
 yàlla bu kenn baaxe jirim yi ko wuutu.  
<sup>13</sup> Yal na askanam dagg.

- Bala geneen maas a wéy, yal na seen u tur fey.
- <sup>14</sup> Yal na Aji Sax ji bàyyi xel ñaawteefi maamam.  
Yàlla bu bákkaaru ndeyam faru.
- <sup>15</sup> Yal na seeni moy sax fi kanam Aji Sax ji.  
Yal na seen tur dagge fi kaw suuf.
- <sup>16</sup> Moo séddul ngor,  
di topp ku néewle te sonn,  
seen xol jeex, mu bóom.
- <sup>17</sup> Moo bëggooon di móoloo, yal na ko këppoo ;  
soppul ag ñaan it, yal na ko barke sore.
- <sup>18</sup> Móolook sol mbubb la yemale,  
yal nañu duy nim ndox ay móoloom ci yaramam,  
mu seeb ci biiri yaxam nig diw.
- <sup>19</sup> Yal nay móoloom di mbubbam,  
te di laxasaay gu mu saxoo.
- <sup>20</sup> Lii, yal na ko Aji Sax ji feye ñi may sosal,  
di teg lu ñaaw ci sama der.
- <sup>21</sup> Waaye Boroom bi Aji Sax ji,  
defal ma li sa tur laaj.  
Yaa baax, gore, xettli ma.
- <sup>22</sup> Damaa néewle te sonn,  
sama xol dagg, ba jeex tàkk.
- <sup>23</sup> Maa ngi tåggoo ni keru ngoon,  
ñu di ma fél ni socset.
- <sup>24</sup> Samay óom a ngi nasax ndax ñàkka lekk,  
desewuma lu moy yaxi neen.
- <sup>25</sup> Maa ngii, ñu di ma sewal,  
ku ma gis, wëcc bopp.
- <sup>26</sup> Éy Aji Sax ji, sama Yàlla, dimbali ma,  
walloo ma sa ngor,
- <sup>27</sup> ba ñu xam ne lii sa loxoo,  
xam ne yaw Aji Sax ji, yaa ko def.
- <sup>28</sup> Ñooy móolu, yaw nga barkeel ;  
ñoo ma jógal, ñooy torox,  
man, ma bég, Sang bi !
- <sup>29</sup> Yal na ñi may sosal sàngoo toroxte,

- làmboo gàcce ni mbubb.  
 30 Ma àddu, santa sant Aji Sax ji,  
     di ko màggale digg mbooloo mu yaa.  
 31 Mooy féete ndijoor néew-ji-doole,  
     musal ko ci ku koy teg àtteb dee.

## Sabóor 110

### Yàlla fal na nitam

<sup>1</sup> *Ñeel Daawuda, di kàddug Sabóor.*

- Aji Sax ji daa wax sama sang, ne ko :  
 « Toogal sama ndijoor,  
     ba ma def say noon sa ndëggastal. »
- 2 Sa nguur la Aji Sax ji saxal, dale ko fa °Siyorj.  
 Yilifal noon yi la wér !
- 3 Sa mboolooy taxawal seen bopp,  
     sa bésub xare.  
 Ña nga soloo darajaak sellnga,  
     faboo fa njël sosoo,  
     diy ndaw, wàccsil la, mbeteb lay.
- 4 Aji Sax jee ko giñ,  
     te du dellu gannaaw :  
 « Yaa di sàrxalkat ba fàww,  
     mel ni Melkisedeg. »
- 5 Sang baa ngi fi sa ndijoor  
     te mooy rajaxe buur yi, bés bu meree.
- 6 Mooy mbugal xeet yi, jal seeni néew,  
     di rajaxe kilifay àddina, ba mu daj.
- 7 Déeg ba feggook yoon wa, Buur a cay naan,  
     te moo ko tax di siggi.

## Sabóor 111

### Yàlla la ay mbiram sax

- 1 Màggal-leen Ki Sax !  
Naa sante Aji Sax ji xol bu ko wéetal  
ci biir ñu jub ñi bokk jataay.
- 2 Liggéeyi Aji Sax ji réy na,  
ku ko safoo di ko gëstu.
- 3 Jëfam teddnga laak daraja,  
njekkam di sax ba fàww.
- 4 Moo dogal ñuy fàttlikuy kéemaanam ;  
Aji Sax ji, boroom yiw ak yérmande.
- 5 Mooy leel ku ko ragal,  
di bàyyi xel °kóllëreem gi ba fàww.
- 6 Won na mbooloom dooley jëfam,  
ba mu léen joxee suufu xeet yi.
- 7 Ay jëfam dëgg laak njub,  
tegtalam yépp mata wóolu,
- 8 laloo dëgg ak njub,  
te sax dàkk ba fàww.
- 9 Moo yónnee xeetam wall,  
fas ak ñoom kóllëre gu sax.  
Kee sell te jara ragal !
- 10 Ragal Aji Sax ji di ndoortel rafet xel,  
dég-dég bu rafet ñeel ku koy wéye.  
Moo yeyoo cant ba fàww.

## Sabóor 112

### Ku ragal Yàlla gis njekkam

- 1 Màggal-leen Ki Sax !  
Ndokklee ku ragal Aji Sax ji,  
di tàqamtikoo ay santaaneem.
- 2 Aw askanam ay am doole ci réew mi.  
Ku jub saw xeet barkeel,
- 3 alal ak koom am sa kér,  
sag njekk sax dàkk.

- <sup>4</sup> Ceeñeelu biir lëndëm jollil na ku jub  
ak ku baax, di boroom yérmande ak njekk.  
<sup>5</sup> Ki baaxle mooy ki laabiir, di leble,  
di jéflante cig njub.  
<sup>6</sup> Ku jub du térëf mukk,  
te dees na ko fàttliku ba fàww.  
<sup>7</sup> Du ragal dég-dég bu tiis,  
xel ma day dal, mu wóolu Aji Sax ji,  
<sup>8</sup> fit wa toog, du ragal,  
ba kera muy gis noonam jóoru.  
<sup>9</sup> Day tabe ci néew-ji-doole,  
njekkam sax dàkk,  
dooleem di yokku, ànd ak daraja.  
<sup>10</sup> Soxor bi da koy gis, mer,  
iñaan bay yéyu, jeex tàkk ;  
nde soxor, yaakaar ju tas rekk.

### Sabóor 113

#### Buur Yàllaay walloo

- <sup>1</sup> Màggal-leen Ki Sax !  
Yéen ñiy jaamu Aji Sax ji, màggal-leen ko,  
màggal-leen turu Aji Sax ji !  
<sup>2</sup> Yal nañu teral turu Aji Sax ji  
tey ak èllég !  
<sup>3</sup> Li dale penku ba sowu,  
màggal-leen Aji Sax ji.  
  
<sup>4</sup> Aji Sax jee kawe, tiim xeetoo xeet,  
teddngaam sut asamaan !  
<sup>5</sup> Ana ku mel ni sunu Yàlla Aji Sax ji,  
ki kaweelel ab jalám, toog,  
<sup>6</sup> di jéer asamaan ak suuf ?  
  
<sup>7</sup> Mooy yékkatee ku néewle fa suuf,  
di seppee ku sonn cib sén,  
<sup>8</sup> bokkal ko jataayu kilifa,

ya jiite xeetam.  
 9 Mooy dëël jigéen ju tèle woona jur,  
 may ko mbégtem njureel.  
 Màggal-leen Ki Sax !

### Sabóor 114

#### Yàllaay walloo dooleem


- 1 Ba Israyil bàyyikoo fa Misra,  
 ba waa kér Yanqóoba déddu làkk-kat yooya,  
 2 ca la Yuda doon kér Aji Sax ji,  
 giiru Israyil googu doon ab jagleem.
- 3 Géej gaa léen gis, daw,  
 dexu Yurdan a deltu gannaaw,  
 4 tund yu mag yiy curpi niy kuuy,  
 di curpeendook tund yu ndaw yi niy mbote.
- 5 Moo géej, loo xewle bay daw ?  
 Yaw, dexu Yurdan, looy deltu gannaaw ?  
 6 Tund yu mag yee, lu ngeen di curpi niy kuuy ?  
 Yéen, tund yu ndaw yi, lu ngeen di curpi niy mbote ?
- 7 Suufee, loxalal Boroom bi,  
 Yàllay Yanqóoba mii,  
 8 ki soppliw doj ndox mu taa,  
 xeer wu ne sereñ, mu def bëtu ndox.

### Sabóor 115

#### Ku wóolu Yàlla barkeel

- 1 Bu muy nun, Aji Sax ji, bu muy nun,  
 saw tur nga wara teral,  
 ngir sa ngor ak sa worma.  
 2 Bu yéefar yi ne mukk :  
 « Moo ñii, ana seen Yàlla ? »  
 3 Te yaw sunu Yàlla, yaa ngi asamaan,

- di def lu la soob.
- <sup>4</sup> Seeni tuur xaalis laak wurus,  
di liggeeyu doom aadama :
- <sup>5</sup> am gémmiñ te du wax,  
am i gët te du gis,
- <sup>6</sup> am i nopp, du dégg,  
am i wakkan, du xañtu,
- <sup>7</sup> ay yoxo it te du yég,  
ay tànk it te du dox,  
du xàddmiku sax.
- <sup>8</sup> Ni sàkk yii tuur, yal nañu mel ni ñoom,  
ñook ñi léen wóolu ñépp.
- <sup>9</sup> Éy Israyil, wóolul Aji Sax ji,  
moo lay jàpple, di la aar.
- <sup>10</sup> Yéen waa kér Aaróona, wóoluleen Aji Sax ji,  
moo leen di jàpple, di leen aar.
- <sup>11</sup> Yéen ñi ragal Aji Sax ji, wóoluleen Aji Sax ji,  
moo leen di jàpple, di leen aar.
- <sup>12</sup> Aji Sax jee nuy bàyyi xel, di nu barkeel,  
di barkeel kér Israyil,  
di barkeel kér Aaróona.
- <sup>13</sup> Aji Sax jeey barkeel ku ko ragal,  
mag ak ndaw.
- <sup>14</sup> Yal na leen Yàlla ful,  
ful seeni doom.
- <sup>15</sup> Yal nangeen barkeeloo Aji Sax ji,  
ki sàkk asamaan ak suuf.
- <sup>16</sup> Asamaan, asamaanu Aji Sax jee,  
suuf la dénk doom aadama.
- <sup>17</sup> Du ku dee mooy màggal Ki Sax,  
du kenn ku tàbbi réewum tàbbi-selaw !
- <sup>18</sup> Nun, nooy sargal Ki Sax,  
tey ak èllèg.  
Màggal-leen Ki Sax !



### Sabóor 116

#### Ma sant Yàlla mi ma jot

- 1 Maa bëgg Aji Sax ji : maa ko woo,  
dagaan ko, mu dégg ma.
- 2 Teewlu na ma moos,  
dama koy woo li feek may dund.
- 3 Buumi ndee a ma laawoon,  
njàqarey njaniiw dab ma,  
ma dajeek naqar ak u tiis.
- 4 Ma woo Aji Sax ji wall, ne ko :  
« Ngalla Aji Sax ji, xettli ma ! »
- 5 Aji Sax jeey boroom yiw ak njekk,  
sunu Yàllaay boroom yérmande.
- 6 Aji Sax jeey aar ku xamul àddina ;  
tumurànke woon naa, mu wallu ma.
- 7 Bu ma yeboo sama xel dal,  
Aji Sax ji baaxe na ma !
- 8 Xettli nga ma, ba deewuma,  
jàpple ma ba tèrefuma,  
feral nga it samay rongooñ.
- 9 Damay topp Aji Sax ji  
ci biir réewum aji dund ñi.
- 10 Ba ma naa : « Torox naa ba toskare, »  
teewul may ànd ak ngëm.
- 11 Maa jàqoon ba naan :  
« Népp i fenkat lañu ! »
- 12 Ana lu may njukkale Aji Sax ji,  
li mu ma baaxe lépp ?
- 13 Xanaa ma yékkati kaasu Aji Sax  
jiy misaal wallam,  
te may tudd turam.
- 14 Samay digeek Aji Sax ji laay matal  
fi kanam mbooloom mépp.

- <sup>15</sup> Wóllérey Aji Sax ji,  
bakkanam ñor na Aji Sax ji.  
<sup>16</sup> Aji Sax ji, maay sab jaam,  
maay sab jaam, di sa doomu jaam bi ma sukk jur.  
Yaa yiwi samay buum,  
<sup>17</sup> yaw laay sarxalal °saraxu cant,  
te turu Aji Sax ji laay tudd.  
<sup>18</sup> Samay digeek Aji Sax ji laay matal  
fi kanam mbooloom mépp,  
<sup>19</sup> fi étti kér Aji Sax ji,  
fi digg Yerusalem.  
Màggal-leen Ki Sax !

### Sabóor 117

#### Na ñépp ànd ak Israyil sant Yàlla

- <sup>1</sup> Yéen xeetoo xeet, màggal-leen Aji Sax ji,  
réewoo réew, kañleen ko.  
<sup>2</sup> Moo nu xéewale ngoram gu réy,  
te wormay Aji Sax jee sax dàkk.  
Màggal-leen Ki Sax !

### Sabóor 118

#### Aji Sax jeek man, ma daan

- <sup>1</sup> Santleen Aji Sax ji, kee baax,  
kee saxoo ngoram !  
<sup>2</sup> Rikk Israyil, neleen :  
« Kee saxoo ngoram ! »  
<sup>3</sup> Rikk waa kér Aaróona, neleen :  
« Kee saxoo ngoram ! »  
<sup>4</sup> Rikk yéen ñi ragal Aji Sax ji, neleen :  
« Kee saxoo ngoram ! »  
  
<sup>5</sup> Ci xat-xat laa wooye Ki Sax wall,  
Ki Sax wuyu ma, yaatal ma.  
<sup>6</sup> Aji Sax jeek man, duma tiit.

- Ana lees ma manal ?  
 7 Aji Sax jeek man, di ma dimbali,  
     may seetaan bañ yi.  
 8 Làqoo Aji Sax jee gën  
     wóolu doom aadama,  
 9 Làqoo Aji Sax jee gën  
     wóolu garmi.  
 10 Yéefar yépp a ma sam,  
     ma bëmëx léen ci dooley Aji Sax ji.  
 11 Ñu sam maa sam,  
     ma bëmëx léen ci dooley Aji Sax ji.  
 12 Naka lañu ma sam niy yamb,  
     jekki ne kamaj ni taalu boob,  
     ma bëmëx ci dooley Aji Sax ji.  
 13 Dees maa jañaxa jañax, ma ter-teri,  
     Aji Sax ji dimbali ma.  
 14 Sama doole, sama kaaraange, Ki Sax a ;  
     te mooy sama wall tey.  
 15 Ndam ak i sarxolle ca xaymay ñu jub ña,  
     ndijooru Aji Sax jee def njàmbaar !  
 16 Ndijooru la Aji Sax ji xàcci,  
     ndijooru Aji Sax jee def njàmbaar.  
 17 Duma dee moos, xanaa dund,  
     ba nettali jaloorey Ki Sax.  
 18 Ki Sax mbugal na maa mbugal,  
     waaye waccu ma, ma dee.  
 19 Ubbil-leen ma bunti njekk,  
     ma dugg santi Ki Sax.  
 20 Buntu Aji Sax jaa ngi ;  
     ñu jub ñee ciy dugge.  
 21 Dama lay sant, yaa ma nangul,  
     wallu ma tey.  
 22 Doj wi tabaxkat yi xeeboon,  
     tey doon na doju collu tabax bi.  
 23 Lii, Aji Sax jee ko def ;

- nu gis ko, yéemu.  
 24 Bésub tey jii, Aji Sax jee ;  
     nan ko bége, bànnexoo ko.  
 25 Ngalla Aji Sax ji, wallu nu.  
     Ngalla Aji Sax ji, may nu ndam.  
 26 Yal na Yàlla barkeel ki dikke turam.  
     Nu ngi leen di ñaanale fi néegu Aji Sax ji.  
 27 Aji Sax jee di Yàlla, di nu leeral.  
     Ijàbbleen car yi, màggale,  
     te dox ba ca béjjéni °sarxalukaay ba.  
 28 Yaa di sama Yàlla, ma di la sant ;  
     céy sama Yàlla, dama lay kañ.  
 29 Santleen Aji Sax ji, kee baax,  
     kee saxoo ngoram.

### Sabóor 119

#### Aji Sax ji, sa kàddu laay bége

- 1 Ndokklee yaw mi maandu,  
     di wéye yoonu Aji Sax ji.  
 2 Ndokklee yaw miy wattu kàdduy seedeem,  
     di ko sàkkoo xol bu ko wéetal.  
 3 Doo def njubadi,  
     di topp fi mu la jaarloo.  
 4 Aji Sax ji, yaa joxe sa tegtal  
     yi ñu wara toppa topp.  
 5 Yal naa saxoo  
     di sàmm sa dogali yoon,  
 6 di teewlu loo santaane,  
     ba duma rus.  
 7 Damay gëstu sa ndigal yu jub,  
     di la sante xol bu dëgg.  
 8 Sa dogali yoon laay sàmm ;  
     ngalla bu ma wacca wacc.  
  
 9 Ana nu ndaw mana sellalee ?  
     Xanaa di sàmm sa kàddu.

- <sup>10</sup> Xol bu la wéetal laa lay sàkkoo,  
bul ma wacc, ma wàcc say santaane.
- <sup>11</sup> Sama xol laa làq say wax,  
ngir bañ laa moy.
- <sup>12</sup> Jaajëfe, yaw Aji Sax ji,  
jàngal ma sa dogali yoon.
- <sup>13</sup> Maa àddu, tari  
mboolem lu sa kàddu digle.
- <sup>14</sup> Topp say tegtal laay bége  
mbégtem jépp alal.
- <sup>15</sup> Say tegtal laay jàngat,  
di teewlu say xàll.
- <sup>16</sup> Sa dogali yoon, ma tàqamtkoo,  
sa kàddu, ma fat ba fàww.
- <sup>17</sup> Sang bi, baaxe ma, ma dund,  
ba mana sàmm sa kàddu.
- <sup>18</sup> Ngalla muril saay gët, ma niir  
sa kéemaani yoon.
- <sup>19</sup> Doxandéem laa fi kaw suuf,  
bu ma làq say santaane.
- <sup>20</sup> Fu ma toll maa ngi namm say ndigal  
ba sama xol ñiis.
- <sup>21</sup> Rëbb nga ñu reew, ñu alku,  
ñiy dëddu say santaane.
- <sup>22</sup> Musal ma ciy kókkaleek i xaste,  
maa ngi topp sa kàdduy seede.
- <sup>23</sup> Te it kàngam yaa ngi may tooge,  
te may gëstu sa dogali yoon, Sang bi.
- <sup>24</sup> Sa kàdduy seede laay safoo,  
ñuy sama xejj yi may xelal.
- <sup>25</sup> Maa ngi ne ñàyy ci pënd bi,  
musal ma, yaa ko dige.
- <sup>26</sup> Wax naa la samay jaar-jaar, nga wuyu ma ;  
ngalla xamal ma sa dogali yoon.
- <sup>27</sup> Dégtal ma li sa tegtal yiy firi,

- ma jängat say kéemaan.
- <sup>28</sup> Naqaru xol sonal na ma,  
may ma ndëgërlaay, yaa ko dige.
- <sup>29</sup> Sorele maak yoonu fen,  
te baaxe ma saw yoon.
- <sup>30</sup> Yoonu worma laa taamu,  
jàkkaarlook say ndigal.
- <sup>31</sup> Éy Aji Sax ji, damaa langaamoo sa kàdduy seede,  
ngalla bu ma rusloo.
- <sup>32</sup> Sa yoonu santaane laay daw,  
yaa may may xol bu tàlli.
- <sup>33</sup> Aji Sax ji, xamal ma li sa dogali yoon yiy firi,  
ma topp ko ba mu jeex.
- <sup>34</sup> May ma dég-dég, ma topp saw yoon,  
toppe ko xol bu tàlli.
- <sup>35</sup> Jiite ma ci sa xàllu santaane yi,  
mooy sama bànnex.
- <sup>36</sup> Joyantil sama xol, mu féeteek sa kàdduy seede,  
te dummóoyu alal ju lewul.
- <sup>37</sup> May ma, ma fénati caaxaani neen,  
te musale ma saw yoon.
- <sup>38</sup> Sang bi, sottalal ma sa dige  
bi nga digook ku la ragal.
- <sup>39</sup> Moyale ma gàcce gi ma ragal ;  
yaa baax i ndigal.
- <sup>40</sup> Maaka namm say tegtal,  
musale ma sag njekk !
- <sup>41</sup> Aji Sax ji, yaa ko dige,  
dikke ma sa jëfi ngor ak sa wall,
- <sup>42</sup> ba ku ma kókkali, ma am tontam.  
Maa doyloo sa kàddu.
- <sup>43</sup> Bu ma xañ mukk kàddug dëgg,  
say àtte laa yaakaar kat.
- <sup>44</sup> Maay topp saw yoon, sàlloo ko,  
saxoo ko ba fàww,

- 45 di daagoo sago,  
nde say tegtal laay sàkku.
- 46 Maay àgge ay buur sa kàdduy seede,  
te dumà rus.
- 47 Maay bége sa santaane  
yi ma sopp,
- 48 di yóotu sa santaane yi ma sopp,  
di jàngat sa dogali yoon.
- 49 Bàyyl xel li nga ma dig, Sang bi ;  
moom laa yaakaar.
- 50 Lii laay muñé samaw naqar,  
sa kàddoo may dundal.
- 51 Nit ñu bew ñi ñiaawal nañu ma lool,  
waaye dëdduwma saw yoon.
- 52 Éy Aji Sax ji, damaa fàttliku sa àtte ya woon,  
daldi muñ.
- 53 Sama xol daa fees ndax ñu bon  
ñiy wacc saw yoon.
- 54 Sa dogali yoon laay woyantoo,  
fu ma mana sance.
- 55 Aji Sax ji, tudd naa la guddi,  
di sàmm saw yoon.
- 56 Lii laa séddoo,  
maa topp sa tegtali yoon.
- 57 Aji Sax ji, yaw laa séddoo ;  
di digee sàmm sa kàddu.
- 58 Xol bu la wéetal laa sàkkoo saw yiw,  
ngalla baaxe ma, yaa ko dige.
- 59 Damaa seetlu sama jéfin,  
dëpp, topp sa kàdduy seede.
- 60 Maa ngi gaawtu,  
yeexewma say santaane moos !
- 61 Buumi ñu bon ñaa ngi may laaw,  
te sàgganewma saw yoon.
- 62 Xaaju guddi laay jóg,

- di la sante sa àtteej njekk.
- 63 Maa xejjoo képp ku la ragal,  
tey topp say tegtal.
- 64 Aji Sax ji, sa ngor dajal na àddina ;  
xamal ma sa dogali yoon.
- 65 Aji Sax ji, def nga la nga dige woon,  
Sang bi, defal nga ma ngëneel.
- 66 Xamal ma ngëneeli àtte ak xam-xam,  
maa doyloo say santaane.
- 67 Maa jàddoon, nga duma ma,  
léegi sa kàddu laay sàmm.
- 68 Yaaka baax tey baaxe ;  
rikk xamal ma say tegtal.
- 69 Nu bew ñee yàq sama der ak i sos,  
te ma topp say tegtal, wéetal la.
- 70 Nu ngi nii, seen bopp yi, tafas ;  
te man may tàqamtikoo saw yoon.
- 71 Ngëneel la ma duma yi jural,  
ngir jànge naa ci say tegtal.
- 72 Sa ngëneelu yoon wi nga digle  
moo ma gënal ay junniy xaalis ak wurus.
- 73 Say loxoo ma sàkk, tabax ma,  
may ma ag dégg, ma mokkal say santaane,
- 74 ñi la ragal gis ma, bég ;  
nde sa kàddu laa yaakaar.
- 75 Aji Sax ji, ràññee naa ne say ndigal njekk la,  
te worma nga ma dumaa.
- 76 Ngalla dëfale ma sa ngor ;  
Sang bi, yaa ko dige.
- 77 Nanga ma ganesee sa yérmande, ma dund ;  
saw yoon ay sama bànnex !
- 78 Yal na ñu bew ñi torox,  
ñoo ma lor ak seeni sos,  
te man may gëstu say tegtal.
- 79 Yal na ku la ragal waññiku fi man,

- ba xam sa kàdduy seede.
- 80 Yal naa toppe say tegtal xol bu la wéetal,  
ba duma rus.
- 81 Sàkku naa sag wall ba xol jeex,  
dixaar sa kàddu.
- 82 Séentu naa sab dige, ba gët giim ;  
kañ nga may xettli ?
- 83 Damaa mujj ras ni mbuuusum der mu saxar jàpp,  
waaye sàgganewma say tegtal.
- 84 Ñaata fan laay toogati, Sang bi ?  
Kañ ngay mbugal ñi ma topp ?
- 85 Nu bew ñi gasal nañu ma ay yeer,  
yu saw yoon diglewul.
- 86 Sa santaane yépp worma la ;  
te dees maa toppey sos, wallu ma !
- 87 Nes tuut ñu sàanke ma fi kaw suuf,  
te man dëdduwma say tegtal.
- 88 Musale ma sa ngor,  
ba jëfe sa kàdduy seede.
- 89 Aji Sax ji, sa kàddooy sax dàkk,  
taxaw jonn fa asamaan.
- 90 Sa worma, ba maasoo maas,  
yaa samp suuf, saxal ko.
- 91 Ci sa ndigal la lépp taxawe ba tey,  
lépp ànd, di la jaamu.
- 92 Su ma bégewuloon saw yoon,  
sànkoo sama toskare ji.
- 93 Duma fàtte mukk say tegtal,  
ci nga may musale.
- 94 Yaa ma moom, wallu ma ;  
say tegtal laay sàkku.
- 95 Man la ñu bon ñi téri, nar maa sànk,  
waaye sa kàdduy seede laay niir.
- 96 Gis naa ne lu mat lu ne am na kemu,  
waaye sa santaane mat, ba weesu kemu.

- 97 Maaka sopp saw yoon,  
di ko jàngat bés bu jot.
- 98 Li ma xelal ba ma raw noon yi,  
mooy sa santaane, yi ma jagoo fàww.
- 99 Maa gëna ñaw képp ku may jàngal,  
nde sa kàdduy seedeey sama njàngat.
- 100 Maa èpp mag ñi dég-dég,  
nde say tegtal laa topp.
- 101 Luy yoon wu aay, ma moyu,  
ba mana sàmm sa kàddu.
- 102 Say santaane it dëdduwma ko,  
nde yaw yaa ma jàngal.
- 103 Sa kàddooka maa neex,  
ba dàqal ma tem-temu lem !
- 104 Say tegtal laay ràññee,  
ba tax ma bañ luy yoonu fen.
- 105 Sa kàddu laay niitoo samay tànk,  
muy leeral samaw yoon.
- 106 Giñ naa te di ko dëggal,  
ne dinaa sàmmontEEK sa ndigali njekk.
- 107 Toskare naa ba ci lool ;  
éy Aji Sax ji, musal ma, yaa ko dige.
- 108 Aji Sax ji, rikk nangul ma kàdduy cant yi ma lay  
jébbal,  
te xamal ma say ndigal.
- 109 Sama bakkan ci xott saa su ne,  
waaye fàttewuma saw yoon.
- 110 Nu bon ñi ma gasal um pax  
taxul ma wàcc say tegtal.
- 111 Maa séddoo fàww sa kàdduy seede,  
loolooy seral sama xol.
- 112 Damaa dogoo jéfe sa dogali yoon,  
saxoo ko ba mu jeex.
- 113 Maa bañ kuy ịjarale,  
maa sopp saw yoon.

- 114 Sama rawtu, sama kiiraay, yaw a ;  
sa kàddu laay xaar.
- 115 Yéen ñiy def lu bon, xiddileen ma,  
ba ma sàmmontEEK sama santaaney Yàlla.
- 116 Yaa ko dige, dooleel ma, ma dund ;  
bul tas sama yaakaar.
- 117 Kàttanal ma, ma raw,  
di yittewoo say tegtal, ba fàww.
- 118 Yaay xalab képp ku wàcc sa dogali yoon,  
ay pexeem neen.
- 119 Yaay tonni ni purit képp ku bon fi kaw suuf,  
moo tax ma sopp sa kàdduy seede.
- 120 Sama yaram a ngi daw ndax ragal la,  
ragal say àtte.
- 121 Def naa njub, def njekk ;  
bu ma wacce ñi may néewal.
- 122 Sang bi, gàddu ma, ma am jàmm,  
bu ma ñu bew ñi néewal.
- 123 Séentu naa sag wall ak sa kàddug njekk,  
ba saay gët giim.
- 124 Sang bi, jéfeel ma sa ngor,  
xamal ma sa dogali yoon.
- 125 Sab jaam laa, may ma, ma ràññee,  
ba xam sa kàdduy seede.
- 126 Aji Sax ji, jéf jot na,  
ñee ngi jalgati saw yoon !
- 127 Maa sopp say santaane,  
mu gënal ma wurus ba ci wurusu ngalam.
- 128 Moo tax foo tegtale, ma rafetlu,  
lépp luy yoonu fen, ma bañ.
- 129 Sa kàdduy seede kéemaan la,  
moo tax ma di ko toppe xol.
- 130 Sa pirim kàddu day leeral,  
di xelal ku xeluwal.
- 131 Damaa ña ñafeet, di àppaat,

- ngir namm say santaane.
- 132 Éy geesu ma te baaxe ma,  
ni nga baaxook ñi sopp sa tur.
- 133 Dooleelal ma samay tànk, yaa ko dige,  
te bu ma lenn lu bon man.
- 134 Jot ma ci noteelu doom aadama,  
ma mana topp say tegtal.
- 135 Sang bi, geesoo ma sag leer,  
te xamal ma sa dogali yoon,
- 136 ay wali rongooñ ay wale saay gët,  
ndax sàmmeesul saw yoon.
- 137 Aji Sax ji, yaaka jub,  
te say àtte di yoon.
- 138 Yaa santaane sa kàdduy seede ci njekk  
ak worma ju yaa.
- 139 Damaa gis bañ yi yì sagane say wax,  
xol bu tàng di ma rey.
- 140 Sang bi, maaka sopp sa kàddu  
gi set ni weñ gu ñu xelli !
- 141 Nàkk naa solo, faaleesu ma,  
waaye sàgganewma say tegtal.
- 142 Sag njekk moo dig njekk ba fàww,  
te saw yoon a dëggú.
- 143 Njekkar ak njàqare dab ma,  
say santaane di sama bânnéex.
- 144 Sa kàdduy seedee di njekk ba fàww,  
may ma, ma ràññée, ba dund.
- 145 Aji Sax ji, woo naa la wall lu ma man,  
wuyu ma, ma topp sa dogali yoon.
- 146 Dama ne : « Wóoy, wallu ma,  
ma sàmm sa kàdduy seede. »
- 147 Damaa jëlu, di la woo,  
di xaar sa kàddu.
- 148 Damay xoole guddi gépp,  
di jängat sa kàddu.

- 149 Aji Sax ji, sama baat bii, teewloo ko sa ngor,  
te musal ma ni nga baaxoo musle.
- 150 Rabatkatí pexe yaa ngi jegesi,  
di nit ñu sore saw yoon.
- 151 Waaye yaw Aji Sax ji, jege nga,  
te sa santaane yépp a dëggu.
- 152 Yàgg naa xam ne sa kàdduy seede  
wax la joo saxal dàkk.
- 153 Xoolal sama coono te xettli ma ;  
saw yoon déy, sàgganewma ko.
- 154 Àtte ma, ba jot ma ;  
musal ma, yaa ko dige.
- 155 Ku bon sore sa wall,  
ngir sàkkuwul sa dogali yoon.
- 156 Aji Sax ji, sa yérmande yaa na ;  
musal ma ni nga ko baaxoo.
- 157 Ñi ma topp ak ñi ma bañ a bare,  
te taxul ma dëddu sa kàdduy seede.
- 158 Damaa gis workat yi, sib léen ;  
ñoo sàmmul sa kàddu.
- 159 Seetlul ni ma soppe say tegtal.  
Éy Aji Sax ji, musal ma, yaa gore !
- 160 Sa mboolem kàddu dëgg la,  
sa ndigal yépp di njekk, sax dàkk.
- 161 Ay kilifaa ma topp ci dara,  
te teewul ma wormaal sa kàddu.
- 162 Man de, maa ngi bége sa kàddu  
ni ku for alal ju bare.
- 163 Fen, ma bañ, ba sib ;  
sa yoon, ma sopp.
- 164 Juróom yaari yoon ci bés  
màggale naa la ko say àtteej njekk.
- 165 Jàmm ju baree ñeel ku sopp sa yoon,  
te dara du ko fakktal.
- 166 Aji Sax ji, sa wall laa yaakaar,

- say santaane laa jëfe.
- <sup>167</sup> Sama xol laa toppe sa kàdduy seede,  
te sopp koo sopp.
- <sup>168</sup> Damaa topp say tegtal ak sa kàdduy seede,  
fépp fu ma jaar kay yaa ngi ciy gis.
- <sup>169</sup> Aji Sax ji, yal na sama yuux àgg fa yaw ;  
may ma, ma ràññee, yaa ko dige.
- <sup>170</sup> Yal na sama dagaan àgg fa yaw ;  
xettli ma, yaa ko dige.
- <sup>171</sup> Naa xaacu, woyal la,  
yaa may jängal sa dogali yoon.
- <sup>172</sup> Naa woye sa kàddu,  
loo santaane, njekk la.
- <sup>173</sup> Yal nanga ma dikke ndimbal,  
say tegtal laa taamu.
- <sup>174</sup> Aji Sax ji, namm naa sa wall,  
sa yoon ay sama bànnex.
- <sup>175</sup> Yal naa dund ba màggal la,  
say ndigal di sama ndimbal.
- <sup>176</sup> Lajj naa ni xar mu réer ;  
gindi ma, Sang bi,  
sàgganewma say santaane de !

## Sabóor 120

### Ma ñaan ci biir tuuma

<sup>1</sup> *Muy °jàngi yéeg, ñu di ko màggale Yàlla.*

- Ci sama njàqare laa woo Aji Sax ji wall,  
mu wuyu ma.
- <sup>2</sup> Éy Aji Sax ji, musal ma ci gémmiñu fenkat,  
ak làmmiñu njublañ.
- <sup>3</sup> Yaw boroom làmmiñu njublañ,  
ana lu ñu lay añale  
ak lu ñu lay dolli ?

- <sup>4</sup> Xanaa fitti mbér yu ñaw  
ak xal yu yànj.
- <sup>5</sup> Wóoy man mi ganeyaani baadooloy Meseg ya  
tey dali fa xaymay waa Kedar ñu xayadi ña !
- <sup>6</sup> Yàgg naa lool ci biir nit ñi bañ jàmm.
- <sup>7</sup> Man may wut jàmm,  
te su ma waxee,  
ñoom ñuy ayoo.

### Sabóor 121

Ana ku may sàmm ?

<sup>1</sup> *Muy °jàngi yéeg, ñu di ko mèggale Yàlla.*

- Damaa séentu tund ya,  
te naan fu wall di jóge ?
- <sup>2</sup> Sama wall a nga fa Aji Sax ji,  
ki sàkk asamaan ak suuf.
- <sup>3</sup> Kii du la bàyyi nga térëf,  
sa sàmm bii gëmmul.
- <sup>4</sup> Kiy sàmm Israyil kay  
gëmmul, nelawul.
- <sup>5</sup> Aji Sax jee lay sàmm,  
Aji Sax jee lay yiir,  
féete la ndijoor.
- <sup>6</sup> Du naaj wu lay dal bëccëg,  
mbaa leer gu ndaw guddi.
- <sup>7</sup> Aji Sax jee lay sàmm ci gépp loraange,  
di sàmm sa bakkan.
- <sup>8</sup> Aji Sax jee lay sàmm, dem ak dikk,  
tey ak èllëg.

## Sabóor 122

### Nu ñaanal Yerusalem

<sup>1</sup> *Muy jàngi yéeg, ñu di ko mèggale Yàlla, ñeel Daawuda.*

Maaka bég, ba ñu ma nee : « Kér Aji Sax ji lanu jém. »

<sup>2</sup> Yaw Yerusalem, noo ngii taxaw sa bunt.

<sup>3</sup> Céy, Yerusalem, dëkkub tabax bu baax,  
bi booloo, di benn.

<sup>4</sup> Fii la giiri Israyil di yéegsi,  
di giir yi Ki Sax séddoo.

Ñu ngi santsi Aji Sax ji,  
ni ko Israyil warloo.

<sup>5</sup> Fii la ngànguney Israyil tege,  
askanu Daawuda toog ca, di àtte.

<sup>6</sup> Dagaanleen jàmmi Yerusalem :

« Yerusalem, yal na sa xeli soppe dal,  
<sup>7</sup> jàmm ne ñoyy fi say tata wér,  
te xel dal ci biir kéri Buur. »

<sup>8</sup> Mbokk ak xarit a waral  
may ñaan jàmmi Yerusalem.

<sup>9</sup> Sunu kér Yàlla Aji Sax jee ma tax  
di sàkku ngèneelu Yerusalem.

## Sabóor 123

### Yàlla, fajal nu gacce

<sup>1</sup> *Muy jàngi yéeg, ñu di ko mèggale Yàlla.*

Yaw laay séentu,  
yaw mi toog fa asamaan.

<sup>2</sup> Ma ne, ni jaam bu góor di wékke sangam bët,  
jaam bu jigéen di ko wékke bët sangam bu jigéen,  
ni lanuy wékke sunu Yàlla Aji Sax ji bët,  
ba keroog mu baaxe nu.

- <sup>3</sup> Éy Aji Sax ji, baaxe nu, rikk baaxe nu,  
dañu noo torxal, ba nu ne tott.  
<sup>4</sup> Nu reew ñaa ngi nuy ñaawal, sunu xol fees,  
ñu bew ñaa ngi nuy sewal.

### Sabóor 124

#### Nanu sante Aji Sax ji wallam

<sup>1</sup> *Muy °jàngi yéeg, ñu di ko mèggale Yàlla, ñeel Daawuda.*

- Éy su dul woon ak Aji Sax ji nu nekkal !  
Israyiloo, waxati ko :
- <sup>2</sup> su dul woon ak Aji Sax ji nu nekkal,  
ba ñu nu jógalee,
- <sup>3</sup> ba nit ña xadaroo sunu kaw,  
dañu nu doon wonn, nuy dund,
- <sup>4</sup> dañu nu doon mëdd nim ndox,  
def um wal, buub nu,
- <sup>5</sup> def waame wuy wal-wali,  
buub nu, yóbbu.
- <sup>6</sup> Cant ñeel na Aji Sax ji,  
ki nu bàyyiwul, noon yi yàpp nu.
- <sup>7</sup> Danu ne fërr, nim picc  
mu rëcc fiiru rëbb,  
fiir ga toj, nu raw.
- <sup>8</sup> Sunu ndimbal a ngi ci turu Aji Sax ji,  
ki sàkk asamaan ak suuf.

### Sabóor 125

#### Ku doyloo Aji Sax ji raw

<sup>1</sup> *Muy °jàngi yéeg, ñu di ko mèggale Yàlla.*

Ku doyloo Aji Sax ji,  
yaay tundu °Siyoñ, doo toxu ;  
dangay sax ba fàww.

<sup>2</sup> Ni tund yi yéewe Yerusalem,  
ni la Aji Sax ji yéewe mbooloom,  
tey ak ëllëg.

<sup>3</sup> Nguur gu bon du saxe  
kaw suuf su nit ñu jub muurloo.  
Lu ko moy ñu jub ñi sàkku lu bon,  
di ko jëfe.

<sup>4</sup> Éy Aji Sax ji, baaxeel ku baax,  
ak kuy mébét njub.

<sup>5</sup> Waaye kuy topp yoonu ndëngte,  
Aji Sax ji da koy sànk,  
boole kook kuy def lu bon.  
Yal na jàmm dal Israyil.

## Sabóor 126

### Yàlla, delloo nu

<sup>1</sup> *Muy °jàngi yéeg, ñu di ko màggale Yàlla.*

Ba Aji Sax ji delloo waa °Siyoŋ seen réew,  
danoo meloon ni ñuy gént,

<sup>2</sup> di reek a sarxolle rekk.

Yéefar yi naa :

« Lu réy la Aji Sax ji defal ñii. »

<sup>3</sup> Lu réy la nu Aji Sax ji defal moos,  
nu bég.

<sup>4</sup> Aji Sax ji, rikk delloo nu na woon,  
ni ngay delloo wal yu ɻiis, mu walaat ca àllu Negew.

<sup>5</sup> Kuy ji di jooy,  
yal na góob, di sarxolle.

<sup>6</sup> Ku doon wéya wéy, di jooy ;  
ñàbb mbuuusum njiwoom,  
yal na dikka dikk, di woy,  
ñibbaale sabaaram.

## Sabóor 127

### Barkeb Yàllaa wóor

<sup>1</sup> *Muy °jàngi yéeg, ñu di ko mèggale Yàlla, ñeel Suleymaan.*

Kér, su ko Aji Sax ji tabaxul,  
ku ko tabax, neen nga doñ-doñi.  
Ab dëkk, su ko Aji Sax ji wattuwul,  
ku ko wattu, neen nga teewlu.

<sup>2</sup> Neen it la nit di teela jóg  
ak a guddee tëdd,  
di doñ-doñi lu mu lekk :  
Aji Sax ji leel na soppeem lu ni day,  
fekk ko moy nelaw.

<sup>3</sup> Ma ne, doom Aji Sax jee koy sédde,  
njurum doom yool la.

<sup>4</sup> Doom joo jure ndaw,  
mooy fitt ci loxol jàmbaar ;

<sup>5</sup> ndokklee ku ci mbuuusam fees,  
ba bu ñu taseek ub noon ca pénc ma,  
duñu am gacce mukk.

## Sabóor 128

### Ragal Yàlla, jàmmi kér

<sup>1</sup> *Muy °jàngi yéeg, ñu di ko mèggale Yàlla.*

Ndokklee képp ku ragal Yàlla,  
di jéfe ay yoonam.

<sup>2</sup> Yaay lekk saw ñaq,  
mbégteek ngéneel ñeel la.

<sup>3</sup> Sa jabar ni garab gu nangoo sa wanag,  
say doom wéra wér sa ndab ni njémbat lu jebbi.

<sup>4</sup> Ki ragal Aji Sax jaa ngoog,  
nii rekk lay barkeele.

<sup>5</sup> Yal na la Yàlla barkeele fii ci °Siyon;

yal nanga teewe xéewalu Yerusalem  
 sa giiru dund gépp,  
<sup>6</sup> te nga gis say sët.  
 Yal na jàmm dal Israyil.

### Sabóor 129

#### Noon manul Israyil

<sup>1</sup> *Muy °jàngi yéeg, ñu di ko mèggale Yàlla.*

Ba may ndaw ba tey, ñu ngi may sonala sonal.  
 Israyiloo, waxati ko :  
<sup>2</sup> Ba may ndaw ba tey, ñu ngi may sonala sonal,  
 te taxul ñu man ma.  
<sup>3</sup> Sama gannaaw gi lañu gàbba gàbb,  
 rëdd koo rëdd nib tool.  
<sup>4</sup> Waaye Aji Sax jiy boroom njekk  
 dog na buumi ñu bon ña.  
<sup>5</sup> Képp ku noonoo °Siyon  
 yal nañu ko dëpp, gàcceel ko.  
<sup>6</sup> Yal nañu mel ni ñax mu saxem xadd,  
 balaa law, lax.  
<sup>7</sup> Du doyub ñëb ku ko dog ;  
 du doyub say ku ko for.  
<sup>8</sup> Ku fa jaare it du ko ne :  
 « Jaajëf, Aji Sax ji barkeel ;  
 jaajëfe yaw, yal na Aji Sax ji barkeel. »

### Sabóor 130

#### Nu séentu njotug Yàlla

<sup>1</sup> *Muy °jàngi yéeg, ñu di ko mèggale Yàlla.*

Aji Sax ji, ci ay xóote laa lay wooye.  
<sup>2</sup> Boroom bi, déglu ma,  
 teewlu ma, ma tinu la.

- <sup>3</sup> Ki Sax, yaw, soo doon lim bakkhaar,  
Boroom bi, ana kuy taxaw ?  
<sup>4</sup> Waaye yaay jéggale,  
ñu ragal la.
- <sup>5</sup> Damay xaar Aji Sax ji, di ko xaare xol,  
di yaakaar kàddoom.  
<sup>6</sup> Wattukat bi yakkamti njël,  
wattukat bi yakkamti njël, laa ne,  
ni ma yakkamtee Aji Sax jee ko raw.
- <sup>7</sup> Éey Israyil, négandikul Aji Sax ji.  
Aji Sax jee gore,  
te yaatug njot.  
<sup>8</sup> Mooy jot Israyil ci ñaawteefam yépp.

### Sabóor 131

#### Damaa woyof, gëm Yalla

- <sup>1</sup> *Muy jàngi yéeg, ñu di ko mèggale Yalla, ñeel Daawuda.*
- Éy Aji Sax ji, man de, réy-réyluwma, danjiiraluma,  
xintewoowma lu réy it, mbaa lu ma élém.  
<sup>2</sup> Xanaa ne tekk, ne cell,  
ni perantal ak ndeyam ;  
sama xel dal ni perantal.  
<sup>3</sup> Éey Israyil, yaakaaral Aji Sax ji  
tey ak éllég.

### Sabóor 132

#### Yalla digoo naak ki mu fal

- <sup>1</sup> *Muy jàngi yéeg, ñu di ko mèggale Yalla.*

- Éy Aji Sax ji, bàyyil xel Daawuda,  
ak gépp njàqareem.  
<sup>2</sup> Moo giñaloon Aji Sax ji,

- moo digook Mbérum Yanqóoba ma.
- <sup>3</sup> Mu ne : « Duma ñibbi,
- <sup>4</sup> duma tëddi sama kaw lal ba,  
duma nelaw, duma gëmm sax bët,
- <sup>5</sup> li feek sàkkaluma Aji Sax ji bérab,  
ba dëkkal Mbérum Yanqóoba ma. »
- <sup>6</sup> Ma ne, Efrata lanu dégg °gaalu Yàlla ga,  
fekk ko àllub Yaar.
- <sup>7</sup> Nan dem ba kéram,  
sujjóotali ndëggëstalu tànkam ya.
- <sup>8</sup> Aji Sax ji, jógal àggi sa dalukaay,  
yaak sa °gaal gi làmboo sa doole.
- <sup>9</sup> Say °sarxalkat, yal nañu woddo njekk,  
sa wóllëre yi sarxolleendoo.
- <sup>10</sup> Xoolal ci Daawuda, sa jaam ba,  
bul gàntu ki nga fal.
- <sup>11</sup> Aji Sax ji daa giñal Daawuda  
dëgg gu mu dul dëddu,  
ne ko : « Ku jóge sa geño  
laay wuutal ci sa jal bi,
- <sup>12</sup> te say doom, bu ñu sàmmee sama °kóllëre,  
ak sama kàdduy seede yi ma léen di xamal,  
seeni doom it ñooy tooge  
sa jal ba fàww. »
- <sup>13</sup> Aji Sax ji kat a tàng °Siyonj,  
taamu faa dëkke.
- <sup>14</sup> Mu ne : « Fii laay dal-loo ba fàww,  
fii laay dëkk, maa ko taamu.
- <sup>15</sup> Dund bi, ma barkeela barkeel,  
néew-ji-doole yi, ma reggal ;
- <sup>16</sup> sarxalkat yi, ma wodde njot ;  
way gém ñi di sarxolle sarxolle.
- <sup>17</sup> Fa laay doolele Daawuda,  
taalal ki ma fal,
- <sup>18</sup> ay noonam, ma wodde gàcce ;  
moom, kaalaam ne ràññ. »

### Sabóor 133

Bokk, bennoo neex

<sup>1</sup> *Muy °jàngi yéeg, ñu di ko màggale Yàlla, ñeel Daawuda.*

Céy liika baax te neexati,  
ay bokk yu bokk dëkk, di benn !  
<sup>2</sup> Daa neex ni diwu bopp gu xeeñ,  
siite sikkim, bu mel ni sikkimu Aaróona,  
rogalaat ba ci mbubbam,  
<sup>3</sup> neex ni layub tundu Ermon,  
neex ni lay bu ni mel tey rogalaate tundi °Siyon.  
Fa la Aji Sax ji dogal barke,  
muy dund gu dul jeex.

### Sabóor 134

Way gëm ñaa ngi sant

<sup>1</sup> *Muy °jàngi yéeg, ñu di ko màggale Yàlla.*

Ayca, santleen Aji Sax ji,  
yéen jaami Aji Sax ji yépp,  
yéen ñiy taxawe kér Aji Sax ji guddi.  
<sup>2</sup> Yékkatileen seeni loxo bérab bu sell ba,  
te sant Aji Sax ji.  
<sup>3</sup> Yal na la Aji Sax ji barkeele fa °Siyon,  
moom mi sàkk asamaan ak suuf.

### Sabóor 135

Aji Sax ji jot na Israyil

<sup>1</sup> Màggal-leen Ki Sax !  
Màggal-leen turu Aji Sax ji,  
éey jaami Aji Sax ji, màggal-leen,  
<sup>2</sup> yéen ñi taxawe kér Aji Sax ji,  
fi sunu biir éttu Yàlla bi.

- <sup>3</sup> Màggal-leen Ki Sax, Aji Sax jee baax !  
Kañleen ko, kee sopplu !
- <sup>4</sup> Ki Sax a taamu Yanqóoba,  
muy Israyil mi mu jagoo.
- <sup>5</sup> Maa xam ne Aji Sax ji màgg na !  
Sunu Boroom a sut lépp lu ñuy jaamu.
- <sup>6</sup> Lépp lu Aji Sax ji namm,  
moom lay def asamaan ak suuf,  
ak biir géej ak xóote yépp.
- <sup>7</sup> Mooy yékkateey niir fa cati àddina,  
sàkkal taw ay melax,  
yebbee ngelaw cay dencam,
- <sup>8</sup> fàdd luy taaw fa Misra,  
doom aadama, ba ci mala.
- <sup>9</sup> Yéen waa Misra, moo yónnee ay firndeek i kéemaan  
fi seen biir,  
ñeel Firawnaak jawriñam ñépp.
- <sup>10</sup> Moo duma ay xeeti xeet,  
bóom buur yu mag yi,
- <sup>11</sup> muy Siwon, buuru Amoreen ña,  
ak Og, buuru Basan,  
ak buuri Kanaan ñépp.
- <sup>12</sup> Moo nangu seen réew, séddale,  
°bànni Israyil ñiy ñoñam séddoo.
- <sup>13</sup> Aji Sax ji, sa tur ba fàww ;  
Aji Sax ji, sa woy a saxal maasoo maas.
- <sup>14</sup> Aji Sax ji kay ay àtte mbooloom mi,  
di ñeewante jaamam ñi.
- <sup>15</sup> Tuuri yéefar yi, xaalis ak wurus,  
loxoo ko sàkk.
- <sup>16</sup> Am gémmiñ te du wax,  
am i gët te du gis,
- <sup>17</sup> am i nopp te du dégg,  
du sax noowal bakkan.
- <sup>18</sup> Ni sàkk yii tuur, yal nañu mel ni ñoom,

ñook ñi léen wóolu ñépp.  
 19 Éey waa kér Israyil, santleen Aji Sax ji !  
 Éey waa kér Aaróona, santleen Aji Sax ji !  
 20 Éey waa kér Lewi, santleen Aji Sax ji !  
 Yéen ñi ragal Aji Sax ji, santleen Aji Sax ji !  
 21 Nañuy sante Aji Sax ji °Siyon,  
 moom mi dëkke Yerusalem.  
 Màggal-leen Ki Sax !

### Sabóor 136

#### Yàllaa am kóllëre

1 Nangeen sante Aji Sax ji mbaaxam.  
 Kee saxoo ngoram !  
 2 Santleen Yàllay yàlla yi.  
 Kee saxoo ngoram !  
 3 Santleen Sangu sang yi.  
 Kee saxoo ngoram !  
 4 Moo wéetoo jaloore yu mag yi.  
 Kee saxoo ngoram !  
 5 Moo sàkke asamaan manoore.  
 Kee saxoo ngoram !  
 6 Moo lal suuf ca kaw ndox ma.  
 Kee saxoo ngoram !  
 7 Moo sàkk leer yu mag yi :  
 Kee saxoo ngoram !  
 8 jant bi yilif bëccëg,  
 Kee saxoo ngoram !  
 9 weer ak biddiiw, guddi.  
 Kee saxoo ngoram !  
 10 Moo fàdd taawi Misra yu góor ya,  
 Kee saxoo ngoram !  
 11 seppee °bànni Israyil ca ñoom,  
 Kee saxoo ngoram !  
 12 ci dooley loxoom ak kàttanu pérégam.

- Kee saxoo ngoram !  
 13 Moo xar géeju Barax ya yaar,  
                   Kee saxoo ngoram !  
 14 jàllale bànni Israyil ca digg ba.  
                   Kee saxoo ngoram !  
 15 Moo xalab Firawnaak mbooloom ca géeju Barax ya.  
                   Kee saxoo ngoram !  
 16 Moo jiite ñoñam ca màndij ma.  
                   Kee saxoo ngoram !  
 17 Moo duma buur yu mag ya,  
                   Kee saxoo ngoram !  
 18 bóom buur yu màgg ya,  
                   Kee saxoo ngoram !  
 19 reyaale Siwon buuru Amoreen ña,  
                   Kee saxoo ngoram !  
 20 reyati Og buuru Basan.  
                   Kee saxoo ngoram !  
 21 Moo nangu seen réew, joxe,  
                   Kee saxoo ngoram !  
 22 sédde Israyil ma dib jaamam.  
                   Kee saxoo ngoram !  
  
 23 Ci biir notaange la nu geesoo,  
                   Kee saxoo ngoram !  
 24 ne nu siféet ci loxoy noon ya.  
                   Kee saxoo ngoram !  
 25 Mooy leel bépp boroom bakkan.  
                   Kee saxoo ngoram !  
 26 Santleen Yàlla mi ci asamaan !  
                   Kee saxoo ngoram !

### Sabóor 137

#### Jooye nanu àll

- 1 Ca tàkkal dexi Babilon,  
   foofa lanu daa toog,  
   fàttliku °Siyonj, jooy.

- <sup>2</sup> Ca garab ya  
lanu daa wékk sunuy xalam.
- <sup>3</sup> Fa la nu sunuy sang daa woyloo,  
not nu, bëgg nu bégal léen,  
naan : « Woyal-leen nu ci woyi Siyon. »
- <sup>4</sup> Moo nu nuy woye woyu Aji Sax ji  
kaw suufas yéefar ?
- <sup>5</sup> Éy Yerusalem, su ma la naree fàtte,  
yal na ma doole dëddu !
- <sup>6</sup> Yerusalem, su ma la fàttlikuwul,  
fonk la, ba gën laa bége lépp,  
yal na sama làmmiñ tafoo sama denqleñ.
- <sup>7</sup> Aji Sax ji, fàttlikul Edomeen ña,  
keroog jantub Yerusalem,  
ba ñu naan : « Mabbaleena màbb,  
ba kenug dëkk bi siiñ! »
- <sup>8</sup> Yéen waa Babilon, gi ñu nara fàllas,  
ndokklee ku léen fey jëf,  
ja ngeen nu def !
- <sup>9</sup> Ndokklee ku ne cas seeni fere,  
tas ciw DOJ !

### Sabóor 138

#### Aji Sax ji waccu ma

<sup>1</sup> *Ñeel Daawuda.*

- Ma sante la xol bu la wéetal,  
woy la, gàngooru Yàlla ga ca kaw seede.
- <sup>2</sup> Ma sujjoot jublook sa kér gu sell gi,  
di wormaal saw tur,  
ngir sa ngor ak sa worma.  
Màggal nga sa tur ak sa kàddu,  
ba mu tiim lépp.
- <sup>3</sup> Bés ba ma wootee, yaa ma wuyu,  
ñemeel ma, dooleel ma.

- <sup>4</sup> Aji Sax ji, na la buuri àddina yépp màggal,  
ñoo dégg kàddu yi nga wax.
- <sup>5</sup> Nañu woy say jaloore, naan :  
« Aji Sax jeeka màgg teddnga ! »
- <sup>6</sup> Aji Sax jee kawe !  
Ku toroxlu, mu niir ;  
ku réy, mu ñooru.
- <sup>7</sup> Ma wéye njàqare,  
nga musal ma,  
dogalee sa loxo merum noon,  
walloo ma sa ndijoor.
- <sup>8</sup> Aji Sax jee may feyul.  
Éy Aji Sax ji, yaa saxoo ngor !  
Bul wacc ñi nga binde sa loxo.

### Sabóor 139

#### Aji Sax jee ma xam, ba jeexal ma

<sup>1</sup> *Mu jëm ci njiital jàngkat yi, ñeel Daawuda, di kàddug Sabóor.*

- Aji Sax ji, yaa ma natt, xam ma ;
- <sup>2</sup> yaa xam sama toogaay ak sama taxawaay,  
di ràññee fu sore samay xalaat,
- <sup>3</sup> di càmbar sama dox ak sama téraay,  
yittewoo lépp lu may def.
- <sup>4</sup> Aji Sax ji, bala maa wax baat,  
ndeke yaw, xam nga lépp.
- <sup>5</sup> Kanam ak gannaaw nga ma dare,  
teg ma sa loxo.
- <sup>6</sup> Ni nga ma xame daa yéeme,  
xóot lool, ba weesu ma.
- <sup>7</sup> Fu ma jëm, ba sore la ?  
Fu ma daw jëm, foo teewul ?
- <sup>8</sup> Ma ñalgu ba asamaan, yaa nga fa !  
Ma téri njaniiw, ndeke yaa nga fa !

- 9 Ma war laafi njël,  
 dëkki wàllaa géej,  
 10 nga tettee ma fa ba tey,  
 téyee ma sa ndijoor.  
 11 Su ma noon : « Na ma lëndëm mëdd boog,  
 ba leer gi far guddil ma, »  
 12 du tax lëndëm lëndëmal la dara.  
 Guddi da laa leeralal ni bëccëg,  
 lëndëm dig leer fi yaw.  
 13 Yaa ma sàkkal xol ak xalaat,  
 ràbbe ma sama biiru ndey.  
 14 Naa la sante sama bind bu raglu bii te yéeme,  
 say jalooree di kéemaan, bir na ma !  
 15 Sama jëmm jii umpu la,  
 ba muy bindu ci kumpa,  
 mel ni lu ñu ràbbe ci xóotey suuf.  
 16 Gis nga ma, ba ma diw lumb ;  
 sa téere lim na  
 fan yi nga ma àppal,  
 ba ca benn dooragul.  
 17 Yàlla, say xalaat aka maa yéem !  
 Ndaw lim bu réy !  
 18 Su ma ko doon waññ, moo èpp feppi suuf.  
 Maa ngii yewwu, ne feek yaw ba tey.  
 19 Éy sama Yàlla, soo reyoон ñu bon ñii !  
 Yéen bóomkat yi, soreleen ma !  
 20 Ñii sa tur lañuy luubale,  
 noonoo la, di tudd sa tur ciy caaxaan.  
 21 Aji Sax ji, maaka bañ ñi la bañ  
 te sib ñi lay gàntal.  
 22 Dama léena bañ ba fa mbañeel yem ;  
 samay noon dëgg lañu.  
 23 Yàlla, seetlu ma, ba ràññee sama xol ;  
 natt ma, ba ràññee sama xalaati xol.

<sup>24</sup> Xoolal ndax maa ngi doxe yoon wu aay,  
te nga teg ma ci yoon wi sax.

### Sabóor 140

#### Ku ñu tonjal a ngi ñaan

<sup>1</sup> *Mu jém ci njiital jàngkat yi,  
di kàddug Sabóor, ñeel Daawuda.*

<sup>2</sup> Éy Aji Sax ji, xettli ma ci ku bon,  
musal ma ci nitu fitna,  
<sup>3</sup> kuy nas lu bon,  
tey saxoo di sookeey xare,  
<sup>4</sup> daas làmmiñam ni jaan,  
guux dañaru ñàngóor.

<sup>°Selaw.</sup>

<sup>5</sup> Éy Aji Sax ji, aar ma ci loxol ku bon,  
musal ma ci nitu fitna,  
ku may fexee fakkta.  
<sup>6</sup> Nu bew ñee ma làqal i yeer,  
lalal may buum ak i caax,  
feggal ma seeni fiir ci yoon wi.

*Selaw.*

<sup>7</sup> Dama ne Aji Sax ji, yaay sama Yàlla ;  
Aji Sax ji, teewlul, ma dagaan la.  
<sup>8</sup> Aji Sax ji, Boroom bi may waloo doole,  
yaa ma yiir keroog bésub xare.

<sup>9</sup> Aji Sax ji, bul may ku bon nammeelam,  
bul joyal pexeem, muy yékkatiku.

*Selaw.*

<sup>10</sup> Ni ma sam, yal na seen ayu làmmiñ  
këppu seen kaw bopp.

<sup>11</sup> Yal nañu këppoo xali sawara,  
tàbbi ciy pax te dootuñu jóg.

<sup>12</sup> Kuy yàq der, yàlla bumu toog ci réew mi.  
Nitu fitna, yal na ko ay topp, ba dal ci kawam.

<sup>13</sup> Xam naa ne Aji Sax jeey jox néew-ji-doole dëgg ;

di sàmm àqu baadoolo.  
<sup>14</sup> Ku def njekk kay a lay sant ;  
 ku jub dëkke saw yiw.

### Sabóor 141

**Yàlla, sàmmal sama làmmiñ**

<sup>1</sup> *Muy kàddug Sabóor, ñeel Daawuda.*

- Aji Sax ji, woo naa la, gaawe ma !  
 Bu ma lay woo, teewlu ma.  
<sup>2</sup> Yal nanga ma nangul samag ñaan  
 ni cuuraay lu ñiu la taalal,  
 yoxo yi ma la tållal di saraxu ngoon soo gérém.  
<sup>3</sup> Aji Sax ji, sàmmal ma sama làmmiñ,  
 saytul ma sama kàddu.  
<sup>4</sup> Bu ma xiir ci lu aay,  
 may jéfe jéf ju bon,  
 ànd ceek ñiy jéf lu ñaaw,  
 di wàlli seeni bernde.  
<sup>5</sup> Kuy déggal Yàlla, man na maa dóor,  
 bantal ma ci ngor.  
 Loolu ngéneelu cuuraay la, duma ko bañ.  
 Waaye maa ngi saxoo ñaan pexey noon moy.  
<sup>6</sup> Yal nañu fenqe seeni njit ciw doj,  
 ba noon yi xam ne dëgg laa wax.  
<sup>7</sup> Ni ñuy gàbbe suuf ba mu ne ñafeet,  
 ni la njaniiw di ñaye,  
 aw seeni yax yu tasaaroo.  
<sup>8</sup> Aji Sax ji, Boroom bi, yaw laa wékk i bët,  
 yaw laa làqoo,  
 bu ma seetaan, ma dee.  
<sup>9</sup> Musal ma ci yeer yi ñu ma gasal,  
 ak fiir yi ma defkati ñaawteef yi tegal.

<sup>10</sup> Yal na ku bon tàbbi cig fiiram,  
te man ma teggi, wéy.

### Sabóor 142

#### Aji Sax ji rekk a ma yég

<sup>1</sup> *Muy taalifu ñaan bu ñeel Daawuda, ba  
mu nekkee ca xunti ma.*

- <sup>2</sup> Ma àddu, ñaan Aji Sax ji ;  
àddu ca kaw, di tinu Aji Sax ji,
- <sup>3</sup> sippi ko sama tawat,  
diis ko sama njàqare.
- <sup>4</sup> Bu ma yoqee,  
ràññee nga samay jéego ;  
yoon wi may jaare  
lañu ma làqal am yeer.
- <sup>5</sup> Ma geesu ndijoor, xool ;  
du kenn ku ma faale.  
Rawtu réer ma,  
du kenn ku sama bakkan saf.
- <sup>6</sup> Aji Sax ji, ma woo la wall ;  
ma ne, yaay sama kiiraay,  
di sama séddoo fi kaw suuf.
- <sup>7</sup> Teewlul, ma ne wóoy,  
damaa manatul,  
xetcli ma ci ñi ma topp,  
dañu maa èpp doole.
- <sup>8</sup> Ngalla génne ma fi ma téje,  
ma sant la.  
Man la way gém ñi di yéew èllèg,  
yaa may xéewale ab yool.

### Sabóor 143

Aji Sax jeey sama yaakaar

*1 Muy kàddug Sabóor, ñeel Daawuda.*

Éy Aji Sax ji, déglul, ma ñaan la ;  
teewlul, ma tinu la ;  
nangul ma ci sa wormaak sa njekk.

<sup>2</sup> Sang bi, bul layook man ;  
kenn jubul fi sa kanam, du kuy dund.

<sup>3</sup> Noon a ma sambal,  
daane ma, joggati,  
dëël ma ci lëndëm  
ni ku dee bu yàgg.

<sup>4</sup> Sama doole jeex tàkk,  
sama xol jeex, ma ne yàcc.

<sup>5</sup> May fàttliku bu jëkkoon,  
di xalaat sa jaloore yépp,  
seetaat li nga def.

<sup>6</sup> Ma tållal lay loxo,  
di la sàkku, ni suuf su mar di sàkkoo ndox.      °Selaw.

<sup>7</sup> Aji Sax ji, gaawal wuyu ma ;  
sama xol a jeex, ma ne yàcc,  
bu ma xañ sa yiw,  
ma yem ak kuy tàbbiji biir pax.

<sup>8</sup> Xëye ma sa ngor,  
yaw laa wóolu ;  
xamal ma fu may doxe,  
yaw laa wékk sama bakkan.

<sup>9</sup> Aji Sax ji, musal ma ci noon yi,  
yaw laa làqoo.

<sup>10</sup> Jàngal ma, ma jëfe sa coobare ;  
yaa di sama Yàlla.  
Yal na ma sam xel jiitee mbaax  
ci yoon wu tålli.

<sup>11</sup> Aji Sax ji, musal ma ngir saw tur,

jéfeel sag njekk,  
 teggil ma njàqarey bakkan.  
<sup>12</sup> Sànkal ma noon yi ci sa ngor,  
 bóomal ma bépp bañ.  
 Man de, maay sab jaam !

### Sabóor 144

Aji Sax ji, laggsil

<sup>1</sup> *Ñeel Daawuda.*

Cant ñeel na Aji Sax ji ma sës,  
 mu di ma jàngal xeex,  
 di ma tàggat ngir xare,  
<sup>2</sup> di sama wóllére, di ma yiir,  
 di ma làq, di ma xettli,  
 di ma aar, ma di ko làqoo,  
 mu di ma nangulal ay xeet.  
<sup>3</sup> Aji Sax ji, luy nit, ba nga di ko ràññee ?  
 luy doom aadama, ba nga di ko faale ?  
<sup>4</sup> Nit ni ngelaw,  
 ay fanam di takkndeer, wéy.  
<sup>5</sup> Aji Sax ji, firil asamaan, wàcc ;  
 laal tund yi, ñu saxar.  
<sup>6</sup> Melaxal, falaxe noon yi ;  
 fittal, ñu félxoo,  
<sup>7</sup> nga yóootoo ma fu kawe,  
 xettli ma, wallu ma ci doxandéem  
 yi def wali wal fi sama kaw,  
<sup>8</sup> di fen,  
 di giñ i fen.  
<sup>9</sup> Yàlla, naa la woyal woy wu yees,  
 xalamal la xalamu fukki buum.  
<sup>10</sup> Yaay may buur yi ndam,  
 yaa musal sa jaam ba, Daawuda  
 ci saamar bu aay.  
<sup>11</sup> Musal ma, xettli ma

ci loxol doxandéem  
iyi fen, di giñ i fen.

- <sup>12</sup> Su boobaa sunu doom yu góor  
màgge ndaw, ni gàncax gu mat sëkk ;  
sunuy janq jekk ni doji yett,  
yu ñu tabaxe kér buur.
- <sup>13</sup> Sunuy sàq feese wirgoy wirgo,  
sunuy gàtt jur junni,  
ba fukki junni (10.000) ci parlu yi,
- <sup>14</sup> nag yi èmb ba diis,  
du mbas, du biir bu yàqu,  
te deesu fi yuuxoo pénc ya.
- <sup>15</sup> Ndokklee xeet wu am lii !  
Ndokklee xeet wu yàllawoo Aji Sax ji !

### Sabóor 145

#### Ma kañ Buur Yàlla

<sup>1</sup> *Muy jàngi màggal, ñeel Daawuda.*

- Sama Yàlla, Buur bi, naa la màggal,  
teral sa tur ba fàww.
- <sup>2</sup> Bésoo bés ma di la sant,  
di màggal sa tur ba fàww !
- <sup>3</sup> Aji Sax jee màgg te jara màggala màggal,  
kii màggam amul kemu !
- <sup>4</sup> Na maasoo maas di màggal say jaloore,  
di biral sa njàmbaarte.
- <sup>5</sup> Sa leelu teddnga ji ne ràññ,  
ak sa jéf ju yéeme laay jàngat !
- <sup>6</sup> Sa dooley jéf ju raglu dees na ko jottli,  
te sa màggayaay maa koy yéene.
- <sup>7</sup> Sa mbaax gu réy, dees na ko tari,  
te sag njekk, dees na ko woy.
- <sup>8</sup> Yiw ak yérmande, Aji Sax ji ;

kee muñ mer te bare ngor !

<sup>9</sup> Aji Sax jee baaxe ñépp,  
di yérém lu mu sàkk.

<sup>10</sup> Aji Sax ji, lépp loo sàkk a lay gérém,  
sa wóllère yi di la sant,

<sup>11</sup> di tudd sa teddngay nguur,  
tey dégtale sag njàmbar,

<sup>12</sup> doom aadama xam say jaloore  
ak sa teddngaak sa darajay nguur.

<sup>13</sup> Sa nguur ay nguur gu sax dàkk,  
sa kilifteef ñeel maasoo maas.

Aji Sax ji daa sàmm ay waxam, gore ciy jéfam.

<sup>14</sup> Ku daanu, Aji Sax ji wallu ;  
ku ségg, mu siggal.

<sup>15</sup> Ñépp a la wékk bët, di yaakaar,  
te bu jotee, yaa léen di leel,

<sup>16</sup> tållal sa loxo,  
reggal luy dund, ba xolam sedd.

<sup>17</sup> Aji Sax ji, jéfinam jépp njekk la,  
jéfam jépp ngor la.

<sup>18</sup> Aji Sax jee jege képp ku ko woo wall,  
képp ku ko woo wall te muy dëgg.

<sup>19</sup> Nammeelu ku ko ragal, mu sottal ;  
yuuxam, mu dégg, musal.

<sup>20</sup> Aji Sax jeey sàmm kuy soppeem,  
di sànk képp ku bon.

<sup>21</sup> Naa sàlloo sant Aji Sax ji,  
na luy dund saxoo dàkk  
di màggal sellngay turam !

### Sabóor 146

#### Buur Yàllaa jara wóolu

<sup>1</sup> Måggal-leen Ki Sax !  
Naa måggale Aji Sax ji xol,

- <sup>2</sup> li feek may dund, di ko kañ,  
li feek may noyyi, di woy sama Yalla.
- <sup>3</sup> Buleen wóolu kilifa,  
doom aadama amul wall.
- <sup>4</sup> Noo ga day rëcc, mu dellu suuf ;  
bu bés baa, pexeem jeex.
- <sup>5</sup> Ndokklee kuy dimbalikoo Yàllay Yanqóoba ;  
di yaakaar Yàllaam Aji Sax ji,
- <sup>6</sup> ki sàkk kaw ak suuf,  
géej ak lu ci biiram,  
di sàmm dëgg ba fàww,
- <sup>7</sup> di àtte néew-ji-doole,  
di leel ku xiif.  
Aji Sax jeey tijji ku ñu tèj.
- <sup>8</sup> Aji Sax jeey xippil silmaxa,  
di siggal ku sëgg.  
Aji Sax jee sopp ku jub.
- <sup>9</sup> Aji Sax jeey sàmm doxandéem,  
taxawu jirim ak jëtun,  
waaye mooy lajjal pexem ku bon.
- <sup>10</sup> Aji Sax jeey nguuru ba fàww.  
Yaw °Siyoŋ, sa Yàllaa ñeel maasoo maas.

Màggal-leen Ki Sax !

### Sabóor 147

Yàllaa gën ci àddina, gën ci nit

- <sup>1</sup> Màggal-leen Ki Sax !

- Kañ sunu Yàllaa baax,  
màggal koo neex te war.
- <sup>2</sup> Aji Sax jaa ngi tabaxaat Yerusalem,  
di delloosi ña ñu dàqe Israyil,

- 3 di faj naqaru xol,  
 fajtal góomi boroom.  
 4 Mooy lim biddiiw yi,  
 tudd bu ci nekk.  
 5 Sunu Boroom a màgg, bare doole ;  
 am xelam weesu kemu.  
 6 Aji Sax ji, néew-ji-doole, mu yenni ;  
 ku bon, mu daane ci suuf.  
  
 7 Woyeleen Aji Sax ji kàddug cant,  
 kañeleen sunu Yàlla jii ay xalam ;  
 8 mooy sànge asamaan ay niir,  
 tawal suuf,  
 saxal tund yi am ñax,  
 9 leel mala,  
 xol liiru baaxoñ bu jooy.  
  
 10 Kii nawul dooley fas,  
 gérémul kàttanu jàmbaar.  
 11 Ki Aji Sax ji gérém mooy ki ko ragal  
 te di ko yaakaare ngoram.  
  
 12 Yerusalem, sargal-leen Aji Sax ji !  
 yéen waa °Siyon laa ne, màggal-leen seen Yàlla !  
 13 Mooy téj ràpp seen bunti dëkk,  
 barkeel seen askan wa ca biir,  
 14 jàmmal seen suufas réew,  
 reggal leen ngèneelu pepp,  
 15 yónnee suuf ndigalam,  
 kàddoom ne coww, daw ca.  
 16 Mooy tawal yuur bu mel ni wëttéen,  
 di lay lay bu sedd, mel ni pënd ci suuf.  
 17 Mooy yuri tawu yuoram niy donj.  
 Bu ni seddee, ana kuy taxaw ?  
 18 Mu yebal kàddoom, seeyal ;  
 wal ngelawam, ndox walalaan.  
 19 Mooy wax Yanqóoba kàddoom,

dogalam yaak ndigali yoonam ñeel Israyil.  
<sup>20</sup> Loolu defalu ko wenn xeet ;  
 kenn xamu ci ndigali yoonam.

Màggal-leen Ki Sax !

### Sabóor 148

Na àddina wérngal këpp màggal Yalla

<sup>1</sup> Màggal-leen Ki Sax !

- Nangeen màggale Aji Sax ji fa asamaan,  
 màggale ko fa kaw-a-kaw.  
<sup>2</sup> Màggal-leen ko, yéen malaakaam yépp,  
 màggal-leen ko, yéen gàngooram yi.  
<sup>3</sup> Màggal-leen ko, yéen jant beek weer wi,  
 màggal-leen ko, yéen mboolem biddiiw yii di  
 nes-nesi.  
<sup>4</sup> Màggal-leen ko, yéen asamaani kawli kaw,  
 ba ca ndox ma tiim asamaan ya.  
<sup>5</sup> Nañu màggal turu Aji Sax ji,  
 kii kat a santaane, lii lépp am.  
<sup>6</sup> Moo léen samp, ñu sax ba fàww,  
 mu dogal ko, te du toxu.
- <sup>7</sup> Nangeen màggale Aji Sax ji fa kaw suuf,  
 yéen ninki-nànkay géej ak xóote yépp,  
<sup>8</sup> ba ca melax yaak doj yu sedd yay taw,  
 ak tawu yuur ak ub lay,  
 ba ca ngëlén yu mag yay def ndigalam.  
<sup>9</sup> Màggal-leen ko yéen tund yu mag yeek  
 yu ndaw yépp,  
 ba ci garab yiy meññ ak garabi seedar yi,  
<sup>10</sup> ba ci mala yépp, yu àll ak gépp jur  
 ak luy raam ak njanaaw,  
<sup>11</sup> ak buuri àddinaak xeet yépp,  
 ak kilifa yeek njiiti àddina yépp,

- <sup>12</sup> xale bu góor ak bu jigéen,  
mag ak ndaw.  
<sup>13</sup> Màggal-leen turu Aji Sax ji,  
moom doñj la turam kawe,  
darajaam tiim asamaan ak suuf.  
<sup>14</sup> Moo dooleel mbooloom,  
wóllëreem ñiy mbooloom °bànni Israyil,  
xeet wi mu xejjoo, di ko màggal.

Màggal-leen Ki Sax !

### Sabóor 149

#### Na Israyil màggal Ki Sax

<sup>1</sup> Màggal-leen Ki Sax !

- Woyleen Aji Sax ji woy wu yees,  
màggal ko fi ndajem wóllëreem ñi.  
<sup>2</sup> Na Israyil bége kii ko sakk,  
doomi °Siyon, laa ne, ñu bànnexoo seen buur bii.  
<sup>3</sup> Nañu màggale turam am pecc,  
tëggal ko, xalamal ko.  
<sup>4</sup> Aji Sax jee safoo mbooloom,  
di terale néew-ji-doole ag muc.
- <sup>5</sup> Na wóllërey Yàlla bànnexoo seen ndam,  
bu ñu téddee sax, di sarxolle,  
<sup>6</sup> di xaacuy kañ Yàlla,  
ñàbbaale saamaru ñaari ñawka,  
<sup>7</sup> ngir duma yéefar yi,  
mbugale ko yooyu xeet,  
<sup>8</sup> yeewe seeni buur ay càllala,  
jéngé seeni njiit jéngi weñ,  
<sup>9</sup> ngir sottalal léen àtte bi ñu bind,  
muy ndamu wóllërey Yàlla yépp.

Màggal-leen Ki Sax !

**Sabóor 150****Màggal-leen Ki Sax !****1 Màggal-leen Ki Sax !**

Nangeen màggale Yàlla biir këram gu sell,  
màggale ko ca tatay asamaanam.

**2 Màggaleen ko ay jalooreem,**  
màggale ko màggam gu réy.

**3 Màggaleen kog liit,**  
màggale ko xalam ak moroom ma.

**4 Màggaleen ko njiin ak i pooj,**  
màggale ko xalam ak toxoro.

**5 Màggaleen ko tèggum weñ mu xumb,**  
màggale ko tèggum weñ mu kawe.

**6 Na lépp luy noyyi màggal Ki Sax !**

**Màggal-leen Ki Sax !**

|

|

|

|

|

|

|

|

## Leeral yi

**bànni Israyil g- :** Israyil mooy tur wa Yàlla joxoon Yanqóoba, doomu Isaaxa, di sétu Ibraayma. Ñi soqikoo ci Yanqóoba lañuy wooye bànni Israyil mbaa Yawut. Ñoo def fukki giir ak ñaar, di xeet yi soqikoo ci doomi Yanqóoba. Jamonoy tey jii dees na léen wooye naari Yawut yi.

**gaal g- :** Waxande la, wu ñu denc àlluwa, ya ñu bindoon yoonu Yàlla te yonent Yàlla Musaa jottali ko. Moo doon misaal teewaayu Aji Sax ji ci biir màggalukaay bi ci digg mbooloom.

**jàngi yéeg g- :** Jombul ay jäng la yu màggalkat yi daan jäng bu ñuy yéeg, jém Yerusalem ci bési màggal at mu nekk.

**kóllëre g- :** Ci mbind mu sell mi mboolem kóllëre yi Yàlla fasal nit ñu ngi aju ci kóllëreem ak Ibraayma mi mu digoon ne ko : « Dinaa feddli sama kóllëre, gi ci sama diggante ak yaw, yaak sa askan, muy kóllëre guy sax maasoo maas ba fàww. Dinaa doon sa Yàlla, yaak sa askan. » (Njàlbéen ga 17.7).

**Kuus :** Réew la mu nekkoon ca bëj-saalumu Misra te èmboon réewum Sudan ak Ecopi ga woon ak Nubi.

**Sarax yi ñuy wax fii,** Yàlla lañu koy jagleel. Bànni Israyil amoon nañu xetti sarax yu bare : ay saraxi kéene ak ay saraxi sañulbañ ak sarax su ñuy tuural Yàlla ak saraxu xaalis ak saraxu pepp. Waaye li ci ëpp ay saraxi tuur deret la woon yu léen Yàlla tegoon, ngir seen njéggalug bàkkaar. Su ko defee ñu mana dëkke jokkook moom, Yàlla ju sell ji, ndax saraxu deret ja. Am na ci ay sarax, Yàlla da ciy xamal bànni Israyil ne peyug bàkkaar mooy dee, te deewu jur, gi ñuy sarxal, njot la ci boroom sarax bi. Bu loolu weesoo, deretu sarax dina fóot sobes bàkkaar itam, muy sobes suy topp nit mbaa lenn ci jumtuwaayi màggalukaay ba.

**sarax suy lakk ba jeex :** Mooy tekki sarax su kenn dul lekk dara. Dañu koy lakk muy saxar, ba jeex, jagleel lépp Yàlla.

**saraxu cant (ci biir jämm) :** Mooy sarax, si ñu daan sante Yàlla, ndax li mu léen di nangul, di léen barkeel te di léen

## Leeral yi

jàmmal. Jur lay doon gu ñuy séddale ñetti cér. Benn bi, ñu lakkal ko Aji Sax ji ci sarxalukaay bi, ba mu jeex. Benn bi, sarxalkat yi féetewoo ko. Netteel bi, ki sarxe lekk ko, mook waa kéraram.

**saraxu póotum bàkkaar :** Sarax la suy dindi sobe, di far ag tooñ tey musal boroom ci mbugalu bàkkaar. Ag jur lay doon gu nit ki di rendil Yàlla, defal ko ko sarax. Bu ñu tuuree deret ji, bakkan bi deretu jur giy jémmal mooy wuutu bakkanu ki sarxe. Sarax boobu it dees koy lakk.

**sarxalkat b- :** Yàlla tånn na ñi bokk ci giiru Lewi, doomu Yanqóoba, ñuy Aaróona ak ñi askanoo ci moom, ngir ñu taxawal bànni Israyil fa kanamam. Sarxalkati bànni Israyil ay góor lañu yu ñu sellalal Yàlla, ñu féetewoo liggéeyam. Noo sasoo liggéey biy jubale mbooloo meek Yàlla. Noo léen di sarxalal te ñoo yore liggéeyu jaamu Yàlla bi.

**sarxalukaay b- :** Sarxalukaay ya ñaar la woon ca biir kér Yàlla ga : benn bi ñuy lakke jur gu ñu rendi, bi ci des, ñu di ci taal cuuraayu sarax. Sarxalukaayu jur gi dafa mel ni waxande wu amul kubéer. Mu ànd ak ub caaxam, ñu di ci teg matt ma ñuy lakke jur ga. Defaral nañu sarxalukaay ya ay béjjén ca ñeenti koñ ya ca kaw.

**Selaw :** Jàpp nañu ne ndigal la luy taxawloo woykat yi, te jombul xalam yi wéy ba tey. Waaye man na nekk itam ndigal ngir xalam yeek woykat yi gëna xumbal.

**serub y- :** Baatu ebré la. Ay mbindeef lañu yu am ay laaf te nekk kaw asamaan, di bokk ak Yàlla jataay. Nooy wattu dénd ba ngànguney Yàlla nekk, ba foofa dékke sell. Mèggalukaayu Yàlla ga amoon na gaal gu ñuy wooye gaalu kóllére ga. Ñaari serub yu ñu tégge wurus lañu tegoon ca kawam, ñu tiim ko, seeni laaf tàllalu, di saamandaay ngàngunem buur. Loolu di wone ne Yàlla Aji Sax jaa nga fa teew, na mu teewe ca kaw asamaan, serub ya yéew ko. Yàlla ci boppam nag kenn jémmalu ko fa, na ñu jémmale serub ya ñu téggi.

**Siyon :** Siyon fii mooy tund wa kér Yàlla ga nekk ca Yerusalem. Daan nañu ko tudde it dëkkub Yerusalem mbaa réewum Israyil.



©DCC

*Sarxalukaay bi*

## Fireekaay bi

**barax b-** Gàncax la guy sax ci wetu dex.

**faagaagal** Rey ay nit mbaa mala, ba ñu jeex tàkk. *Bu Tabaski jotee, xar yépp lanuy faagaagal.*

**far** Mooy jeexal tàkk.

**gëndoo** Jàpploo, booloo. *Bu tawee, ndox mépp ay wal, gëndoo benn bérab.*

**geño g-** Ñu bokke ci geño, ñoo bokk baay mbaa maam ju góor.

**giif** Soo meree, ba mer ma jeex, sa mer giif na.

**jétun b-** Ku jékkéram faatu la. Mooy **jétur** ba tey.

**joor g-** Suuf su wow, su amul ndox. Ndox du fa taa, day dem ca xur wa. *Waa Bawol ay joor-joor lañu. Amuñu dex, amuñu géej.*

**kàngam b-** Kilifa la ci dëkk.

**kulbét /ne/** Mooy jekki-jekki ubbi.

**leer gu ndaw g-** Leeru weer gannaaw bu màggee ba leer nàññ, moom lañuy wax leer gu ndaw.

**lël** Lël sab noon, mooy nangu alalam gannaaw boo ko dumaa cib xare.

**mbënn m-** Mbënn mi man na doon bëtu ndox mbaa taa-taa ndox bu réy, ba jéaggi dayo. Man na jóge it ci taw, mbaa muy ndox mu jóge ci suuf. *Mbënn daa na bare Ndar.*

**Misra m-** Mooy réew mi ñuy wax Esibté tey.

**móol** Dinañu ko wax **muul** itam.

**ndiiraan g-** Lu bare lay doon, lu ànd di yéngu, di dem. *Xale yi def nañu ndiiraan, topp màndikat bi.*

**pakk b-** Jumtukaay la bu xarekat daan ñàbb, di ko aare boppam. Jamonoy tey takk-der yi dinañu ko faral di ñàbb bu ñuy jàankoontek gàngoor.

**parlu m-** Àll la bu jur gi mana fore.

**rëbb** Mooy dëddu gu ànd ak móolu, di jur alkànde.

**saamar b-** Xeetu jaasi la, bu ñaari wetam ñaw.

**sëllu w-** Nag wu ndaw la.

### Fireekaay bi

**takk l-** Wetu dex la.

**tamarax b-** Pëndax bu mboq la, te boo ko lakkee day xasaw.

**wasaare** Mooy dàq, ñu tasaaroo.

**wëgg** Mooy may ag jur ndox, ñu naan.

**wirgo w-** Xeet la. *Bisaab am na ci ñaari wirgo, bu xonq ak bu weex.*

**xas /ne/** Bare lool. *Dëkk baa ngi ne xas ak i màngo.*

**xóotey géej, xóote y-** Bérab yu xóot yi géej taaje.

**xunti m-** Doj la wu def pax, ba nit man cee dugg.



